

近代中國史料叢刊第二十輯  
沈雲龍主編

卞制軍（頌臣）政書

卞寶第著

文海出版社印行

卞制軍政書

西城團防保甲章程

一本城奏定章程分段擇請公正京員及誠實鋪戶充當首事申明水火會之約稽查奸慝彼此防衛無事則聲勢聯絡有事則互爲救援以期台乎守望相助之意應將該處牌冊交給首事隨時稽查其當官人役總甲以下皆聽驅使

一編造門牌每二十戶派一保長責成就近查察如有容留來歷不明之人卽行密報司坊拏辦容隱不報者查出一并懲處所管二十戶內有遷徙及搬來居

住者報知司坊及首事於牌冊註明以便稽查

一廟宇客店車廠車行炭廠等處凡有外來居住者均須出具保結除報明司坊登載循環簿備查外并報明首事一律稽查其地方有小店及寄賣洋藥局尤宜隨時查察并責令該地方附近之鋪戶住戶按日輪流密訪倘有容留來歷不明之人准其密報司坊及首事人查拏隱匿者一并懲治

一雜院空房均責成房東查察不准容留雜人潛住雜院人數較多應令房主與包租人出保方准居住違者重懲空房尤易藏奸卽令看房人將空屋門窗戶

壁檢點清楚妥爲封鎖只留看房人住屋幾間報知首事註明其人幾名以便隨時查訪如看房人藉詞京官產業不服稽查從嚴懲辦

一會館責成值年京官及司事商民稽查凡有鄉民投住者俱報知首事查察如潛藏奸匪查出一并重究仍由坊員按月查明具報

一外來雜藝方技人等必須切實保人方准在地面居住如無的保一概驅逐

一乞丐人等責成丐頭覓一空閑處所安置約束報知司坊及首事編冊稽查無業游民如無切實認保分

別驅逐遞籍

一日後新開店鋪有未曾編入牌冊者應令鋪主先行報明該坊及首事查明來歷取具保結方准開設編入門牌在官人等不准藉端索費違者准其赴城呈告如有未經報明私自開設者封閉懲處

一火燭盜賊最宜防備應按照歷辦章程本段遇有火燭盜賊等事本家有鑼者鳴鑼無鑼者鳴擊響器鄰家互應無論官商鋪住各戶凡一戶有三丁以上者俱令家出一人執持器械前赴救援由首事給與號牌寫明某鋪某戶到者交首事稽覈不到者送官責

懲此係奏准申明水火會之約如有抗違不遵者無論官商士庶本城酌量分別叅處責懲決不寬貸其燈籠號牌等件前此辦理守助約尙有存者應一律修整應添置者需費亦屬無多應由首事各按地段酌量捐辦不得藉端滋擾

一宵小出沒尤當深夜嚴查應照定例除喪事問疾延醫生產准其行走外其有無故犯夜者卽行盤獲送究茶館飯店如有夜晚開張聚集外來游棍口音不對形迹可疑者卽行嚴拏究辦

一私藏私造軍器有干例禁應隨時查拏

一民更應由首事向本段任戶鋪戶籌議舉行除更夫  
巡夜外無論鋪戶住戶每夜責令本段一三家輪流  
出巡以便稽查火燭盜賊

上恭親王書

竊以天下安危繫於

君上尤繫於樞輔樞輔得人則天下安樞輔不得人則天  
下危今日之勢爲何如時乎西陲之戎事方興徐  
海之搶氛尙熾回仇於漢深爲南服之憂夷處於  
華終是中原之患卽東南數省巨憝雖除餘凶未  
殄瘡痍滿地科斂仍繁吏治不修民生尙蹙所望

於

賢親王與二三執政補揀時艱維持大局者願不重哉

昨伏讀

賢親王重荷

恩綸復典樞要

朝廷觀過之明

聖主權衡之當中外人情愈於

王加責望焉非多求於

王也一則以

嚴旨在前慮



王有自危之心遇事或多疑畏將忠直之性變而爲唯  
諾之風一則以衆論交推慮

主有自是之心舉念稍涉驕矜將虛受之衷變而爲滿  
假之見在

賢親王不宜有此亦不致有此而衆人鯁鯁過計者望  
之深故慮之切耳且

王自議政以來翊贊

廟謨清奸人於

君側援引賢類除元惡於江南方冀佑成

聖德輔

冲主以致太平克集大勛保令名以全終始迺以稍疏禮

法致觸

天威雖進退止於一身而維繫實關全局當

主少國疑之際正難治易亂之時設使輔弼失當政令偶

乖

王雖退居藩邸不與國事而返之於心能無遺憾况身

爲

帝室之懿親誼切

天家之骨肉有一不謹足累大端其何以上酬

宣宗成皇帝教誨之恩

先帝友于之愛及兩宮

皇太后

皇上倚畀之隆揆之春秋責備賢者之義

賢親王其何辭乎今幸

雷霆之怒已回

雨露之施復被伏願

賢親王靖共自矢勤慎是圖深維體國之忠益勉修名  
之立勿以前事而自危勿以輿情而自是樂聞善  
言勤攻已闕戴禮云名難得而易失可不慎哉固  
知

賢親王門牆甚峻頤笑甚嚴斷無奔走之人敢於干請  
以累

盛德者然而君子防未然瓜李之嫌薏苡之謗不可不  
避所望口懷兢惕以濟艱難務使政事所出無一  
疵可指庶幾

清望日昭浮議全息

王之福天下之福也若夫周公之聖尙有流言  
王今處

成王之時居周公之任宜存殷鑒益楸前功詩有具瞻之  
詠語有防口之箴

王其留意省察焉

寶第

素好直言不知忌諱仰惟

邸第尊嚴未便上謁謹修尺牘以代面陳伏乞

宗鑒謹上

通飭各州縣辦保甲札

查得保甲之法所以戢奸宄卽所以衛善良果使城鄉無地藏奸閭閻自能安枕凡屬居民奚有不樂於從事者前經本衙門奏准章程奉

旨勒限一月辦理乃迄今一年尙未全行冊報該州縣玩

誤公事膜視地方至於此極殊堪痛恨甚或謂民間疑畏有慮爲按戶抽丁者有慮爲藉端歛費者不自

咎其委靡轉諉過於民間尤屬設詞欺飾夫

朝廷惠愛羣黎咸欲登諸衽席共享昇平卽官府亦欲除  
暴安良肅清畿輔豈能以衛民之政轉以擾民致有  
抽丁歛費之弊皆該州縣安坐衙齋并不親懇勸諭  
假手吏胥滋擾鄉里以致民情搖惑董正無人該有  
司玩忽因循咎將誰諉且查前任武清胡令辦理保  
甲團練成效昭然至今民有去思從未聞有以擾民  
稱者豈胡令獨有異人之畧而該州縣皆不及耶今  
特再行札催札到該州務各遵照前奏章程及現札  
事理一一刊示曉諭并慎選公正紳耆爲地方所信

服者昇之首事惟應殷殷講說使百姓咸知清理地  
面卽以自衛身家果能稽查嚴密一律整齊首事必  
須酌加鼓勵如有舉發窩賊之家獲犯定案後准該  
州縣詳請給獎從此實力奉行毋許仍前玩泄一俟  
辦齊後卽行造冊詳報本尹堂隨時委員抽查仍當  
親行巡視倘猶視爲具文查有粉飾遺漏定行嚴叅  
不貸并先將現辦情形及刊刻示式限一月稟報懷  
遵切切

諭順天府各屬

各屬官員知悉州縣爲親民之官於地方公事自宜

實力講求果能勤於緝捕勇於聽斷不爲貪酷之行  
不任吏胥之擾民間疾苦隨時體恤自然輿情愛戴  
頌聲洋溢此等循良之吏上司豈無耳目遇有優缺  
自當調劑遇有升缺自當拔擢甚或臚列政蹟露章  
特薦於官職聲名兩有所得豈不甚善乃近來積習  
不講治道專務營求遇優缺則百計鑽謀遇瘠缺則  
多方巧避試思

朝廷設立州縣用以治民本無分別安能優缺則有官瘠  
缺可無官也且思避瘠缺者所以自謀則善矣其如  
他人何反之於心似亦不恕該員等惟當勉作好官



制軍正書 卷一  
本尹堂自有鑒別倘仍以貪緣爲可恃以怠玩爲無妨一經覺察白簡立登勿謂申戒之不預也勉之懍之特諭

### 通飭順天各屬札

爲通飭事查例載州縣及有刑名廳衛等官每月自理事件作何審斷與准理拘提完結之月日逐件登記按月按冊申送該府道司督撫查考等語立法極爲周密乃該州縣廳等日久視爲具文并不按月申報以致積案纍纍任意遷延使民朝夕聽候廢時失業牽連無辜拖累之苦不堪言狀殊失爲民父母之

道爲此仰該道轉飭各廳州縣等將現有案件開具事由每月將已結若干起未結若干起新案若干起據實具報以憑查核如有隱漏裝飾或經上控或經查察定行照例嚴叅決不寬貸

順天府關防示

爲曉諭事本尹堂於地方公事均係自行經理毫不假手於人如有書差家丁人等在外招搖撞騙恐嚇勒索等弊准被害之家赴署申訴以憑究辦決不袒護至該軍民人等有詞訟案件既經到官自應靜候審理設有屈抑仍准呈訴不得於聽審之時向地方

官覓情囑托倘敢仍蹈前項情弊定卽從嚴懲辦不稍寬貸爲此曉諭知之其各懍遵特示

召募防兵更番輪轉利弊議

前聞捕盜章程議有巡防兵弁每月更換之語當與兼尹憲商酌已許及瓜而代矣昨據稟稱現經兼尹憲示定仍係按月更番輪轉以防包庇窩藏之弊所慮極是然愚謂現在新募兵丁皆係就本州縣召募似可卽就本地用之緣本地之人爲本地之用路徑皆熟於盜賊出入之區知所防範爲利一若調至他處路徑皆生及至一月甫能熟悉又將他徙矣所有

在各州縣之兵皆成生手爲弊一增兵本係由本州縣挑選將來由本州縣訓練孰優孰劣官所習知調遣易於得力爲利二若調至他處官與兵皆不相習誰可用誰不可用官不能知而駕馭難且此處訓練之人下月已爲他處所用州縣亦未必用心訓練而操防弛爲弊二本地人於本地情形物價皆所素悉水草便宜則馬乾可濟爲利三若調至他處人地皆生飲馬無不需錢草價或且加倍卽食用等項恐異地相欺較本地爲貴在兵丁必不能甘在售者又非此不賣勢必滋生事端爲弊三本地人本須謀

生每月得餉二兩三錢尙可自飽兼以自衛鄉里或  
者樂於從事若調至他處既無行糧坐糧之款而有  
居者行者之謀加以異地欺生食用較費餉數不能  
資其一飽則人皆裹足召募爲難爲弊四現時募兵  
責令的保方准投充非僅令其保身家清白也當責  
其保素習安分之人若在本本地滋事猶可責成保人  
稽查告舉若調至他處保人能隨之行耶設竟不安  
本分無所責成爲弊五至謂本地人恐各回本家一  
時調動不及似也現議在大道設立公所與之棲止  
原爲稽查約束官可隨時訓練隨時調遣如有私自

回家者一經查出卽時責革可也至謂本地人恐致包庇窩藏無論易地未必卽不包庇也以營兵而包庇窩藏全無覺察所以責成保人者謂何所以責成伍長隊長哨長者謂何所以責成州縣者謂何此等事自可從嚴懲治是在上游之風厲不風厲耳何足慮哉鄙見如此惟公事當公議之果使後有流弊不妨再議更番輪轉現當刊發章程能不呆定此四字可乎望諸君就鄙見議之事惟期於有益不妨詰難也特布

示文安縣學

爲剴切曉諭事照得地方官欲正民風當先端士習  
該文武生員列四民之首厠身庠序自宜束躬自愛  
表率閭閻乃聞得該縣文生不守臥碑以構訟爲能  
歛錢包告事不干已出頭幫扛愚民無知受其播弄  
不忍一朝之忿動至兩敗俱傷往往拖累經年結訟  
無已遂致同鄉共井之人半爲相寇相讐之輩武生  
則窩賭包娼橫行鄉曲似此積習爲害殊深風俗人  
心大有關係

本尹堂備位京圻宜端名教爲此示諭爾士子等嗣  
後務宜洗心滌慮痛改前非讀書講武力圖上進

本尹堂斷不追咎既往倘經此次告誡之後仍敢怙惡不悛則是有心藐法

本尹堂一有見聞定卽嚴拏懲辦該士子等幸勿以身嘗試可也懍之特示

通飭四路廳營及各州縣認真操防練兵綏靖地方  
札

查本衙門前發章程凡馬兵領到馬匹用心排調常將旗幟在馬前搖曳用鎗礮在馬旁施放使之習見習聞庶乘騎放鎗全無驚駭倘領到生馬於一月後點驗時尙未馴熟卽將該馬兵責懲示警并於四路



命 一 三  
本營及駐紮州縣各立驗馬等第簿每月由四路廳  
及各州縣驗明等第查明臆壯疲瘦分別賞罰等語  
當經發給馬乾實銀并飭州縣津貼麩草自足喂養  
所領新馬屢次面諭廳縣認真挑驗如有不堪騎用  
者飭令原領官弁卽速更換乃馬匹已領去數月竟  
多疲老瘦弱旣未立時挑換亦未隨時挑驗是該廳  
縣遇事顛預卽此可見經此次札飭之後務將驗馬  
等第號簿按月由州縣及本營送廳核轉詳送本衙  
門備查倘再有粉飾一經查出或有不堪調遣者卽  
將該廳營州縣分別懲處責令賠補更換以免虛耗

乾銀又章程內載四路弁兵在本營駐紮者由廳操演哨長就地操演設立等第冊簿以備調查等語復經屢次面諭廳縣隨時督操乃聞各營弁并不練習廳縣并不稽查抽操是以本衙門於領餉時調驗弁兵技藝多生實爲明証每於各州縣謁見時無不剴切譬喻告以所派弁兵原以協助該州縣保衛地方聽其調度必須操練精熟遇有巡緝等事方爲可恃旣聽差操如同自養馬勇此勇尙有月領營糧不必捐貲雇給所以體恤州縣者不爲不優并飭領軍棍准其責懲不聽約束調度准其斥革所以與權州縣

者不爲不重且保衛地方卽保自己處分該州縣宜如何激發天良實力操防乃誨者諂諂聽者藐藐不知該州縣是何存心濫厠官常虛膺民社得毋深愧乎嗣後該廳營州縣務須隨時督令弁兵認真操演將每月操演等第簿按月詳送本衙門查核以憑調驗分別賞罰如仍技藝生疎定將該廳營州縣分別嚴懲決不寬貸至於派役偵探及派出弁兵大道梭巡護送行旅有事知會鄰封協力兜拏各條前章皆已明示乃此次馬賊入境來踪去跡所過州縣皆未知曉亦不合力兜拏以致搶劫頻仍犯無一獲所有

往來大道本尹堂遇有相識至京及委員出差回轅者常時詢問多稱未見我兵在道巡緝屢諭四廳轉飭州縣營弁隨時查懲至今仍如故轍該廳縣於所轄地方耳日至近何難稽查乃竟漫不經心毫無振作於前發章程如同未見於本尹堂面諭置若罔聞怠玩成風實堪痛恨况現當庫款支絀之時

朝廷不惜帑需增兵增餉地方官自應合力同心認真整飭綏靖地方以圖報稱何得仍蹈虛假惡習一切視爲具文任令兵弁逍遙巡防廢弛捫心自問其何以堪除將前次疏防馬賊搶劫及過境協緝不力之州

縣另行嚴叅外爲此札飭札到該縣迅將札飭事理  
轉飭所屬州縣將前發章程實力遵行無忘兼尹堂  
殷殷告誡之意倘敢仍前玩視定卽叅革斷不姑容  
該道聽督率無方亦干未便并將現在疎玩情形先  
行嚴查詳覆核辦毋違速速

批候補經歷潘崇禮稟

據稟稱前憲見伊困苦異常適固安典史倅滿稟請  
代理明知此缺署任指日可計酌委卑職暫行代理  
姑試是否可靠隱寄調劑之意卑職尙有七年間尋  
常拔署一次約計年內可以到班若仍由正署輪委

到班未免向隅倘再委較卑職回轅在後尋常拔署  
在先者則卑職署事更無日期且蒙前憲栽培之恩  
轉成辜負等語本尹堂接見佐雜等官於其言語舉  
止察有妥當安詳者隨時存記遇有缺出酌量委署  
該經歷竟敢遞稟嘗試希圖署缺實屬膽大糊塗本  
應嚴叅姑從寬停委二次所有尋常拔署卽行註銷  
以示薄懲卽行註冊存案

并貼官廳

飭四路廳通飭各屬示禁營兵騷擾札

照得四路營兵原爲戢暴安良而設如有兵丁向店

鋪強賒硬買及有騷擾民間情事准被擾之家將滋事兵丁捆送本地方官究治以肅軍令而安閭閻合亟示諭爲此札仰該廳立即通飭各屬出示曉諭一體遵照仍將張貼日期處所報查毋違切速

### 通飭闔屬札

竊以保甲之法所以安良善去莠民也其法以十家爲一牌牌立一長十家之內使之互相糾察不得容留盜賊其有容留盜賊者立時捕送或呈報官司均行受賞知而不舉者治以同甲之罪其或有素非安分之徒同甲不保卽另編一冊記其姓名果其過惡

昭著卽行明正刑章如過惡未稔尙可教戒者官爲  
省諭令其自新尙能改化除去另冊姓名仍入牌保  
是於弭盜之中卽寓化民之意天下良民多莠民少  
必欲就一人之耳目逐戶而糾察之是爲州縣所難  
至釐出莠民別爲一冊一州一縣少不過數家多亦  
不過數十家而止令其鄉里隨時稽察責以官役隨  
時查拏已復隨時詢訪則奸民何所容身地方自臻  
安謐事簡易行該州縣何故不樂爲也現在盜賊肆  
行不此之務而徒觀望因循未有盜案則時存僥倖  
之心既有盜案則惟恃彌縫之術或希圖苟免或拱



手聽叅失位喪名夫何所取本衙門迭經札諭嚴催  
僅據宛平甯河良鄉密雲大城五縣將章程告示詳  
叙申報嗣後辦理情形及是否一律整齊未經續報  
其房山等處僅報戶口而於保甲章程告示又未詳  
報至大興通州三河昌平永清霸州寶坻武清懷柔  
九州縣辦法既未詳報戶冊亦未齊全尤屬怠玩以  
迭次奉

旨屢經札飭辦理之事將及兩年未有成效該州縣等膽  
玩違延實堪痛恨道廳等督率不力咎亦難辭本應  
亟予嚴叅姑從寬將大興縣知縣賀瀛通州知州鄧

錫恩前三河縣知縣湛命年前昌平州知州楊因培  
昌平州知州毛慶麟寶坻縣知縣章燦武清縣知縣  
彭瑞麒前懷柔縣知縣馮瑋永清縣知縣戴儀霸州  
知州陳如瑤先行記大過三次該管道廳記大過一  
次宛平縣知縣余汝修大城縣知縣楊應枚辦理戶  
冊未齊密雲縣知縣張鵬雲於前令所編戶冊到任  
後未聞復查地方現辦情形亦未詳報均屬辦理不  
力一并記大過一次再行嚴札飭催札到該縣立即  
嚴督所屬遵照先今札飭事理一律編查保甲實力  
奉行并聯絡鄉團共資守望一甲有警各甲赴援一

制軍通詳 卷一  
村有警衆村響應仍卽宣明條令獲賊及舉告者有  
賞叅賊及縱放者有罪卽偶爾容留棲止及賣給馬  
賊飯食者亦一體嚴拏懲辦以清盜源而遏盜流所  
有前飭稽查客店廟宇及辦理保甲聯絡鄉團各情  
形速卽詳細稟復以憑察視經此次札諭之後倘仍  
不知振作實意講求或玩視不辦或空言搪塞定將  
該州縣從重叅辦決不寬貸業經開譬再三慎勿自  
貽後悔慄切毋違至各州縣有將戶口冊造齊業經  
呈解者如尙有應行叅改更正之處不妨專差詳請  
領回抽換粘貼毋庸另行更造以節經費特札

飭道廳嚴緝馬賊札

近來時有馬賊入境迭經札飭四路廳轉飭所屬隨時派役偵探有事知會鄰封協力兜拏二月間馬賊肆擾東南北三路絕無偵探會拏之處以致犯無弋獲實屬不成事體此次又有馬賊於初九日在順義縣屬大橋口搶劫過客銀衣在順河殺傷兵勇情節兇橫非痛加懲創不足以寒賊膽而儆將來現已飛飭四廳派令把總各帶兵四十名合力兜拏并知照直隸巡道官一體嚴緝現時偵探賊蹤尤爲緊要乃數日來不知賊蹤所至該地方官形同聳聳卽此可

見爲此嚴札飛飭該道廳責成所屬各派妥役迅探賊蹤合力兜剿并按日飛報本衙門知悉如任賊潛蹤及縱令竄越定將該地方文武叅革究辦決不寬貸特札

該縣迅派妥役確探賊蹤隨時具報以憑飭捕如任賊在境藏匿或令遠颺定卽嚴叅重懲決不寬貸同前稿

批南路廳稟

查通州稟報十七日有馬賊十一人自通州向南竄逸茲據該廳報稱探得該賊匪等於二十一日由文

安南竄計期在南路廳屬往來數日未聞捕拏一人  
除霸州尙有探稟外其餘一無稟報該縣等豈竟形  
同木偶毫無覺察當此馬賊橫行亟求整頓之時安  
容此聾瞶之徒濫膺民社迭經札令該州縣隨時偵  
探巡緝合力兜拏并會議緝捕章程均未遵辦全係  
官場因循惡習實堪痛恨仰卽將馬賊經過地方該  
縣等何以不偵探稟報合力兜拏之處查明據實稟  
覆該廳甫膺薦拔未可稍事顛預同干叅究懷之速  
速繳

札四路廳傳知捕盜營知悉

照得捕盜營添設弁兵原以安民戢盜茲有薊州派  
巡兵丁踏毀民地青苗與人爭鬪已屬不合復敢執  
持刀械恃衆兇毆斫斃人命實屬大干法紀已將下  
手致命人犯李魁慶按軍法處斬爲此札委該弁將  
李魁慶首級傳令四路捕盜營務必各知懍畏以緝  
捕盜賊爲要不准擾害地方如有恃衆行兇者此其  
明鑒勿謂軍法可從寬也曉諭後將李魁慶首級解  
交東路廳傳知該家屬領埋毋違

札東路廳  
札南

照得戢盜之法莫先去其窩頓是以嚴飭各州縣編

查保甲實力奉行已據該州縣等陸續稟報一律遵辦惟聞霸州永清東安固安武清一帶多有植柳地方年深茂密最易藏奸并有看樹人家棲留盜賊實爲地方之患亟須查拏懲辦以清盜源合行札飭札到該廳遵卽詳查所屬柳巷飭令各州縣隨時查緝有犯必懲并責成該地主一體巡查如有樹戶私留盜賊不卽呈送一經訪拏將該地主一并從嚴究治毋謂言之不預也將此通飭辦理詳復毋違切速

通飭札

同治四年五月初一日奉



上諭著萬青黎卞寶第密飭所屬清查保甲嚴詰奸宄以  
消患萌切須認真辦理毋得視爲具文等因欽此欽遵  
當經飛札四路廳轉飭各屬認真辦理并委正佐各  
員分往協同查辦在案查保甲之意全在稽查奸宄  
互相守望當於鄉村集鎮訪查素習公正之人畀以  
首事幫同地方官隨時稽查若有奸匪溷匿隨時舉  
報容隱者照章懲辦遇有外來棲止之人告知牌長  
牌長告知甲長首事倘有形迹可疑者稟報官長查  
拏至客店廟宇尤易藏奸自應責成店主廟戶設立  
循環簿按日呈官查詰方足以昭嚴密此等章程業

經再三札諭乃地方官并未遵辦足見公事全屬顛  
預一切視爲具文每見一札并不留心輒卽一稟了  
事積習因循殊堪痛恨今見采育巡檢等稟稱傳集  
各村總甲諭令按戶查明戶口總期無得遺漏等語  
現在辦理保甲并非考核民數所稟不運之至訪聞  
各屬辦理保甲并不親歷曉諭稽查多係傳諭各處  
總甲令查戶口彙齊後抄寫數冊朦朧詳報卽謂已  
經遵照辦理其實於保甲二字全然不講性耽安逸  
辦事糊塗莫此爲甚况總甲不過一在官地保平時  
辦事已多不可靠現僅責成若輩辦理保甲其赴鄉

時不知如何傳說并可藉此歛錢轉致滋擾無怪民間疑慮迄今數年尙未一律整齊也不知保甲果能認真辦理地面無自藏奸卽盜賊無由竊發在民間既無攘竊之虞在官府亦免疎縱之咎上下兩益何樂不爲本尹堂迭次札飭并頻經面諭無如誨者諂諂聽者藐藐該州縣榮爲長民之官責有司牧之任尙於理義未明而欲責之岌岌之氓不亦難乎重可慨也合行再札諄飭札到該縣遵照先今札飭事理并前發章程督令各屬認真舉辦須知肅清奸慝民卽自衛身家官卽自免處分現已開譬再三倘復仍

前惡習是該州縣不知自愛亦無可教誨卽予參劾  
誠無足惜凜之特札

批三河宋令稟

據稟採辦硝斤無款墊發一節已據咨神機營查照  
至保甲係地方隨時應查之事據稱現屆農忙舉辦  
非易查保甲所以詰奸究辦良莠豈農暇時方恐有  
奸藏匿農忙時便無奸可匿耶亦豈保甲之義不在  
查辦良莠必待農暇聚處按名點驗耶此理殊屬不  
解本衙門奏定章程前經札發并迭次札催面諭豈  
該令皆未之見未之聞耶此次稟稱現在趕緊商辦

一有成效卽行稟報查該令履任三河業經一載何以此時甫行舉辦足見平日地方公事全不留心沾染官場習氣浮而不實殊屬可惡合再批飭訓誡倘仍不知奮勉視批札爲具文以保甲爲故事一經按視定卽嚴叅懲辦決不寬貸懍遵切切

札兩道

本月十九日據三河縣稟報灤州客民張順在齊屯莊東被馬賊搶去銀兩一案二十一日據懷柔縣稟報工部郎中劉存爵遣抱呈報在耿辛莊被馬賊搶去銀衣一案二十三日據通州稟報舉人林夢楠等

在馬頭迤北被馬賊搶去銀衣一案二十四日據永清縣稟報山西民人張連舉等在東城廩被馬賊搶去銀物一案馬賊肆搶最爲行旅之害迭經嚴飭該州縣督率捕盜弁兵認真巡緝并札令派撥兵役隨時偵探遇有馬賊蹤迹卽由五百里傳單飛行知照鄰封并馳稟本衙門飛飭四路合力兜拏又飭該州縣會議緝捕章程嗣據會稟遇有盜賊本境鄰封聯絡一氣會合兜拏等語自應認真照辦何以此次馬賊入境由懷柔至三河通州永清并不早爲探悉飛行知照四境鄰封合力會拏亦未卽日飛稟本衙門

飭捕遲至數日始將失事之案稟報來蹤去迹全未  
聲敘是該州縣於盜賊往來毫無偵察及至失事又  
不上緊緝獲捕務廢弛至於此極實堪痛恨除先將  
該州縣叅處勒限嚴拏賊務獲俟限滿無獲再行  
叅革留緝外合行札查札到該道卽將此次馬賊由  
何處入境由何處經由該管地方何以不飛知鄰封  
及不飛稟本衙門飭捕緣由并鄰封接到傳單有無  
會合兜拏之處限五日據實查覆以憑核辦毋稍徇  
延再捕盜弁兵保專爲緝捕盜賊而設此次馬賊不  
過三人縱橫數縣尙復成何事體足見該弁兵并不

下道巡緝甚且有空食糧銀安坐家中者該管州縣漫無查察直同木偶該弁兵怠惰偷安尤爲可恨三河派巡哨弁馮玉崑前已因案摘頂著卽革去外委懷柔派巡哨弁呂殿生著卽銷去記名外委降爲步兵通州派巡哨弁王祺著先行摘去頂戴永清派巡哨弁楊玉林撤署經制外委降爲步兵均由該道親提各重責四十棍留於失事地方緝拏此案正賊有無弋獲再行核辦所有疏防馬賊經由之順義派巡哨弁耿得順卽速解轅聽候懲辦疏防各兵均飭該管州縣每兵重責四十棍卽行分飭遵照毋違



札南北兩廳大宛二縣

查本衙門前發章程四路弁兵在本營駐紮者由廳操演在各州縣駐紮者由各州縣操演營總在本營並赴各駐紮處操演哨長就地操演設立等第冊簿以備查核又馬匹每月由四路廳及各州縣驗明等第查明臆壯疲瘦分別賞罰各等語查訓練稽查廳縣皆有責成所有派在清河龐各莊等處巡緝弁兵應責令宛平縣稽查訓練派在采育禮賢孫河等處巡緝弁兵應責成大興縣稽查訓練除孫河巡兵由本轅派防外卽飭該把總將清河等處弁兵花名冊

移縣查核其每月廳營訓練仍照定章辦理至每月  
考驗等第南路除霸州尙有月報固安偶一月報其  
他各縣及北路廳所屬并不按月具報南北兩廳現  
歸季報均屬非是前經札催迄今仍未將等第報核  
從公泄沓莫此爲甚該廳縣於本衙門刊發章程及  
疊次札諭輒敢不恪遵辦理尤屬膽玩因循實堪痛  
恨合行嚴札申飭札到該廳立即遵照并轉飭所屬  
一體照章奉行并將下道護送巡緝弁兵查驗信籤  
考核勤惰由各州縣五日報廳一次由該廳按十日  
彙詳本衙門查核倘再不知振作定卽從嚴叅辦決

不姑寬毋貽後悔懍之

札行兩道四廳

前經本衙門將四路捕盜營弁兵考驗巡緝章程刊刻札發遵照辦理在案查章程內馬步弁兵除於大道梭織巡緝外仍當酌分大道與宿處所協同地方兵役一體護送行旅如宿站兵丁送至與站交替再由與站兵丁轉送下站遇從前站來者卽由該兵丁順便護送而回並製造循環木籤持赴下站交收循去環來更換爲記如有兵丁短少等弊卽由下站帶兵官扣籤查究並由地方官隨時查察如兵丁中有

偷安及短少情弊亦隨時懲辦再一概行旅仍由地方官出示循照舊章黎明放礮爲號咸至柵欄前會齊一同放行不准趨前落後其有希圖近便繞行小道車輛及騾駝貨重行旅應由地保村民卽行阻止指令歸於大道倘抗違不遵將車夫脚夫等傳究以免疎虞地方官仍隨時於要隘處所多派幹役分段偵探與弁兵互相聯絡該弁兵果能認真奉行行旅地方均屬安謐按三月一次查明獎賞一有失事先行棍責仍嚴切根究有無通賊情事從重懲辦等語該州縣果能認真稽查弁兵果能核巡護送何致路

劫之案仍復層見疊出昨有馬賊自懷柔順義三河  
通州永清一帶出沒肆行擄搶不聞有一兵護送不  
聞有一兵捕拏且下站不知上站消息任令盜賊經  
由成何事體謂州縣勤於緝捕弁兵勤於巡護其誰  
信之該道廳亦不隨時督察一味顛預徇隱何以清  
肅畿疆綏安行旅自循職分能無深慚合再申明札  
飭札到該廳查照前發章程立即督飭州縣認真辦  
理并將弁兵巡緝護送分別勤惰五日一報本廳由  
該管廳十日彙報本衙門查核毋得再容疲玩致干  
并叅重處懍遵

飛札

東路廳

聞得奉省馬賊有大股竄入熱河朝陽縣地方深恐  
該匪窺伺關口東路最關緊要合亟飛札嚴防札到  
該廳立即飛飭所屬預爲籌防互相聯絡并知照武  
營官弁一體防緝毋稍疏忽先行曉諭鄉團各嚴守  
衛倘有協助官兵剿賊立功者准給厚賞并准保獎  
實在官階其各奮勉圖功是爲至要該州縣一面妥  
派偵探隨時具報切切特札

飭道廳州縣清理發交案件札

照得現審案件例有定限不容日久懸擱茲查本衙

門發交道廳州縣審理未結之案其有二百件之多  
推原其故半由聽斷之不勤半由吏胥之延壓原被  
守候一日卽多需一日之費小民之脂膏有限差役  
之擾累無窮若非嚴札飭催勢必愈積愈多殊屬不  
成事體合行飛札飭催札到該州遵卽振作精神將  
單開未結各案逐一清理次第詳奪其有案證未齊  
者卽行勒限催傳詳查未覆者亦卽詳請咨催屢傳  
原告不到者照例詳銷以清塵牘倘該州無故遲延  
一經察出定干撤叅仍將單開各案因何未結緣由  
逐案註明先行詳報此外自理未結各案分別審斷

一體迅速清結毋得視為具文凜之切切特札

札兩道

據薊州稟報本月初二日卑職見文鎮臺面稱據探該馬賊於二十七日由遵化東南之煙園店竄入遷安所管之灤陽二十八日因喜峯口添派多兵該賊繞出鐵門關並搶去子母礮一架擡鎗二杆當在關外分水地方打夜盤等因稟報前來查此股馬賊由鐵門關逃逸難保不去而復來并恐分股竄匿爲此札仰該道查照札飭事理立即飛飭各屬一體嚴防并清查窩頓毋任偷越潛藏致干重咎再本衙門迭



經諭令州縣不分畛域聯爲一氣遇有馬賊蹤迹務各出境會合兜拏以期戮力同心共除巨害合則力厚分則力薄爲人正所以爲己此理曉然易得也偵探尤不可少如惜探馬餒養探丁工食勢必賊來不知爲患本境貽害鄰封處分加嚴後悔何及務卽通諭各州縣力湔錮習合力防緝勿存此疆彼界之心勿蹈省小失大之悔該州縣身任地方責無旁貸屢經開譬仍前昏惰事理不明卽予革叅誠無足惜該道廳若不認真督率姑息徇隱亦不免白簡之登矣  
懍之

札闔屬州縣

邇來盜劫之案層見疊出復有騎馬賊匪聚集多人  
搶掠村舍殺傷人民大爲地方之害迭經本衙門札  
諭各州縣稽查保甲以靖窩藏聯絡村團以備守禦  
現雖一律辦理而保甲尙未齊整村團尙嫌卑弱設  
遇土匪勾通大股猝至仍不足以資防緝應再申明  
札飭札到該州州立即遵照後開章程妥爲辦理嚴查  
保甲務使盜匪無所潛蹤勸辦村團務使盜賊無敢  
窺境鄰封官爲聯絡鄰村民爲聯絡聲息相通彼此  
助力則不致人寡勢單亦不虞此挈彼竄合力同心

必有成效本尹堂歷查數縣面諭村民均能欣然領悟民情可見官其勉之毋違特札

計發章程一紙

一保甲門牌註第幾牌第幾戶行業牌冊均須分註明晰

一本戶男丁不得遺漏店夥雇工名氏亦須註明外鄉人牌冊註明某省某縣人

一須挨戶十家爲一牌不得錯亂

一牌長不必拘定第一戶設第一戶係女流或匪類及十分糊塗者能充牌長耶當就十戶內詢之首事揀

派明白老成者充之於牌冊某戶上註明

一給牌長十戶總牌一張

如二戶某

責成稽查九戶所

有各牌長責成首事稽查如有素不安分者牌長不願列入本牌卽剔出另立牌冊由官查辦以省拖累

一城鄉各戶有搬去搬來及店夥雇工更換者由本戶告知牌長牌長告知首事或一月或兩月交官更換牌冊

一外來者由牌甲問明來歷方准留住倘係來歷不明卽稟官查究

一空房責成房主派人看守倘有奸宄藏匿惟房主是

問

一客店廟宇住客須立循環簿該管官隨時稽查倘有遺漏隱匿惟店主廟主是問

一嚴禁書役地保向各戶需索門牌使費

一存轍保甲冊該州縣四季領回查對如有不符者粘貼換頁不必常時造辦以節糜費

一鄰封鄰村亟須聯絡近見各州縣遇有盜賊不獨畛域太分不肯會合兜拏卽傳報信息亦屬遲誤現擬四境交界兩縣於就近村莊各置望樓一所卽用長木支架板屋所費無多上用兩人看守遇有賊警晝

則懸旗夜則懸燈并舉一號礮一聲馬蹄礮鄰封樓上  
舉礮爲應所在村莊村頭鳴鑼村尾接應前村鳴鑼  
後村接應以次遞接聲息可以直達城廂該管官聞  
聲卽出捕拏鄰封官聞聲卽出會合四面鄰村亦均  
鳴鑼齊團救應果能聯爲一氣聲勢自壯盜賊聞風  
必不敢竄入劫掠卽已有搶案四面兜截賊從何處  
逃遁自可立時就獲鄰封獲盜立予保升村民獲盜  
從優獎賞倘本縣有事鄰封觀望不前卽由本縣指  
實詳叅本村有事鄰村不出赴援卽由各村公同議  
罰以期同心合力共衛閭閻民得安居官稱良吏拭

日俟之矣

一望樓距村莊不可過遠看守之人遇有賊警放礮後  
卽行避入村內以防賊人戕害

一五十家之村總須製鑼兩面一在村頭一在村尾百  
家之村總須製鑼三面一在村頭一在村腰一在村  
尾戶多者以數酌增聲音接續方能快捷該州縣妥  
爲勸諭遵辦鑼一面計價不過京錢數千可爲十年  
八年之用若按年計之每年不過纔攤數百文民戶  
尙似易辦且鑼聲遠近易聞較報馬尤速各村及城  
中間之卽可準備防守又可齊出救援賊自不能得

手於村戶實有裨益慎毋省小失大焉

一村頭鳴鑼須得村尾接應前村鳴鑼須得後村接應  
方爲交代應發小竹牌兩枝上寫村名交給村頭村  
尾收執村頭俟村尾接應卽將村尾小牌取回前村  
俟後村接應卽將後村村口小牌取回若有不相遞  
送者卽將無牌之人查出罰處以爲考核或責成地  
保傳送如地保外出亦責成地保雇人傳送倘有延  
誤將地保重責并枷號兩月示儆該州縣各就地方  
情形酌量辦理看守望樓之人遲誤號礮亦照此責  
懲



一各村製備布旗一面無論大小遇有賊蹤所在之路村口將旗懸挂以辨方向官民帶人捕拏救應均視有旗處奔赴否則鑼聲四起無從辨別矣

委員赴東安幫同編查保甲整頓團練札

前經札飭各屬清查保甲并委員分赴各州縣幫同實力編查原期認真辦理頃據該委員朱紫欽回報銷差面詢各村情形據稱并未遍歷實屬顛預從事亦足見該地方印捕并不遵照札文實力奉行仍是敷衍故事實堪痛恨本應卽行嚴叅姑從寬嚴行申飭合再札委札到該員仍卽回赴東安幫同印佐各

官分赴四鄉逐細編查將牌長甲長及首事之人務擇妥實可靠者派令充當責成隨時幫同稽查將姓名開列具報以憑獎勤懲惰總之保甲在分別良莠團練在聯絡聲勢迭次札飭州縣辦理均已指示詳明著卽遵照實力奉行倘仍視爲具文一經按臨查出定將該印捕及委員一并嚴叅重懲決不寬貸

札東安縣

同前由

除另札委員遵照外合再札飭札到該縣立將各鄉村鎮牌甲一律編查卽派役隨同委員并轉行教捕各官分赴四鄉幫同辦理一切章程均著遵照迭次

札文認真舉辦并將首事姓名及分赴各鄉委員銜名具文申報以憑獎勤懲惰倘仍視爲具文一經按臨查出定將該縣等從嚴叅辦決不再寬懷之切切再前面諭委員於經過地方查看捕盜兵是否下道梭巡今詢委員據稱來往未見一兵該捕盜弁兵偷安懶惰地方官不隨時查懲均極可惡并著遵照前札卽行照章整頓立即詳覆速速

咨吏部

爲咨請部示事准

貴部片覆本衙門投考戶鹽科書吏朱集堂取結著

役因前吏李品重役滿懸缺日久與定章不符礙難  
核准另揀聲覆等因前來查本衙門書吏額設十七  
缺南承發科張湘於道光三十年七月初十日告退  
北承發科劉正因認充遲延於咸豐十一年十月二  
十七日准咨斥退至今並無認充之人工房趙廷璧  
咸豐十一年十二月十九日斥革工本房高慶元同  
治元年五月十九日役滿戶鹽科李品重同治元年  
九月十五日役滿禮房余雲階同治三年八月十七  
日斥革戶糧科劉萼榮同治四年四月初八日斥革  
值堂房齊文柄同治四年閏五月初三日役滿以上

懸缺南承北承工房三缺兵房趙德生代辦戶糧禮  
房二缺禮房金克紹代辦工本房一缺戶田科范英  
奎代辦值堂房現在召募得李茂林認充人署當差  
咨部取結所有懸缺均已先爲咨明俟召募有人再  
行取結著役在案至所屬治中通判各衙門書吏先  
後召募得張文元謝蘭廷等認充又因認充遲延斥  
退旋因委係召募無人所致仍請准其取結著役以  
資辦公亦在案本尹堂蒞任以來查得各房書吏懸  
缺太多以一房兼辦數房之事實屬不成事體屢經  
出示召募無人認充卽如戶鹽科前吏李品重役滿

係戶田科書吏范英奎代辦嗣係清書姚吉雲接辦  
平日並不常川到署當差公事多未妥協將其斥退  
此缺仍懸本年十一月初一日本尹堂出示招考意  
欲考取文理通順者咨部取結將懸缺一概充補以  
符定額而專責成乃僅有朱集堂一人投考出題令  
作告示文理尙屬通順卽派令先行辦理戶鹽科事  
務以示招徠復據刑房書吏邢學曾吏房書吏何恩  
奎將該吏保充遺缺經本衙門咨部轉行取結茲准  
前因自係循照定章辦理惟本衙門書吏現在懸缺  
太多迭經出示召募無人認充甫經保充一缺又復

有礙定章是懸缺愈懸愈多何以底止固屬不成官  
事尤足啓書吏把持之漸現在承發等房均已逾限  
召募無人將來卽有人投充亦違定例勢將懸缺終  
懸究應如何酌擬補足懸缺之處本衙門無可遵循  
咨請

貴部核示以憑辦理可也

札大宛兩縣

查得京城街市貼有打胎化胎字帖殊屬荒謬見係  
東裱背胡同廣濟堂東茶食胡同萬明堂磚塔胡同  
積善堂五道廟天一堂粉子胡同天和堂隆福寺西

懷德堂鼓樓西果子觀胡同對過裕仁堂此外慎思  
堂恆春堂長春堂恆德堂泰山齋德育堂均貼有此  
等字帖因思胎而不育已失天地好生之心若因藥  
墮胎致殞身命是一藥而戕兩生尤屬傷天害理伏  
讀本年二月初十日

上諭飭令各直省嚴溺孩之禁廣育嬰之仁京畿地方豈  
容此等匪徒造不經之方害生人之命查用藥墮胎  
比照毒藥殺人治罪例有專條亟宜申明成例嚴切  
查禁合行札飭札到該縣查照札飭地方堂名立即  
派役將各該鋪東嚴傳申禁勒令將造成之藥當堂



繳齊毀棄不准再行出賣并取具甘結呈報倘嗣後仍敢違禁故賣一經查出定將該鋪封閉不准復行開設並將該鋪東照例從嚴懲辦不貸該兩縣仍詳細飭查此外有無似此藥鋪及售賣春藥誘淫一併查傳示禁毋違速速

批武清縣稟

前因瓜爾佳氏一案未列月報當經飭查今據該令稟稱因查彭令未將此案開入是以查照彭令舊管各案一例開造等語是於前任漏開案件并不詳查於迭經札飭之文亦未遵照所稱奉發之案可以不

開不知奉何明諭全係任令書吏匿飾成何事體事  
關承審例限升調考核何得遷延隱漏合行申飭嗣  
後務必詳慎確查將未結各案從速訊結按月造報  
若再仍前遺漏玩忽定將該令撤參并提承吏重懲  
究辦決不姑寬凜遵切切繳

札南路廳 照飭三路廳

據固安縣申送同治四年分固霸駐防井田屯穀數  
目奏冊到府查冊開實存穀石甚屬寥寥或係前任  
虧挪尙未追繳或係屯戶借種經徵未完卽有追賠  
折銀並不買補還倉而屯戶積欠又不趕緊催徵以

致倉存多屬空虛設遇偏災卽無法賑糶一縣如此  
他屬可知若不通飭查辦何以實倉廩而備水潦除  
飭固安縣催繳存倉并分飭各廳通查所屬應設各  
倉有無虧短外台行札飭札到該廳立卽轉飭所屬  
常平社義等倉凡有前任虧挪者卽行勒限催繳民  
借者限令秋成繳還交價者趕緊買穀還倉該廳有  
表率稽查之責嗣後春秋兩季據實覆查結報以憑  
委員查驗倘敢虛匿定行叅處不貸凜慎切切  
移河北河陝南汝三道

照得候補試用州縣佐貳襍職等官分派道府州聽

候差委各員人數衆多一經出省卽歸各道府州統屬該員等歷年在外向來不來省謁見不特人才優劣當差勤惰司中無從稽考並有來去自由任意離省日久不回者亦有病亡事故竟不報明及至委署輪補到班查無其人者殊失綜覈名實之道於吏治官方大有關係茲本司到任後按日接見屬員竟有無從傳喚不知下落者亟應查明分別核辦茲將分派聽候差委各員并未經在省人員開具清摺分別咨札行查除行各府州遵照外擬合移咨爲此合咨貴道請煩查照將分道各員銜名造具清冊一分刻

日移送以憑調驗嗣後仍按季造送藉資查考並希轉飭所屬一體遵辦其未經在省各員是否出差逗遛一并通飭查復勒令即日回省聽候察看望速施行

札八府四直隸州 同前由

台行札飭札到該州府立即遵照將分州府各員銜名限文到五日內查造申送以憑調驗嗣後仍按季造送藉資查考其未經在省各員是否出差逗遛一并通飭查復勒令即日回省聽候察看限該州縣十日內查明具報毋得延擱切切

示官廳

諭候補正襟各員知悉照得候補人員在省當差凡有各項差委皆係分所當爲果能奉差勤慎著有微勞自當酌獎其有情形較難辛苦較多之事差竣無誤本司覆核屬實並當給予優敘凡以鼓勵人才杜絕僥倖也至給獎大小先後自有定章該員等但當靜候勿得居功一涉矜張便同浮躁乃近來差委人員於銷差後紛紛求請自誇勞績殊屬不知大體在該員人品既貽器小之譏於大局官方亦近寅緣之習此風斷不可長爲此諭知候補正襟各員嗣後凡

遇差委如有勞績聽候本司註冊按章給獎不得率  
行呈請如有不知檢束者仍蹈前轍卽行扣獎停委  
該員等需次省垣積資非易各宜守分勿玷官箴本  
司有厚望焉勉之慎之勿違切切特諭  
續議豫省交代章程

一借撥款項宜嚴定限制以杜新虧查續定章程同治  
三年十月以前舊案交代如係候補人員准將他人  
核准應領兵差等銀及河工近年未發實銀款項借  
撥其現任人員或甫經卸事並調補他缺者一概不  
准借撥界限甚清難容混淆惟日漸推廣卽滋流弊

近來陳欠甚多紛紛請抵何啻以現有之銀盡償陳  
欠更恐現任恃有借撥之條將年款任意虧挪希圖  
撥抵必致丁耗歲入寥寥庫藏匱絀值茲軍需浩繁  
何以堪此應請嗣後惟兵差核銷之款仍准借撥其  
自同治五年正月交卸正署各員欠解正襍款項  
卽一概不准借撥以杜新虧至本員應領款項准其  
撥抵如本任無虧並許自行移撥另任虧項概不准  
借撥他員及自抵新賦若已故並丁叅人員如有虧  
短之款或歷任交代無虧尙有餘款均准借撥庶免  
苦累而昭體恤以前節次詳定撥抵章程應請註銷



一借撥款項必須本員同呈印據方昭覈實近聞出借之員尙不知已款已爲他員抵撥仍具稟請領者又有已入交案列抵復私借與人撥抵者祇圖侵漁官項盜抵人財愾法欺朦亟須杜弊嗣後借撥之款應令出借與請抵之員概由後任互出印文方准酌撥查有弊混情事一併嚴察究審

一天津採辦木值價銀宜令承辦之員自行彌補此款續議章程由軍需局核明實係墊辦者按其報銷確數暫抵襍款定案後循照原議歸司道府捐廉歸補查順天直隸承辦前項木值捐項甚多經

直隸總督報銷請獎奉

戶部奏駁一概不准報銷並不准再行瀆請本司在  
順天府任內接准咨照有案是此款既不能報銷請  
獎卽礙難復請捐攤所有原議抵襍之處應請註銷  
飭令承辦各員自行彌補

一交代宜令照例結報嗣後卸事人員無論正署務須  
依限兩個月與後任核實算清後任查有虧短卽行  
稟揭無虧亦卽分款造冊結報不准僅恃總結朦混  
銷差如前任無虧後任遷延勒指卽行叅懲自定章  
後交代不清署事人員停委扣補升調人員不准到

命 命  
升調之任令在必行以儆疲玩而挽錮習

一交代局監交監議各員宜分別功過以昭激勸嗣後  
監議一月以內議結五十案以上監交算結三十案  
以上者卽予存記按半年一次分別等第詳給獎勵  
如一月內議結算結未經及半應記過一次記過在  
三次以上者飭令出局停委以示勸懲

一州縣未領養廉宜覈實作抵免致偏枯前准交代局  
議定嗣後各州縣應領廉銀除同治二年以後交代  
實任人員以存司未領銀兩爲準除扣軍需清查減  
平全數列抵襍款署事人員應領半廉除軍需半扣

下餘定有額數各款全交全抵其同治二年以前交代應捐各衙門冊費等項既均除免無論正署應領全廉半廉自行請領並借他人撥抵外下餘銀兩扣除軍需清查各款以七成抵襍三成抵攤等因詳蒙前憲臺批准照辦在案以存司未領之銀按數作抵原屬平允惟查各州縣養廉除攤扣軍需一成清查二成之外尙有籌防局忠節局經費委員佐襍薪水京提塘報資門軍工食以及首府縣代領各項名目紛繁每年總屬有絀無餘若憑州縣摺開約計之數核作盈餘列抵雖攤款全數列交似乎無所偏倚然

襍款須勒限交解而攤捐則從緩籌議未免使接任之員藉口偏枯應請此後州縣養廉必須稟司核明批示實有未領之項方准抵襍此外概准抵攤俾昭覈實

以上六條係因續議章程今昔異宜必須量爲變通秉公酌議其餘仍循前章辦理

挑挖路濠示

爲剴切曉諭事案蒙

撫帥札開挑挖路濠實爲制賊善法飭令會議遵辦等因照得禦寇之方天時不如地利制敵之道城高

尤貴池深現聞各該處或堅築寨牆或鄉團守助原  
欲保衛身家而賊騎衝突來往自由要路僻鄉迭遭  
焚掠總由於地勢平曠無險可防也本司等既深憫  
悼亟欲保全惟有挑挖路濠足資捍衛昨聞東省舉  
行俱有成效吾豫地當衝要尤宜合力奉行因檄飭  
開歸陳許南陽汝甯河南汝州八屬地方並遴選委  
員會同各該州縣及各村寨紳董相度地方形勢於  
所在大路通衢及旁通集鎮處所勸諭百姓趕緊挑  
挖路濠倘能妥速葺工必當破格獎勵爲此示仰紳  
民人等知悉務當通力合作一律奉行勿視爲迂遠

之謀勿靳其手足之力勿惜尺寸之土致家人莫保  
餘生勿存觀望之心致鄰里同遭寇擄工程有限裨  
益良多不惟溝渠足以遏賊氛卽水潦亦可以溉畝  
畝倘爾等不權利害妥議阻撓是自棄其田廬自委  
其身命未能喻本司等愛憐赤子委曲安全之至意  
也想爾等困苦流離歷有年所今旣一勞永逸得足  
償失未有不爲身家性命之計踴躍興工互相勸勉  
者本司等有厚望焉所有條款開列於後各宜凜遵  
毋違特示

一挑濠由各該村寨紳董相度地勢凡有進城及通各

寨大道一律挑挖如有叉路之處須搭蓋浮橋聞警便卽折毀賊去仍舊搭蓋如有傾圮隨時修葺以便行人

一挑濠宜寬六尺深七尺發土於濠積土愈多愈妙務使馬不能跳越除遇莊房塋樹須繞避挑挖之外該地戶不得妄行攔阻

一挑濠不准書差地保歛貲包辦惟在各該村寨首事鄉耆於安插段落後分段督工各挖各寨各挖各莊認真辦理自易蔽工成功後仍須隨時修挖勿使荒沙積內致棄前功



一各處鄉民貧多富少現因保衛閭閻不能不佔其地畝其地在十畝以下而佔至過半者宜令各該首事紳董酌量調劑勿使向隅其地在十畝以上至數十百畝者不得概援此例

通飭札陳許南汝光河陝汝各府州

爲通飭籌防繪圖貼說申送酌核事照得軍行以地利爲先守土以封疆爲重山川形勢必待指陳州邑輿圖悉當詳備近歲捻蹤迭擾實由突騎猖獗豫中千里平原難於扼守前示各屬挑挖路濠原期阻遏賊馬嗣據各屬陸續稟覆有因地勢平曠以挖濠爲

宜者亦有謂山川環繞無須挖濠者其中實心任事者固不乏人而一稟塞責者似亦不少該州縣身任地方事關民瘼自當力圖保衛思遏賊衝豈容玩忽苟安任賊蹂躪合再通行札飭札到該州府立即轉飭所屬各將該管地面有無山川險要村鎮幾何屯戍幾何民間堡寨幾何官道關津幾何邊境與何地爲鄰衝途與何方直達要害之區有何旁徑來往之路是否通行本境地方孰爲根本宜如何兼顧交界處所最易疎忽宜如何扼防力籌潔寇之方尤重拒馬之法卽或挑挖路濠間有窒礙亦須另籌方畧以遏

騎氛古有連大車以爲營布鹿角以爲衛或掘深坑  
陷穽或釘木椿竹籤凡以斷賊衝突固我藩籬地方  
守備似可仿照爲之各該州縣察看地勢民情速將  
籌辦機宜繪圖貼說分晰具申毋稍含混現值捻竄  
鄰疆亟宜及時籌畫萬勿遷延致貽深悔毋違切切  
通飭札

照得豫省新案交代前經通飭由該管州府就近督算  
定章限兩月結報嗣因相率遷延復經迭札嚴催展  
限封印前一律清結各在案現在前限已逾後限又  
屢查該州府所屬仍未結報亦未據該管州府隻字稟揭

實屬督算不力任令玩延除將該府州先行記大過  
一次註冊示儆外合再飛札嚴催札到該府州立即遵  
照先將<sup>某</sup>案即日勒令算清有虧則揭無虧則結並  
開具交抵清摺具報倘再任延定即併參倘卸事人  
員有虧挪等弊因耽延日久致難追繳實該府州瞻徇  
貽誤定照州縣虧挪府州扶同徇隱例着落分賠決  
不寬貸凜速慎速

命丁丁言

一

本制軍政書卷一終

男  
綏昌恭校

卞制軍政書卷二

通飭札

案照同治三年奉准

戶部咨欽奉

上諭爲政之要首在足食各直省州縣設立常平社倉國家承平留以備凶荒之用一旦有事將以爲緩急之需所以爲未雨綢繆之計者法至善也近來軍務繁興寇盜所至地方每以糧盡被陷推原其故總由各州縣恣意侵挪任令米粟空虛遇變無以倚賴又或聞警逃遁齎盜以糧以致守禦無資生民塗炭輿言及此罪有攸

歸嗣後各省常平社倉責成督撫大吏認真整頓廢者復之缺者補之隨時稽查凡官倉民倉未動之款不得變價提用至於倉穀已缺紳民捐資彌補者尤應加意保全務使倉穀豐盈以期有備無患此旨著該部迅卽通行各省卽著各該督撫將各州縣倉儲實存若干有無虧缺查明據實覆奏倘復因循玩怠任聽州縣侵漁虧缺定將該上司及州縣一併從重懲辦用示朝廷貴粟重農之意等因欽此欽遵移行一體查議繼復迭札嚴催各在案迄今總未議覆查豫省道光二十七年以前通省動缺倉穀均已全歸清查案內提補此後

因何動缺各屬又有交代冊卷可稽如係因公動用  
價存司庫屬庫不等應俟豐收之年詳請領價買補  
若係私虧卽向原虧之員隨時追繳夫儲備所以救  
荒蒼生休戚攸關該州職司表率平素既恣然不問  
迨欽奉

諭旨飭查節次行催已閱兩載之久竟無一處覆到豈皆  
未經寓目抑圖懸宕了事耶殊不可解本應委提姑  
再儘札諄飭札到該州卽便遵照確查所屬常平義  
社漕蘄等倉各實存穀若干奉文動缺某倉某項穀  
若干應如何籌買補額其私行虧缺某倉穀若干應



如何分別追賠限五日內據實妥議詳覆以憑彙覈  
詳請覆

奏此係籌備災荒起見事關民瘼亟宜預計並非查辦  
虧缺該州府無所庸其瞻徇諱飾經此次諄催倘再狃  
於積習延不具覆是直不以地方爲重此等劣員斷  
難姑息定卽委提查叅慎勿嘗試切速切速

硃標寓目速覆再延委提查叅  
批歸德守稟

據稟督同委員陳令及夏永兩縣勘估挑挖夏邑之  
響河永城之巴溝河探溯源流考諸舊案擬議甚爲

詳晰惟查巴溝河之水從前故道應由永宿交界之  
梁家壩入於宿州之南股河匯入濰河直達洪澤湖  
梁家壩曾經安徽省勘明係屬土名該處並未築有土  
壩亦無壩基西爲永城巴溝河東爲宿州南股河嗣  
因濰河高淤不能徑達改由靈璧土山湖禪堂入淮  
而歸洪澤所經水道多屬砂礫不但挑濬工程浩大  
且下游因土山禪堂等處諸水彙入不能迅速下流  
若將梁家壩與挑則上游來源更急宿境勢必漫溢  
爲害前於道光十五年經皖撫委員勘明以永遠禁  
挑咨豫照辦在案今議將巴溝河淤墊之處節節挑

挖於永城城東巴溝河南岸東大橋之下開挖口門  
穿過大路建修橋梁就地挑挖導水至杜家營另掘  
新渠使水徐迴引至白洋溝其間淤墊一律疏濬通  
入於澮達灘下游仍歸洪澤更恐上游水勢勇急永  
城南鄉有漫溢之患於口門建修石閘視白洋新渠  
水之長落以時啓閉免致偏重是不特於永邑南鄉  
並無窒礙而在宿境亦無漫溢之虞自可如稟照辦  
所估挑濬各河添修橋梁應需工價及一切雜用均  
各樽節估計尙無浮濫其新挑河身應用民地現定  
按畝給價如有墳墓亦應酌量給資令其起遷以示

體恤湖查虞夏商減水惠民巴清等溝河前於道光  
四年及十三年兩次疏濬所需工價均在各縣地糧  
內分年攤徵歸款現在各縣頻年被匪復遭水患民  
力拮据自應由司籌款興修以恤民隱至所勘夏邑  
之巴清河起於虞城並受蘭考各邑之水下游溝河  
間段淤塞蕭碭等縣均因庫款支絀奉飭緩辦尾閘  
不暢水無所歸致將申公堤冲決南灌分冲三岔河  
小引溝等處核計工大費巨姑准暫行緩辦應飭各  
地方官相度地勢勸諭紳民挑挖溝渠藉以宣洩免  
致漫溢爲患全在賢太守督率各屬隨時留意認真

經理仰卽會同姜觀察復勘妥議俟稟咨到日卽行  
籌款委解來宋由該守督飭印委各員分段集夫趕  
緊興挑刻期蒞事先將開工日期具報查考應挑各  
河工程務期一律深寬如式其建修橋梁石閘尤須  
工堅料實至新挑河渠河身隄岸更宜寬深高厚其  
白洋溝等處地當下游亦須酌量添挖毋得稍事草  
率偷減致干著賠一俟工竣卽行稟請委員驗收均  
毋違延切切另單並悉此繳所呈圖摺及水利疏記  
河圖並存

批永城陳台稟

查此案現據歸德府將會勘估計應挑各河工程情形繪圖開摺具稟現在籌款卽日委解巴批飭趕緊辦理惟查永城之巴溝河工程較之夏邑响河工段雖覺稍短而地處下游且須挑挖新渠堤岸河身均應格外高厚寬深藉資容納辦理更宜得法所擬新挑河渠於永城闔邑計之雖利於北而不利於南現於口門建修石閘將來視水之大小隨時啓閉而於南鄉毫無窒礙倘有惡棍土毫出頭阻撓儘可隨時懲辦杜家營新開河身應用民地現定按畝給價如有墳墓亦應酌量給資令其起遷遇有村莊自當設

法趨避以示體恤該署縣張令素性謙和辦事謹飭一切定能利衷商辦決不致有掣肘該員現在雖係委官究屬實任人員且平日民情甚爲愛戴呼喚應無不靈仰卽會同張令實力講求認真辦理以期工底於成俾小民得以安享樂業本司實有厚望焉毋違切切此繳

批

候選

趙懷理等呈

查該縣巴溝河之水從前故道應由永宿交界之梁家壩入於宿州之南股河匯入濰河直達洪澤湖梁家壩曾經安徽省勘明係屬土名並未築有土壩亦無

壩基西爲永城巴溝河東爲宿州南股河嗣因濰河  
高淤不能徑達改由靈璧土山湖禪堂河入淮而歸  
洪澤所經水道多屬砂礫不但挑挖工程浩大且下  
游因土山禪堂等處諸水彙入不能迅達下流若將  
梁家壩興挑則上游來源更急宿境勢必漫溢爲害  
前於道光十五年經 皖撫委員勘明議將巴溝河  
永遠禁挑咨豫遵辦在案本司前經查得宋郡地本  
低窪近年河渠淤墊以致夏永等縣頻遭水患而於  
上年爲尤重以致鄉民蕩析離居實堪憫惻當卽飭  
委該前縣陳令並飭歸德府會督夏永二縣逐一履



勘因巴溝河下游節節淤墊安省議以禁挑該府等  
悉心查勘議於該縣城東巴溝河南岸東大橋之下  
開挖口門穿過大路建修橋梁就地導水至杜家營  
另挖新渠使水紆迴引至白洋溝其間淤塞一律挑  
濬通入於漕達灘下流仍歸洪湖更恐上游水勢過  
急該縣南鄉有旁溢之患於口門建修石閘視上游  
水之長落以時啓閉免致偏重實屬煞費苦心籌慮  
周至且溯查虞夏商滅水惠民巴清等溝河前於道  
光四年及十三年兩次疏濬所需工價均在各該縣  
地糧內分年攤徵歸款本司因該縣頻年被匪復被

水災民力拮据擬卽由司籌款飭發興挑將來不復  
詳請攤徵亦屬格外體恤迺卽聞有無知愚民固執  
一己之私以謂將巴溝河下游改道利於永城之北  
不利於南擬欲藉口阻撓殊屬非是該生等身列膠  
庠應知大義事關夏商永三縣該府等會同查勘於  
地方果有空礙何肯遽議興挑靜候飭府督同印委  
各員妥爲辦理毋得附會其詞違例聯名呈瀆圖附

示

商邱  
永城  
夏邑

三縣

爲剴切曉諭示禁事照得歸德府屬之永城等縣係  
禹貢孟潞之地周禮稱爲望諸乃九州澤藪之一泉

源紛錯地勢本極低窪並有西北開封各屬坡水下  
注向賴夏永所轄之响河巴溝河爲之宣洩巴溝河  
之水從前故道應由永宿交界之梁家壩入於宿州  
南股河滙入濰河直達洪澤湖梁家壩曾經皖省勘  
明係屬土名並未築有土壩亦無壩基西爲永城巴  
溝河東爲宿州南股河嗣因濰河高淤不能逕達改  
由靈璧土山湖禪堂河入淮而歸洪澤所經水道多  
屬砂礫不但挑挖工程浩大且下游因土山禪堂等  
處諸水彙入不能迅達下流若將梁家壩興挑則上  
游來源更旺宿境勢必漫溢爲害前於道光十五年

經 皖撫委員勘明議將巴溝河永遠禁挑咨豫遵  
辦在案本司前經查得宋郡地既低窪河渠淤墊近  
年夏永等縣頻遭水患而於上年被災爲尤重以致  
鄉民蕩析離居實堪憫惻當卽飭委前永城縣陳令  
並飭歸德府會督夏永二縣逐一履勘因巴溝河下  
游節節淤塞前經安省議以禁挑該府等逐細查勘  
悉心籌畫議於永邑城東巴溝河南岸東大橋之下  
開挖口門穿過大路建修橋梁就地導水至杜家營  
另挖新渠使水紆迴引至白洋溝其間淤墊一律挑  
濬通入於漕達濰下游仍歸洪湖更恐上游水勢過

急永邑南鄉有旁溢之患於口門建修石閘視上游  
水之長落按時啓閉免致偏重實屬籌慮周至且溯  
查虞夏商所轄之減水惠民巴清等溝河前於道光  
四年及十三年兩次疏濬所需工價均在各該縣地  
糧內分年攤徵歸款本司因各該縣頻年被匪復被  
水災民力拮据擬卽由司籌款飭發興挑將來不復  
詳請攤徵亦屬格外體恤各該縣紳民具有天良自  
應感激樂從以成善舉迺聞永邑南鄉有無知愚民  
固執一己之私以謂將巴溝河下游改道入漕利於  
永邑之北不利於南藉以蠱惑要結鄉民出頭阻撓

事關夏商永三縣地方安危豈能任其爲一身一家計者置數縣之生靈而不顧耶除將興挑各河工程詳請

撫憲具

奏並籌款飭發辦理外本司不忍不教而誅合行出示曉諭嚴禁爲此示仰夏商永三縣紳商士庶軍民人等知悉務各遵照互相傳知本司與該管府縣均爲各邑消除水患起見勸諭鄉民好爲安分切勿受人愚弄隨聲附和以身試法倘有惡棍土豪愍不畏法之徒膽敢逞刁要結出頭阻撓定卽照例從嚴盡法

懲辦決不稍事姑息本司言出法隨決不寬貸勿謂言之不預也各宜凜遵毋違特示

呈 撫憲

為 詳請 移咨事案蒙

憲 巡撫部院 臺 批據署永城縣知縣張令書紳稟請擬將巴溝河改道挑挖並呈河圖俯賜批示祇遵稟由奉批查該縣地勢低窪自城北巴溝河為流沙淤墊潦水無從宣洩每年於夏秋之交大雨時行羣流東注遂成澤國以致災歉頻仍實於

國課民生兩有窒礙茲據勘議將巴溝河由縣東十里

鋪引至城南白洋溝順流入澮與開巴溝故道事半功倍從茲水有所歸永無後患自屬應辦之工惟請帑至八萬兩之多當此財匱時艱尙宜分別緩急通盤籌計仰布政司立即悉心酌議如須及時趕辦速卽遴委諳練妥靠之員會同歸德府督飭永夏二縣覆加履勘覈實確估力求撙節由司核明具詳核辦稟抄發圖發仍繳等因蒙此查此案本司前於到任後卽查得歸德府地勢低窪河渠淤墊近年夏永等縣頻遭水患而於上年被災爲尤重以致鄉民蕩析離居實堪憫惻並查永城巴溝河之水從前故道應



由永宿交界之梁家壩入於宿州南股河匯入濰河直達洪澤湖梁家壩曾經皖省勘明係屬土名該處並未築有土壩亦無壩基西爲永城巴溝河東爲宿州南股河嗣因濰河高淤不能逕達改由靈璧土山湖禪堂河入淮而歸洪澤所經水道多屬砂礫不但挑濬工程浩大且下游因土山禪堂諸水彙入不能迅達下流若將梁家壩與挑則上游來源更旺宿境勢必漫溢爲害前於道光十五年經安徽撫憲委員勘明議將巴溝河永遠禁挑咨豫照辦在案惟查各該縣頻年被水自應設法疏濬以蘇

民困未便因巴溝河下游淤墊有禁挑之議任其漫溢爲患當卽札委前永城縣陳令夢蓮並檄飭歸德府會督夏永二縣逐一履勘嗣據署永城縣張令具稟到司並奉批飭前因又復札催該府督飭各縣覆加履勘逐細確查摺節估計妥議稟覆核辦去後茲據歸德府具稟督同印委各員查勘得夏邑所轄之响河自夏商交界之焦閣起至永夏毗連之朱家橋入於永城巴溝河兩面堤岸河身節節冲缺淤墊均須修築挑挖其巴溝河前因下游灘河高淤經皖省議以禁挑若歸故道下游淤塞過深工程實屬浩大

該府等逐細查勘悉心籌畫議於永邑城東巴溝河南岸東大橋之下開挖口門穿過大路建修橋梁就地挑挖導水至杜家營另掘新渠使水迂迴引至白洋溝其間淤墊之處一律疏濬通入於澮達灘下游仍歸洪湖更恐上游水勢勇急永城南鄉有漫溢之患於口門建修石閘視白洋溝新渠水之長落按時啓閉免致偏重是不特於永邑南鄉並無壅礙而在宿境亦無漫溢之虞自應如稟興挑以消水患所估挑濬各河夫價半係給發半借民力其添修橋梁石閘各工程亦係樽節估計共需工價錢五萬四千六

百五千零尙無浮濫溯查虞夏商所轄減水惠民巴清等溝河前於道光四年及十三年兩次疏濬所需工價均在各該縣地糧內分年攤徵歸款現在各該縣頻年被匪復遭水患民力拮据自應由司籌款興挑以卹民隱正在籌款飭發興辦間接准留豫候補姜道咨奉

憲臺札飭前在會勘是否利益有無窒礙妥議稟覆  
撫憲等因遵卽馳往督同歸德府由夏邑前抵永城土庶喧傳皆喜動工有日一路察勘原籌疏濬各河段落以及在永境杜家營另開新渠引水通澮下歸洪澤

均屬確加考證規畫得宜第是爲時稍遲瞬屆農忙  
集夫爲難並慮節交夏令大雨時行添修橋梁石閘  
應需物料購辦需時惟體察民情均皆懽欣鼓舞應  
卽下順輿情趕緊興辦又復督飭該府覆勘澮河直  
達臨淮間有魚梁阻滯勒令除去通暢匪難其白洋  
溝通澮之交必須廣大寬深則衆流滙注方資宣洩  
不致壅遏旁趨該處河身酌擬加寬二丈加深二尺  
現飭陳令另估申詳其費不能無增刻當經費維艱  
未便請益自宜通盤籌計擬仍以原估工價爲準繩  
先由白洋溝杜家營動工再行挑挖巴清响河循序

漸行自下而上用人不多卽屆農忙無虞缺夫如遇  
大雨水有所歸亦無所礙原估工款果有不敷或再  
勸捐籌款飭發隨時酌量損益妥籌辦理等情移咨  
前來本司覆核無異除卽日籌款委員解往札飭歸  
德府督同印委各員刻日開工分段挑挖迅速蒧事  
一面移會開歸道覆核另行會詳請

奏外所飭委勘估擬將永城縣所轄之巴溝河改道入  
於澮河達灘下游仍歸洪澤湖以期一勞永逸緣由  
理合具文詳請

憲臺鑒核並請移咨

安徽撫憲轉飭宿州知照實爲公便

會呈 撫院

爲夏永二縣巴溝等河年久淤墊現經委勘擬請由  
司籌款疏濬改道挑挖以消水患藉賑災黎詳請

憲鑒具

奏事竊查豫省歸德一府在於省城東南所屬各縣地  
處窪下其夏永兩邑地勢更形低窪上承開封等屬  
坡水下注舊有溝河均各淤塞近年該二縣既被匪  
擾頻遭水患而於上年被水爲尤重以致農田淹浸  
鄉民蕩析離居輕則售男鬻女重則填於溝壑實堪

憫惻本司到任後卽經查知檢閱成案夏永兩縣向有响河巴溝河兩道河名雖異而水則同軌各河身因年久失修節節淤墊其巴溝河之水從前故道應由永宿交界之梁家壩入於宿州南股河滙入濰河直達洪澤湖梁家壩曾經皖省勘明係屬土名該處並未築有土壩亦無壩基西爲永城巴溝河東爲宿州南股河嗣因濰河高淤不能逕達改由靈璧土山湖禪堂河入淮而歸洪澤所經水道多屬砂礫不但挑濬工程浩大且下游因土山禪堂諸水彙入不能迅達下流若將梁家壩興挑則上游來源更旺勢必



爲患宿境前於道光十五年經

安徽撫憲委員勘明議將巴溝河永遠禁挑咨豫照辦在案惟是各該縣頻年被水民不聊生自應設法疏濬以蘇民困未便因巴溝河下游淤墊有禁挑之議任其漫溢致夏邑永城長爲澤國當卽札委前永城縣陳令夢蓮並檄飭歸德府督同夏永二縣會委逐一履勘旋據署永城縣張令擬將巴溝河改道挑挖稟奉

憲臺批飭委員會勘由司核明詳辦等因又復札飭該府督飭各縣覆加履勘逐細確查摺節估計妥議

稟覆去後嗣據歸德府稟稱督飭印委各員查勘得夏邑所轄之响河自夏商交界之焦閣起至永夏毗連之朱家橋入於永城巴溝河兩面堤岸河身節節冲缺淤墊均須修築挑挖其巴溝河前因下游濰河高淤經皖省議以禁挑若歸故道下游淤塞過深工程實屬浩大該府等逐細查勘悉心籌畫議於永城城東巴溝河南岸東大橋之下開挖口門穿過大路建修橋梁就地挑挖導水至杜家營另挖新渠使水紆回引至白洋溝其間淤墊之處一律疏濬通入於澮達濰下游仍歸洪澤更恐上游水勢勇急永城南

鄉有漫溢之患於口門建修石閘視白洋溝新渠水  
之長落按時啓閉免致偏重是不特於永邑南鄉並  
無窒礙而在宿境亦無漫溢之虞夏永兩邑去秋因  
被匪被水民力拮据詳蒙將應徵錢糧分別蠲緩並  
於今春撫卹口糧一月接濟奈民困實深聞賑歸來  
者甚衆仍屬哀鴻遍野相距麥秋爲時尙早請將各  
河趕緊興挑俾得以工代賑貧民藉以糊口將勘估  
擬挑各河工段及應添修橋梁石閘各工程開摺呈  
送並蒙

憲臺飭委留豫候補姜道覆勘咨稱馳往歸德督同

該府由夏邑前抵永城土庶喧傳皆喜動工有日一路察勘原籌疏濬各河段落以及在永境杜家營另開新渠引水入澮下歸洪澤均屬確加考證惟慮瞬息農忙集夫爲難並恐節交夏令大雨時行添修橋梁石閘購料需時體察民情既皆懼怵應卽趕辦又復督飭該府覆勘澮河直達臨淮其中間有魚梁阻滯勒令除去不難通暢其白洋溝通澮之處必須河身廣大寬深方資宣洩擬將該處河身加寬二丈加深二尺卽飭陳令另行酌勘刻當經費維艱其費未便請益令卽通盤籌畫仍以原估工價爲準繩先由

白洋溝杜家營動工再行挑挖巴溝响河循序漸行  
自下而上用人不多卽屆農忙無虞缺夫如遇大雨  
水有所歸亦無窒礙原估工款隨時酌量損益妥籌  
辦理等情移咨到司本司覆核無異當卽先後籌撥  
銀貳萬兩委員解往札飭歸德府督同印委各員擇  
日開工分段挑挖一面詳請

憲臺查核移咨

安徽撫憲轉飭宿州知照並移會

職道

覆核在案茲

本司道

等會同覆查夏永兩縣地處低窪頻遭水患

上年被匪被水實爲尤重民情困苦萬分自應將所

勘各工次第興挑藉得以工代賑實於地方民生兩  
有裨益查核歸德府督同印委各員原勘夏邑响河  
共估挑河九十四段四十五丈牽長九千四百四十  
五丈共應挑土二十二萬六千六百八十方永城縣  
巴溝河其估挑挖舊河及新渠並白洋溝計九十段  
八十丈牽長九千零八丈應挑土十八萬零八百  
九十四方查旱土每方例止八分一釐此次估挑各  
河雖係以工代賑半資民力惟現在食物昂貴且挑  
深至四五尺不等例價實有不敷應請照道光四年  
估修虞夏永三縣溝河堤堰方價津貼成案再行酌

減每方除例價外酌給幫價銀一分五釐統計二縣  
挑挖各河並建修橋梁石閘各工程共實估需工價  
銀四萬二百二十兩四釐實係撙節估計並無浮濫  
溯查道光四年及十三年兩次疏濬虞夏商所轄減  
水惠民巴清等溝河所需工價均在各該縣地糧內  
分年攤徵歸款現在夏永兩邑頻年被匪迭遭水患  
民力實屬拮据本司道等再四籌思惟有由司籌款  
興挑以卹民隱呈請

憲臺

奏懇

皇上天恩俯准將此次挑挖夏永兩縣巴溝等河所需例  
幫工價銀四萬二百二十兩四釐先在前經詳

奏截留備賑銀兩項下儘數動支下餘不敷在於隨年  
耗羨項下動用以工代賑免其事後攤徵則感沐

皇仁實無既極合將勘估挑挖各河並建修石閘橋梁各  
工程應需工價銀數開具清摺會詳呈請  
憲臺鑒核具

奏再勘估挑挖各河原請係屬以工代賑所需工價銀  
兩應請咨明

戶工二部查核歸於前請備賑銀兩案內開銷以免另



案造冊報銷實爲公便所有圖說前已呈送此案係  
藩司主稿會核辦理合併聲明爲此備由會呈伏乞  
照詳施行

委員攜帶頒發膳黃前往各屬眼同飭役張貼以杜  
積弊札

案蒙

巡撫部院李札具  
憲

奏續據勘明豫省五年匪擾及水旱歉收各屬應徵新  
舊錢糧分別蠲緩一摺欽奉

上諭飭卽敬刊膳黃頒發曉諭等因除敬謹刊刷膳黃外

查蠲緩新舊錢糧原爲矜恤災黎

朝廷曠典聞豫省竟有不肖官吏已徵捏欠每將頒發騰黃匿不張貼自應委員攜帶前往眼同飭役張貼以杜積弊合行札委札到該員即便遵照將發去騰黃告示查收卽日束裝馳赴某縣將所帶騰黃告示按號粘連親督差役遍行粘貼曉諭咸使周知務使實惠均沾毋任稍有隱匿滋弊倘該委員奉行不力查出定卽嚴叅仍將貼過騰黃處所報查毋違  
禁上控示

照得民間詞訟例應赴所在有司衙門呈訴如州縣

不爲審理或審斷不公方准赴上司衙門申理亦應由下而上不得越訴迺自入境已來披閱攔輿呈遞各詞多未在府道司衙門具控遽行越訴實屬顯違定例合亟申明例載各條出示諭遵毋得故違致干究辦凜之特示

一 律載軍民詞訟皆須自下而上越訴者卽實亦笞五十

一 律載凡越赴督撫告機密重事不實並全誣十人以上者發邊遠充軍

一 例載若未告州縣及已告州縣不候審斷越訴者治

罪

一 例載詞訟未經該管衙門控告輒赴控院司道府如院司道府濫行准理照例議處其業經在該管衙門控理復行上控先將原告窮詰果情理近實始行准理如審理屬虛除照誣告加等治罪外先將該犯枷號一個月示衆

一 例載凡有控告事件其呈詞俱責令自作不能自作者准其口訴令書吏及官代書據其口訴之詞從實書寫如有增減情節者將代書之人照例治罪其唆訟棍徒該管地方官實力查拏從重究辦

曉諭通省示

照得閩省爲理學之邦民俗敦厯儒先輩出加以  
本朝二百餘年興養立教

閩澤覃敷爾等漸漬

皇風益知向善宜何如敦崇古處滌染舊汚乃本部院下  
車以來於通省民情風俗周諮博訪竟有相沿陋俗  
出於情理之外者是豈憚於改過歟抑意存苟免未  
睹利害之切身歟誠恐爾等生長偏隅未諳例禁致  
輕羅夫憲網無末路以自新陷民於罪而刑之匪惟  
可矜抑亦不忍爲此剴切勸諭於每條示禁後分載

律例各文爾等觸目驚心當可翻然改悟經此一番  
曉諭如敢仍前怙惡復轍相尋則是不畏

王法甘蹈刑章本部院不能爲爾等寬一綫之恩也儆之  
戒之計開示禁及各律例如左

一禁健訟以息刁風也閩省不法棍徒恃刀筆爲生涯  
與胥吏爲狼狽捕風捉影逞忿肆誣一紙到官數家  
立破人益拖而益衆案旋結而旋翻風聞各屬有上  
八洞下八洞神仙及灌水案各名目此等積慣訟棍  
除本部院明查密訪務獲究懲外其閒無知鄉愚亦  
復飾詞瀆控往往以睚眦之衅積訟成仇報復不休

家產兩敗損人而已仍不利洩忿而仇且滋深愚悖如斯誠堪痛恨在唆訟者極力慫恿不過從中簸弄攫微利以肥身家豈知不義之錢財悖而人亦悖而出幾見訟師之後裔昌其子以及其孫報應昭彰是宜猛省况

國法之森嚴乎查律載誣告加三等治罪受雇誣告者與自誣告同雇人誣告之人照設計教誘人犯法律與犯法人同罪原告之人未起意誣告係教唆之人起意主令者以主唆人爲首聽從之人爲從如本人起意欲告而教唆之人從旁慫恿者依律與犯人同罪

有贓者計贓從重論

一禁溺女以重生命也閩省土瘠民貧生女往往溺死  
推原其故一由家道之貧苦撫養無貲一由風俗之  
奢華賄匱過費不知孩提衣食需費幾何婚嫁有無  
惟家是稱况生女而孝得力且勝於男抑天道好生  
殘忍必降之罰查各屬設立育嬰堂收養棄孩雇人  
乳哺誠爲閩省之一大善舉第恐辦理不善流弊滋  
多更虞經費有常搜羅未廣爾等公正紳士所當實  
力化導痛挽頽風倘能量力捐輸添設分局本部院  
當隨時給予獎敘其實在辦有成效捐貲數多者立



卽

奏請

賞給官階職銜以示鼓勵夫禽獸尙知舐犢螻蟻亦且貪生嬰孩何辜而輒置之於死地是卽律文中之故殺子孫矣查律載故殺子孫者杖六十徒一年

一禁火葬以懲凶悖也葬者藏也終也所以藏幽魄終大事仁人孝子之用心其如何周密也乃閩省陋俗有格於葬費而遷延者矣有惑於風水而移掘者矣其尤甚者惜一棺之地焚已死之屍火烈上炎枯骸迸散死屍於火中起坐筋骨爆裂劈拍有聲子若孫

夷然旁觀以爲相習成風無足怪也誰非人子誰無  
父母試思爾父母在日爾身之疾痛疴癢何等操心  
爾身之肢體髮膚何等愛惜而乃以殘酷之行酬罔  
極之恩以梟獍之心冀渺茫之福實神人所共憤

王法所必誅也查例載愚民惑於風水擅稱洗筋檢筋  
名色將已葬父母及五服以內尊長骸骨發掘檢視  
占驗吉凶均照服制以毀棄坐罪幫同洗檢之人俱  
以爲從論地保扶同隱匿照知人謀害他人不卽阻  
首律杖一百子孫毀棄祖父母父母屍骸者皆凌遲  
處死毀棄總麻以上尊長死屍者斬

一禁淫祀以正人心也閩俗好巫所在有廟其所祀之神不見經文不列祀典不識是何名姓不知創始何時如張八公五顯神齊天大聖等類怪誕離奇荒唐悠渺鄉愚酷信崇奉奔走若雷一疾痛之微而謂遭神譴一飲食之細而慮瀆神威每逢賽會之時酒醴犧牲旗幟儀仗各競新巧務極奢華其間男女雜沓曳袂連肩濫供佈施之錢實啓盜淫之漸傷風敗俗有害於人心世道者豈淺鮮哉亟宜禁絕以遏異端查律載不當奉祀之神而致祭者杖八十婦女入廟燒香答四十罪坐夫男無夫男者罪坐本婦師婆等

項燒香聚眾僞修善事煽惑人民爲首者絞端公道  
士異端法術醫人致死者絞未致死者杖一百  
一禁賭博以務正業也開場放賭無賴成羣設局抽頭  
引人爭利自來壞心術而敗家貲者惟賭爲最甚此  
間外來茶客及他貿易各商去鄉井逐負販求什一  
之利爲事畜之資乃一人賭場咸遭局騙及至孤注  
旣空罄貲本以償博債繼以饑寒迫體結敗類而啓  
非心於是流爲乞丐爲盜賊者有之矣惟此賭局實  
爲禍階亟宜嚴拏痛加懲創查例載閩省花會起意  
爲首者發邊遠充軍夥同開設者杖一百流二千里

在場幫收錢文等犯杖一百徒三年仍各盡本法先行枷號三個月被誘入會之人俱枷號三個月杖一百如另立名色誘賭聚衆三十人以上與花會名異而實同者均照此例辦理造賣紙牌骰子者發邊遠充軍販賣者杖一百流二千里開場誘賭者初犯杖一百徒三年再犯杖一百流三千里輸錢者據實出首免罪仍追所輸之錢給還賭博者財物房產均入官

禁營棍以肅戎行也各屬分立汎地專設營兵所以盤詰奸人護送行旅無事則操演技藝武備常修有

事則邏察巡防守望相助定制何等妥密風聞各屬營汎往往有庇賭包娼架訟訛詐等事及至告發有人又復抗傳藐法推原營規之不肅實由營弁之包徇似此倚勢橫行實屬大干法紀除行文各地方官不時查拏外併責成該管將弁認真操防嚴加約束倘仍犯有前項情弊一經發覺定將該兵照例懲辦併將該管將弁從重叅劾查例載閩省花會汎兵庇賭問擬邊遠充軍賊重於本罪者計贓從重論

一禁窩主以清盜源也閩地山路崎嶇草木叢雜灘河湍急上水行遲匪徒藪伏爲奸搶劫之案層見疊出

其濱海各屬洋面賊船盜艇嘯聚出沒飄忽無常大  
爲行旅之害顧念盜風之日熾實由窩盜之人多窩  
以盜爲財利之源坐地分贓事事必爲其接濟盜以  
窩爲逋逃之藪宵行晝伏在在皆可以潛身是在地  
方文武密訪窩藏隨時搜捕與夫公正紳耆力行保  
甲挨戶稽查凡有外來面生可疑之人立即驅逐出  
境絕其托足之區遏其銷贓之路無匪不獲有犯必  
懲庶幾盜風其永靖矣查咸豐十一年刑部奏定章  
程凡窩藏強盜之家造意共謀行而不分贓及分贓  
而不行照本律擬斬若雖非造意亦不同行分贓但

知係強盜而窩藏不論窩留人數多寡并不上盜未  
得財但爲賊探聽事主消息通綫引路者亦均照強  
盜窩主本律問擬斬決如有窩留聚衆持械入室搶  
劫并在途在野江河湖港持械肆掠者均照此嚴定  
章程辦理

一禁械鬪以息爭端也睦婣任卹理所宜然好勇鬪狠  
古稱不孝乃閩省惡俗往往以田土細故口角微嫌  
彼此糾衆逞兇兩造互傷多命地方官彈壓不服甚  
則敢於反戈及至大兵捕拏自知情罪重大挈家亡  
命終身不還鄉土產業盡付他人其實在不能遠離



者又或買囑頂兇上下打點就使倖逃法網而耗於衙門費用及棍徒訛索錢文家資業已蕩然後悔已無及矣况今日仇殺之人非其鄉黨卽其宗族人情於離鄉背井遇故舊而倍覺情親祖宗於遠裔傍支一回溯而無非同體何以日在目前而忍推刃相向窮凶極惡喪心病狂伊戚自貽誰之咎歟查例載福建糾衆互毆之案審係預先歛費約期械鬪糾衆仇殺者主謀糾鬪之犯絞立決以次遞加至斬決梟示以上示禁八則並援引律例明文皆

國家現行之科條關閩省由來之積弊本部院不憚苦口

勸諭諳諳爾等亦宜各發天良痛自猛省庶幾戒之  
在鬪而偶居無猜當思訟則終凶而紛爭永息葬親  
以禮不惑於禁忌之談生女勿悲益感召和祥之氣  
從此賭風漸戢而淫詞節靡費之財行見軍政嚴明  
而暴客絕潛藏之跡蔚爲美俗上答

皇仁易俗移風曷勝厚望倘其執迷不悟稔惡如前則殺  
人以救人本部院止知以律科罪在知法以犯法爾  
等亦難云不教而誅矣各宜凜遵毋違特示

飭取州縣輿圖札

照得州縣爲親民之官地方有守土之責凡在官是

土者山川道里必得周知城市鄉村皆須親歷庶幾  
邊疆錯壤犬牙以分指掌輿圖螺紋可數近年官書  
失修地理不講志乘等諸具文圖經更從闕略本部  
院忝任封疆職在斯土訪聞省志久已散佚志旣如  
此圖概可知然而按籍而求之虛不如循名而覈其  
實各該州縣身膺民社責任地丁四封之內有版則  
必有圖一邑之形分繪自能總繪要在各按方面臚  
列成編然後開卷了然全圖在目豈有名知州而不  
知一州名知縣而不知一縣之地者乎爲此札飭該  
府州立卽轉飭所屬將本州本縣境內管轄之地山

川形勢城鄉近遠村鎮大小塘汎幾何道里若干有無名蹟併新舊建置一切詳細情形繪圖貼說務將四至八到與何地鄰界分晰註明計里畫方繪全圖一幅申送到院以備查核該州縣等亦可藉此知錢糧科則之所以分戶口差徭之所以別以及宵小窩藏之區商賈輻湊之所農田水利孰爲優山場木植孰爲廣一一如在目前不獨於詞訟大有裨益卽保甲緝捕諸事均於此有把握焉勉之勉之是所望於良有司留心民瘼實事求是者其各凜遵毋忽切速切速

通飭結案札

查例載州縣及有刑名廳衛等官每月自理事件作何審斷與准理拘提完結之月日逐件登記按月按冊申送該府道司督撫查考等語立法至爲周密乃該州縣廳等日久視爲具文並不按月申報或奉嚴催始擇數案開報塞責以致積案纍纍文卷愈多人證愈衆官旣憚於清理胥吏任意遷延小民羈候失業拖累之苦不堪言狀殊非父母斯民之道本部院前在順天府尹任內申明例文立月報法督飭各屬清理積案分別勤惰立予勸懲行之頗效茲蒞閩省

訪聞訟案較多積壓尤甚亟宜督率清理庶可少息  
訟端挽回風氣爲此札飭該管道府轉飭各廳州縣  
立將訟案清釐已前積壓姑不深究現在承審未結  
各案分別新舊若干逐一書寫案由註明月日卽行  
申報嗣後每月將已結某案未結某案新收某案載  
明若干起數按月摺報以憑查核如有隱匿不報或  
所報不實一經察出除本員叅撤外並提承吏嚴懲  
決不寬貸至看管人犯其應行看管者務須將姓名  
懸牌明白曉諭如不在牌示之人妄行看管者卽係  
書差舞弊私押該州縣等卽即將舞弊之人盡法懲

處毋稍迴護亦省拖累之一法也其各懍遵毋違切切

札布政司

照得設官分職吏莫重於親民爲缺求才人本難於求備大凡實缺人員旣拜真除卽有專責慮及厯官之久遠益知擔任之非輕故能實力實心勤勤求治卽有一二不職者玩視民瘼曠廢官常劣迹一彰不難立予叅劾厯觀往世無不以久任州縣爲致治良規誠以厯任旣深則感孚自捷民旣積久思化如以子弟事爰兄官亦視國如家不以公府爲傳舍移風

易俗明效可徵今縱不能久任而奈何以實在之地  
方視權庖爲故事需次壅滯人地虛懸殊非整飭吏  
治之道查閩省同通州縣七十九缺署事竟有五十  
六員佐雜一百七十餘缺署事者幾及八十員之多  
披覽官冊深爲詫異其在署事之賢者或恐修名不  
立任一日之職尙思盡一日之心而在巧滑之徒以  
爲瓜代有期整頓地方徒利後任不問民生之休戚  
急圖腹削夫脂膏夫任事淺則處分可避更替速則  
交代益煩迎送頻則吏胥亦擾弊端種種更僕難終  
實屬不成事體合行札查札到該司立將實缺正佐



現經撤任及未飭到任各員是否才力不勝抑係別  
有劣迹一一註明詳報以憑核辦其未補正佐除應  
候部選各缺外至積有三十一缺地方緊要豈容員  
缺久懸且截缺時日既有遷延班次後先易滋淆混  
尤足啓書吏高下之漸所有各缺未經序補之故仰  
并查明一一具復勿延爲要

通飭宣講札

爲頒發

聖諭廣訓衍一書飭令隨時宣講以化民俗事照得  
聖諭廣訓垂戒愚民至真至切近來地方官僅於朔望期

內會同學官在明倫堂宣讀一次無論聽者之有無  
祇爲奉行之故事化民成俗之謂何殊負

先聖立戒之至意茲查有

聖諭廣訓衍一書專爲愚民聽講而設書中衍說明白盡  
人可曉先行發去若干本仰該府立即分飭所屬州  
縣會同學官選擇地方端正矜耆每月定期某日在  
城鄉市鎮人煙稠密之地認真宣講務令愚民感化  
婦孺皆知所有宣講日期該州縣按月將某人在某  
地宣講幾次分晰開報如有認真開導善爲說辭或  
能化莠爲良勸善改過一鄉有是則可變一鄉之俗

一邑有是則可變一邑之俗既積習之能除卽移風之可卜果其著有成效由該州縣稟府核轉本部院覆查無異定將宣講之人給予獎叙該州縣及學官於宣講時加意鼓舞俾百姓聽言易入風氣蒸蒸日上本部院定當覈實

奏獎督率之道府一併請獎其各實力奉行共圖上理無違特札

按察司詳遵議勘報命案章程批

命案總以勘驗爲憑是實是虛當場指辨何致任其誣捏拖累多年皆由地方官懶於往驗日久生出無

數波瀾也又被告兇犯須令指穴心明確聞省州縣往  
往憑屍親報詞開列多名甚至屍屍僅一傷亦稱被兇  
犯某某等毆傷又或初報并無是名後呈隨意添列  
殊不知一經牽涉受累無窮爲屍親者或挾嫌指控  
或藉屍羅織甚或賄脫正兇誣陷無辜何所不有奚  
可不加體察耶似卽轉飭嗣後辦理命案屍親呈報  
之初卽令將屍傷見證兇犯一一供明不准游移立  
時馳往相驗毋稍耽擱當場尤須辨驗的確如此辦  
理真偽自見拖累無從卽審辦亦易爲力也餘如詳  
飭遵

札按察司

照得各屬詞訟案件本部院履任後卽經通飭按月分晰開報在案迄今三月之久除永春州廈防廳閩清屏南歸化邵武南靖大田各縣及延平府屬六縣具報外其餘未據開報可見該州廳縣於公事漫不關心疲玩性成實堪痛恨合行札飭札到該司立卽查明將並未開報之各州廳縣均記大過三次該管府州本有督率稽查之責平日既不留心考察於奉文飭辦之件又不實力查催不知表率者在亦應各記大過一次該司卽移會藩司逐一註冊分別飭

遵一面仍由司速飭遵照限交到十日內一律查開摺報倘再遲延定行撤叅至福甯林守漳州張守均係甫經赴任應將舊任記過併卽知照毋違此札查倉庫通飭札

照得各屬倉庫銀穀絲粒皆關

國帑均須實儲不容稍有虧挪閩省各屬州縣倉庫應存銀穀是否俱係實儲有無虧短情弊本部院履任後卽經札司移行各道府州確查據實揭報在案至今覆者寥寥查倉儲爲備荒要務前於同治三年正月二十九日內閣奉

上諭爲政之要首在足食各直省州縣設立常平社倉國家承平留以備凶荒之用一旦有事恃以爲緩急之需所以爲未雨綢繆之計者法至善也近來軍務頻興寇盜所至地方每以糧盡被陷推原其故總由各州縣恣意侵挪任令米粟空虛遇變無所倚賴又或聞警逃遁贗盜以糧以致守禦無資生民塗炭興言及此罪有攸歸嗣後各省常平社倉責成督撫大吏認真整頓廢者復之缺者補之隨時稽查凡官倉民倉未動之穀不得變價提用至於倉穀已缺紳民捐資彌補者尤應加意保全務使倉穀豐盈以期有備無患此旨着該部迅卽

通行各省卽着各該督撫將各該州縣倉儲實存若干  
有無虧缺查明據實復奏倘復因循玩怠任聽州縣侵  
漁虧缺定將該上司及州縣一併從重懲處用示朝廷  
貴粟重農之意將此通諭知之欽此欽遵久經行司移  
飭查明詳辦在案查閩省各府州縣間有曾遭兵燹  
原存倉穀或被匪焚燬或軍需案內碾濟兵食事所  
不免其完善地方究竟是否照數存儲有無虧缺情  
事亟應確切查明台特專札飭查札到該州府立即遵  
照尅日分飭所屬各縣查明何縣倉儲原存穀石若  
干有無挪動現在尙存若干挪動之穀現在作何設



法彌補逐一據實聲復其遭匪各縣如倉廩已被燒燬穀石已成無着今應如何設法修復該府州不妨各抒所見議擬稟聞事關地方要務毋稍瞻顧隱諱切切特札

札布政司

續前稿

除分札各府州遵照

云

瞻顧隱諱外合併札行札

到該司卽速一體札催查復辦理毋遲

札鹽法道

續前稿

照得省垣遇有青黃不接之際米價昂貴撥動義倉穀石碾米發糶原設義倉存穀無多經

周前護院奏明籌款購運增廣義倉以備民食在案查倉儲爲備荒要務前於同治三年正月二十九日內閣奉

上諭

云欽此欽遵久經行司移飭查明詳辦在案現在

義倉存儲穀石共有若干合行札飭札到該道立即查明刻日詳覆察奪毋延

據福州府詳大湖縣丞陳世奇墊解錢糧請准列抵交代批司詳覆

福建錢糧積弊甚深年年套搭轉轉每到奏銷勢不得不得不挪新掩舊敷衍搪塞如大湖者想斷不止一處

是以前囑該司設法挽回以期年清年款迄今未見  
議有章程茲據詳前情仰布政司查議詳覆併妥議  
各屬上下忙徵解章程以挽積弊切切

札布政司

照得閩省實缺人員未赴本任者甚多實屬不成政  
體查有准升馬巷通判洪麟綬准調閩縣陳星聚龍  
溪縣章鳳翎詔安縣羅運端長汀縣唐建鏞又准補  
水口縣丞黃蘭楓亭巡檢何懋鴻侯官縣典史孫瀾  
甯化縣典史梁嶽鍾均係實缺人員應飭各赴本任  
以專責成又大田縣趙立德按經歷錫桂營前縣丞

李士超南日縣丞朱元達星村縣丞張璘富嶺縣丞  
湯有祥永利里縣丞李時英南台主簿曹樹和溪巡  
檢李芬高才坂巡檢曹晉墀北團寨巡檢張惟翰建  
陽縣典史李裕以上十二員察看能否勝任卽具考  
甄別合行札飭札到該司卽速分別辦理毋稍違延  
切切

南日縣丞稟拏辦南日匪類並呈繳軍器

據稟已悉仰按察司飭卽查拏在逃各犯務獲解辦  
並將保甲事宜實力編查切勿有名無實至地方不  
逞之徒業已嚴行懲辦該地方官亦須潔已奉公認

真整頓方能無愧斯民併飭懍遵此繳

藩司詳奉札前送官冊并未分門別類行令另造請示

查官冊一項頭緒分繁查造爲難然必須提綱挈領方有眉目如知縣一途其班次曰正途曰勞績曰試用何班補用幾人後再用何班幾人例有定制卽可照此查造應將正途勞績試用各列爲一門惟各班之內更有出身花樣之不同譬如正途一班內有進士卽用者有舉人大挑者有截取舉人分發者名目不一如應歸正途一班者卽照例歸入按各員應補

缺先後挨次開列並將科分名次到省月日於銜名之下註明後有事故不准序補者籤紅以記之勞績等班以此類推又委署一項與補缺不同應另造一冊查造之法於冊首摘敘簡明輪委章程將應委員名照輪委先後次序開列因事停委者籤紅以記之提前委署者亦書紅籤明與例不合之員另爲一門至履歷冊又須另造但此冊繁多翻閱不便或於冊首照書目之式將員名挨次開明復於各員之首頁貼紅書名以別之似此自可一目了然也知府同通佐雜各冊倣此辦理仰卽遵照趕緊造送該司前送

官册卽如知縣一項將正途試用勞績前後雜敘何得謂之分門別類總由司書不耐於事存心含混以圖高下弊弄殊不知一勞永逸該司易於查察亦何憚而不肯督成哉

### 札稅釐總局暨各屬會議裁併稅釐分局

照得抽釐助餉本係萬不得已之舉現在捻逆雖平而秦隴猶氛尙熾滇黔賊匪未平仍須籌餉協濟并本地善後水陸防勇一時未能盡撤需費甚繁所有閩省釐金礙難減免惟分局分卡每年收數甚微者無濟於事有累於商亟應早爲裁併合行札飭札到

該局司道併轉飭各總局委員立即遵照會同地方  
官酌度情形或裁或併速議詳覆其分局委員應責  
成該總局隨時訪察有未能得力者即行密稟撤委  
如稍徇隱一經發覺定卽一併查叅務使釐金涓滴  
歸公勿使稍有侵蝕凜之切切

司覆霞浦縣請發制錢收繳大錢一案札飭再議  
據該司申稱據霞浦縣湯箴衛具稟甯郡行用大錢  
民情困苦請發制錢收繳倘無制錢卽發番銀亦可  
按照錢價申算辦理等情奉院批司核議等因本司  
遵查錢局停鑄已久省中制錢尙難周轉勢不能再



行撥發且該府大錢行用多年初不聞有窒礙所慮  
奸民私鑄攙和買賣未能劃一市僧壟斷折扣致有  
阻滯應令照舊搭用官民出入公平嚴禁私鑄短折  
俾城鄉利用流通期無阻滯未便輕議收買除呈覆  
督憲暨行福甯府霞浦縣遵辦外合就具覆等由到  
本部院據此查現聞福甯府百姓大爲錢法所累闖  
闖蕭條極形困苦似未可置之不議省中制錢雖短  
能否酌量搭放番銀俾資周轉合行飭議札到該司  
立即遵照再行悉心妥議詳覆察奪切勿率延速速  
札漳州府

據漳浦縣開送本年八月分已未結詞訟案數清冊呈核前來查核現冊雖據分列四柱開報唯冊內僅將本年七月起具呈之案造入其六月以前各舊案匿不造報卽如開除項下徐盾一起係本年四月具呈查舊管項下并未開列足見積案不止此數辦理殊屬含混昨經本部院訪聞漳屬各廳縣積壓詞訟爲數甚多有至千餘起及數百起不等各廳縣摺報率皆不實業經特札該府澈查據實開報在案合再札飭札到該府立即遵照先今札指澈底確查所屬各廳縣未結新舊詞訟實在各有若干起據實分晰

開摺稟送核奪並飭將收審日月挨順開明以便查核一面督屬認真清理應息銷者卽行息銷應審結者速行審結以清積牘而省訟累併飭取承吏並無遺漏隱匿切結呈送該廳縣倘再漫不經心開報仍有不實一經察出定卽從嚴撤叅併提承辦吏胥來省究懲該府督查不力併干未便凜遵切速特札札漳州府據實開報在案除再札行漳州府遵照云云併干未便外合併札行札到該司立卽一體飭遵毋延

善後局會詳請示籌解買米運津經費人員可否擇

尤保獎

查閩省運米出力各員已咨由

船政衙門酌核會獎至購辦運津米担經費先經借撥輪船款項備用陸續由局解還船政歸款無非係各屬釐捐解收彙撥據稱該局湊成鉅款在局辦事人員究竟如何盡心籌畫該司道既經詳請獎勵自必確有所見仰卽將局員等如何籌畫始克得此鉅款緣由據實稟覆以憑核獎仍錄報督部堂查照併候批示繳

南靖縣書差有與紳民聚眾械鬪彼此殺傷斃命一

案札兩司

照得本部院訪聞本年八月間南靖縣書差有與紳民聚衆械鬪彼此殺傷斃命一案地方械鬪已屬兇悍惡劣之習何況書差該縣令未能彈壓緝辦與尸居何異該管道府相距百里何以毫無見聞迄今兩月未見隻字稟及真堪怪異合行札飭札到該司立卽會同藩臬司移飭漳州道府限文到五日內迅速據實查覆一面嚴督該縣勒拏糾鬪兇要各犯悉獲究辦併將傷斃人命驗填通報該道府倘有徇護別經察出定卽

決不寬貸併卽飛速行知毋得

刻延

台灣道府稟遵札查覆彰化縣民逆倫重案先今督  
飭分別懲辦

查林得被抱養子林歹殺斃係上年九月間事又林  
柳誤傷其母林余氏殞命係本年四月間事既知道  
倫之案地方官併無處分該縣未得沛何故遷延日  
久諱匿不報迨經飭查始據將獲犯審擬就地懲辦  
緣由稟報道府此等重犯例應解省卽謂彰化至省  
遠隔重洋通稟請示未爲不可况臺郡相距非遙何  
以亦不報解耶該犯等究係何日正法又未據切實

聲明種種含糊實屬荒唐已極尤難保無借盜銷案  
情弊仰按察司會同布政司速飭接署縣王文榮再  
行查訊明確據實逐一稟覆併由司詳揭請叅至林  
得林余氏屍身久經殮埋自可毋庸啟檢以免蒸刷  
之慘併卽移飭該道府知照仍錄報督部堂查核併  
候批示繳稟抄發

籤按察司駁羅寶仔一案

據該司審解沙縣民羅寶仔致傷鄧張氏身死一案  
人招到院經本部院提訊犯供與司招雖屬大略相  
同惟查已死鄧張氏年已四十有二該犯羅寶仔僅

年二十二歲年長幾倍其通姦已屬可疑在該犯落  
膝初供本有順取房內布裙一條銅錢五百文之語  
與屍夫報詞無異本部院現審亦據供認在廚房爭  
毆砍傷鄧張氏倒地後在另間房內取得銅錢布裙  
而逃等語該犯果係前往續舊因索錢未給互罵爭  
毆奪刀疊砍鄧張氏多傷倒地自必驚惶無措唯恐  
逃之不速曷敢復赴房內攫取錢物既取錢物足見  
該犯亦屬貧窘鄧張氏現有布裙銅錢何以轉向該  
犯索錢使用情節尤覺不合所供通姦及爭毆起衅  
各情皆係該犯一面之詞此外別無一人指証既戕



其生而又加以不潔之名死者其能瞑目乎察核案情難保非搶竊拒捕捏供避就罪名出入攸關不厭詳慎合行籤飭籤到該司立再提犯細心研鞫究明是姦是盜務得確情錄取切供妥擬另招解辦毋稍率延切切

藩司詳聞省各處應完七年分錢糧查議章程併擬各屬月報摺式

查來詳於上下忙截數議以加嚴則奏銷自可稍寬其持論頗較前詳爲周密所擬摺式亦是惟所云接任之員查明到任久暫分別核辦數語意猶含混若

使甫經到任人員仍屬吃重揆諸事理尙未平允事關定例不厭詳慎仰布政司將如何分別久暫之處再加切實妥議以期允協並將該司前飭各府州確查所屬辦理情形飭催查覆併令分報本部院察核仍候督部堂批示繳摺存

壽甯縣稟委員馬令現因患病稟請晉省就醫所有歷年積案均經訊明分批招解請勿另行委員下縣據稟已悉仰按察司查明轉飭知照至州縣官於應行招解命盜各案每存畏難之見總由於使費太多以致延擱不辦在州縣固屬非是而此等陋習亦須

革除該司弁卽通飭各屬查明凡審解到省之案每  
案犯一名應用使費若干據實開摺呈送察辦勿得  
容隱飾延暨候督部堂批示繳

札善後局司道

照得編查保甲疊奉

諭旨認真整頓省垣人煙稠密行旅絡繹尤應實力奉行  
以杜奸宄先經本部院諭令設立十家保委員會同  
局董按段挨查分給門牌造具保甲戶口數冊呈核  
復經派員抽查茲據查過閩縣東一段華林鋪起至  
倉角鋪止共十鋪諸多舛錯遺漏將冊粘籤呈覆甫

查三百戶卽有一百五十戶舛漏不符不知保甲局  
委董所司何事平日坐耗薪水此次辦理門牌等項  
領款又復不少乃仍視爲具文任意搪塞殊堪痛恨  
合行札飭札到該局司道立即查明總辦委員及東  
一段委員職名先行詳請記叅一面責成分段委員  
督率各段董事再行逐段詳細復查有舛錯者速卽  
更正每段經查委員各出具復查實無舛漏押結呈  
送以便親臨抽查核辦毋再率忽致干嚴叅不貸凜  
切凜切

札布政司查請旌節烈婦各案因何耽延

一 傳定正言 卷二  
照得本月二十四日據該司具詳永福縣節婦侯張氏一案二十五日詳霞浦縣節婦王江氏一案同日又詳古田縣烈婦丁林氏一案呈請

題旌前來查

旌表節孝前於同治三年間本部院在順天府府尹任內曾經

奏准通行由該州縣徑詳辦理何以閩省迄今并不遵辦仍由府司核轉且此三案該司具詳又在封印以後本年舉報節孝

學院衙門業已彙題自不得不入下年彙辦中間若

有疾病死亡則數十年守節之婦竟不克親見褒揚  
未免隱恨何以廣

皇仁而勵貞節合亟札查札到該司立即查明此三起節  
烈婦女該府縣係於何日詳司何以司中早不詳辦  
竟遲至封篆以後始行轉詳以致本年底不及彙題  
又前據詳題長樂縣壽民黃清根一案係同治二年  
正月間接准

部咨飭查又何以直至本年十月始行由司詳題究  
係何處壓擱耽延一併切實具覆一面通飭各府州  
轉飭所屬嗣後舉報貞節婦女各案務即恪遵

奏定章程卽由該州縣徑詳

學院督撫院移辦毋庸再由府司加看核轉致有壓延併飭將遵辦緣由專文報查毋任司書弊混飾延切切此札

札臬司催命盜已獲犯各案趕緊審辦

照得各屬承審命盜各案例有定限前因辦理軍務各州縣應行審解之案率多積壓陳陳相因以致審限難以聲扣現經本部院據實奏請從新立限卽使仰蒙

俞允寬典未可屢邀所有各屬已獲犯未解勘命盜等案

亟應速行清理辦結以符例限而免淹禁合行札飭  
札到該司立即嚴催各府州嚴督所屬各廳縣迅將  
命盜已經獲犯各案趕緊提訊確供分別按擬解由  
府司審轉核辦毋再仍前壓延致干嚴議其自理詞  
訟並卽隨審隨結按月冊報勿得拖延滋累并飭將  
遵辦緣由專文具覆切速切速

善後局詳飭令汀州府會同委員候補縣徐承禧建  
倉購穀

查汀州府屬籌買倉穀續據延守具稟議於紳民有  
穀十担者勸捐一担其建倉之費飭縣設籌不動正



項併查長汀埠有民食鹽一款已買穀二千五百餘担等情當以加一勸捐似未妥協批局核議在案自應併案妥議詳辦未便僅就該府前稟查議仰卽查照先今批指彙核籌議具詳察奪仍候

督部堂批示繳

桑棉局委員報西北湖傍城官地收回裁桑議給價銀札布政司

據桑棉局委員金延仁申稱竊照西北湖傍城一帶官地經憲飭侯官縣會同本局紳士委員前在勘驗丈量弓數以六分歸局栽桑其餘四分仍還種菜計

六分應園地三十七畝一分一釐九毫三絲由縣繪圖開摺報明在案並奉憲臺面諭酌賞墾費以示體恤等因卑職遵卽會同總辦紳士商議每畝園地擬酌給墾費錢二千文再給地價錢五千文共錢七千文計園地三十七畝一分一釐九毫三絲統共津貼錢二百五十九千八百三十五文是否卽行照數給發之處理合申請察核示遵等情到本部院據此查西北湖傍城一帶官地旣經議定六分歸官按畝給予墾費地價應如所議卽行發給唯前項地畝本係官地因小民開墾已久現經酌給墾費地價已屬格

外體恤此時正值種桑之際應卽將地收回飭由縣立案以後不准覬覦侵佔合行札飭札到該司立即核明飭遵並飭侯官縣遵照辦理仍由縣專文報查毋延此札

桑棉局請派委員赴浙購買蠶種募師札司查辦查閩省設局興辦桑棉歷經委員赴浙購買蠶種散給民間承領飼養本年各蠶戶所飼之蠶不堪留作來年蠶種仍應赴浙另購佳種來閩以備屆時散給民間領飼此次若購得佳種民間飼養得法卽可遞年留種不須再赴浙省採辦省會城鄉飼蠶之戶不

少現已承辦二年而飼蠶植桑併纜絲紡織之法尙未能講求盡善亦應由浙選募蠶工布匠來閩教導茲屆冬初正可購募之時應卽委員前往浙省購募以資學習再閩省所種浙桑歷有三年應當移接恐越時枝老本粗不能再接并令此次委員到浙再購已接過一兩年之家桑千餘枝前來以便陸續移接閩地之野桑俾得悉成佳種合行札飭札到該司立卽轉飭桑棉局委員金延仁尅日馳赴浙省妥爲購募仍將起程日期報查毋稍違延切切

卞制軍政書卷二終

男續昌恭校

卞制軍政書卷三

札飭夏道等採買倉穀

照得倉儲米穀關係民生根本必須未雨綢繆庶幾緩急足恃前經通飭各府州督屬查辦額儲穀石迄今尚未查覆齊全現在秋成告稔穀價平減自應圖匱於豐以資儲備合行札飭札到該道立即遵照會同在省司道暨在籍刑部主事鄭奇峰察看情形先行乘時採買乾潔好穀數萬石在於省倉妥爲存儲所需價銀卽在稅釐雜款籌撥應用仍將辦理緣由隨時報查特札

札兩司轉飭嚴禁鋪戶攙和小錢行用

照得奸民私販小錢大干法紀鋪戶攙和行使亦應計數科罪上年夏間據通商局司道以制錢短絀詳請查禁小錢當經本部院如詳批示飭禁拏辦在案茲聞米鋪糴米用加三四小錢糴米則索淨大錢似此攙和行使必致米商裹足於市肆大有妨礙合行札飭札到該司立即會同<sup>藩</sup>臬司轉飭該府廳縣迅再嚴申例禁一體剴切出示曉諭各鋪戶自本年六月初旬以後進出買賣務須一律概用大錢公平交易錢鋪兌出錢文亦不准再行攙和小錢一面訪拏私

鑄販運匪徒務獲嚴懲并飭該廳縣仍隨時留心稽  
察如有陽奉陰違仍舊私行攬和漁利立即拏究懲  
辦以重圜法仍令將奉文遵辦緣由抄錄示稿申送  
察核毋任違延切速切速此札

汀州稅釐局會稟籌辦峯市洋藥釐金並委員暫行  
試辦請示

據稟併夾單已悉仰稅釐局司道核飭遵照該委員  
等以釐卡爲調劑侵漁肥己殊堪痛恨未可稍事姑  
容該司道立即查明總局徐令分局王委員經手釐  
金侵蝕若干並歷辦分局委員通同司哨舞弊營私



各情節一併查叅懲辦毋稍徇延仍候

督部堂批示繳

建陽縣李令批稟

查閩省上游延建邵諸屬以種茶利厚於田多爲逐末之利有害田功亟應查禁據稟旣往不咎未開之山一概禁止種茶以示限制應如所請辦理其延建邵所屬均可推而行之仍須明定章程以爲違禁私種者戒仰布政司會同按察司卽速查議定章剴切出示頒發該府縣一律諭禁并責成該地方官會督各鄉紳耆隨時留心查察妥爲勸諭仍將辦理情形

稟覆察奪并由司錄送示稿備查暨候

督部堂批示繳

建陽縣稟勘估考亭書院工料銀兩數目批

查建陽朱子祠全工興造需款較鉅刻下捐項未集  
應將所估正殿兩廡儀門三處先行興辦仰布政司  
速卽核飭遵照並添舉公正紳士協同襄辦一面設  
法勸捐以濟要需仍候

督部堂批示繳

布政司稟長泰縣請增額外孤糧批

孤貧口糧許其加增務須實沾惠澤毋聽吏胥侵蝕

及虛冒報銷銀款無多想地方官不致不自愛若此也仰飭該令實心經理併候咨

部查照繳

札

布兩司按

爲抄片札知事爲照本部院於同治八年九月二十八日會同

閩浙總督部堂附片具

奏准調莆田縣知縣陳祚規避差務延不赴任請

旨以縣丞留閩降補一摺合行抄片札知誠以地方不能有肥而無瘠處事不能有甘而無苦該州縣惟當

盡心職守素位而行至盈虛調劑上司自有權衡若  
皆多方規避尙復成何事體前以閩清縣知縣陳寶  
清以地方瘠苦求卸事赴省此次陳祚圖避差務延  
不赴任均已奏叅札仰該司立即通行申誡勿蹈積  
習切切此札

札按察司

照得邇來天時久旱不雨亟應清理庶獄以期感召  
天和查省會首府及閩侯兩縣在監在押人犯計有  
數百名之多均係發審及該府縣自行審理之案節  
經本部院面諭該府縣速爲清理斷結乃言諂聽貌

數月以來據報審結者仍屬寥寥殊屬泄玩合行札  
飭札到該司立即轉飭福州府督同閩侯二縣將發  
審自理一切案件實力清釐堪以審結者速即提集  
人證審理斷結應息銷者即行詳銷並將牽累情輕  
及訊係無辜之人概行詳明開釋以舒民困而清案  
牘切勿任聽吏胥弊延拖累至閩縣幫審委員知縣  
鄭啟明屢乞病假應即添委即用知縣王冕南速赴  
該縣幫同審案以期速結併即飭遵均勿任延切切  
札閩侯兩縣  
城守副將

照得昨因南臺地方民居失火竟有不法匪徒乘機

搶奪業經會同

督部堂出示嚴禁如獲有搶火之犯卽行正法在案  
茲據派查保甲張道面呈隆普鋪紳董投遞該道稟  
詞本月十九夜該鋪仍有希圖搶奪放火匪人實屬  
愍不畏死除分札飭拏外合行札飭札到該縣卽使  
遵照選派幹練弁快役隨時認真查緝遇有放火匪犯  
務卽拏獲從嚴懲辦一面會督查夜巡緝各員弁兵  
役嚴密巡查毋致疎虞切切

閩縣詳請開復生員林景運衣頂批

據詳查明生員林景運與林長月族分疏遠且係隔

鄉居住毫無干涉自應省釋併准開復衣頂至該生捐輸保甲經費一節現在保甲經費均係官爲籌給不擾閭閻無須紳民捐助惟尙幹地方民情蠻悍皆由庠序之教不興父兄之訓不謹以致同族一本之親械鬪搶擄層見疊出稱爲互鄉本部院深惡其頑梗而又憫其至愚焉現擬首先倡率籌撥經費在該鄉建立書院延請端正師儒教習經史講明理義使士民子弟耳濡目染漸挽頽風所有山長脩脯肄業膏火自應官民積腋籌費生息以期永久該生旣躋躍輸將應卽撥爲該族書院經費以彰該生誼篤宗

支樂成善舉之美仰按察司會同布政司轉飭閩縣  
遵照辦理仍候

督學部院批示繳

福清縣稟何振照呈告何生的呆命案驗屬誣妄由  
命案呈報到官總宜立時往驗如係假命圖詐正當  
驗實懲辦何得以緩驗爲詳慎殊屬非是仰按察司  
轉行申飭并令嚴拏何振照到案訊擬詳辦仍候  
督部堂批示繳

札福建道府

爲札飭事案照



前督部院徐以州縣苦累如上官節壽等項名曰陋規相沿日久下以此爲應出之項上亦視此爲應得之資既啗其利有過則爲隱護而州縣亦以此挾制上官以致仕風日下民生日蹙是以議提經費津貼兩司道府以資辦公其向來各項陋規概行裁革奏明立案通飭遵行乃近來各屬州縣本管道府節壽及到任禮等項仍須致送否則公私挑剔甚至有求一見而不可得者似此貪黷營私尙復成何事體查該道府每缺每年津貼至數千金之多卽如向年未經議革陋規之日核其進項數已不甚相懸署中

一應開銷樽節之餘似可無憂短絀道府於州縣耳目最近所以籌給公費者原冀其屏絕苞苴認真考察何以仍踵陋習無厭誅求表率之謂何而甘受屬員菲薄耶夫今日津貼之公費皆往時州縣之盈餘盡提州縣之利以充公業已損下而益上復索州縣之資以入己豈非繼長而增高揆之事理得無愧怍况既有 奏明之公費此外纖毫所入於法卽屬贓私道府均係

特簡大員似不當不知自愛恐傳言尙有不盡實者爲此通飭自陳札到該府道遵照將在任自領津貼以來有

無收受屬員節壽據實自行稟復並出具印甘冊結  
申送以憑查覈此後有則改之無則加勉本部院不  
爲已甚該道府其各潔己率屬整頓地方以期吏治  
蒸蒸日上於該道府有厚望焉特札

札布政司

據釐稅司道詳稱查

前督院左核實款項嚴革陋規司中詳定章程自總  
督至本府各衙門於七關稅項每年提銀四千兩作  
爲各署歲修及添備器物之用應卽畫定數目督撫  
兩署每季各提備二百兩藩臬兩署每季各提備百

五十兩道府兩署每季各提備百兩督學署提備百兩均於季首送交各衙門自行備辦並立案不得再令兩縣供給以杜日後濫索之弊合行札飭札到該司立即遵照轉飭閩侯二縣所有七衙門內署歲修及添備什物無須供差即便立案遵行毋違特札

通飭札

爲飭禁事照得小說淫詞誨淫誨盜最足壞人心術是以例禁綦嚴同治七年三月十一日奉

上諭丁 奏設局刊刻牧令各書一摺州縣爲親民之官

地方之安危繫之丁 親擬編刊牧令各書頒發所屬

卽着實力舉行俾各州縣得所效法其小學經史等編  
有裨學校者並着陸續刊刻廣爲流布至邪說傳奇爲  
風俗人心之害自應嚴行禁止着各省督撫飭屬一體  
查禁焚燬不准坊肆售賣以端士習而正民心欽此欽  
遵當經通飭查禁在案昨接江蘇巡撫丁函稱有福  
建板小說各種亦應查禁等因到本部院合行札飭  
札到該州府立即轉飭所屬密向坊肆查取小說各種  
當堂一律焚燬並究明書板共有若干副現存何處  
一併查追銷燬具報至應禁小說如水滸等部聚衆  
揷盟各有綽號尤爲誨盜之書寇亂之初結會拜盟

類多效此流毒已非淺鮮應卽與金瓶梅各類淫書  
一并查禁焚燬毋得視爲具文致干重究切切特札  
通飭札

照得閩省賭風甚熾訟牘其繁風俗澆漓日甚一日  
顧聚賭者以賭棍爲護符健訟者以訟師爲謀主風  
聞操是業者各屬衿監及營汛兵弁爲最多伊等居  
中圖利一力把持耗人錢財罔知法網積習相沿實  
堪痛恨現由本部院申明例禁徧示曉諭合併札飭  
札到該州府轉飭所屬各縣立即嚴查城鄉有無開設  
賭場出賣賭具設局坑騙包庇抽頭之犯其詞訟中

新收未結各案審係情虛務須嚴究根株係屬何人  
教唆一經訪察卽當嚴密緝拏務獲究辦以期懲一  
儆百痛挽頽風倘各該縣視爲具文並不實心訪緝  
及縣佐巡檢等官有得受賄規徇庇情事一經本部  
院親自訪聞或別經發覺者除將本犯照例治罪外  
卽將失察之該管府縣一併叅撤凜之慎之特札  
整頓營伍咨

照得閩省負山濱海額設營伍最多所以衛民生專  
緝捕備干城之選收禦侮之功定制何等嚴肅乃風  
聞各屬賭風甚熾均由於文武衙門兵役袒護包徇

各該營汛或專司城守或分防鄉鎮耳目最親遇有  
灘桌寶局花會等項賭場必須先議陋規然後准其  
開設迨至地方官聞賭往拏該兵役等既從中得利  
不得不竭力袒庇於是暗通消息者有之幫同抗拒  
者有之藐法營私莫此爲甚素知

貴

提督

紀律嚴明破除情面於兵弁庇賭等事尤能

實力整頓惟各營汛分設四外旣積習之日久恐耳  
目之難周除本部院出示通禁並嚴檄郡縣查拏外  
爲此合咨

貴

提督

嚴飭各屬將弁約束兵丁務須恪守營規切



勿得財底賭如敢仍前玩法粘過不悛弁則立予嚴  
叅兵則斥革治罪斷不能稍事姑容也望速施行須  
至咨者

### 禁械鬪示

照得閩省械鬪刁訟之俗大千例禁業經本部院申  
明示諭在案茲查漳泉興永等屬地方民情獷悍重  
錢財而輕性命逞詞訟以擾閭閻往往命案一出先  
不報官請驗訟師衿棍從而聚謀停屍斂錢任意嫁  
禍始而訛索鄉里繼而詐害鄰村兇徒之欲壑未盈  
無干之株連無已當官之爰書將定被告之情節又

增竟有一命而羅織數十人一屍而殃及數十里一案而動逾四五年不得結者此外服毒自盡之案亦復藉命圖訛不至於拖累無辜傾人家產不止至於修墳墓而指爲盜葬起房舍則誣佔地基種種陷害情形實堪髮指此風固下府爲甚而上游各屬刁民亦頗染其惡習除由本部院密訪嚴拏並飭該地方官隨時懲辦外合卽通行出示嚴禁爲此示仰士庶軍民人等知悉爾等當思各有身家各有性命陷人以罪將來總有報復之時乘人之危自己豈有安享之理况教誘犯法罪與犯人同科人命私和律於親

屬從重誣告而反坐加等害人者已卽隨之詐贓而  
甘作棍徒伏罪則悔斯晚矣此後遇有真正人命案  
件限人斃卽日內赴官請驗緝兇抵償倘有延不報  
官爲藉屍詐財地步致屍身潰爛不辨傷痕並捏控  
多人意存拖累者一經察出真情定卽從重治罪並  
究出從中唆使之入嚴行懲辦其非真正人命及以  
戶婚田土等事借端訛詐者亦卽照律坐誣計贓論  
罪與其爲兇惡之士棍孰若爲安分之良民與其伏  
國法於將來孰若悔迷途於今日三尺具在一綫難寬  
何去何從急宜慎擇毋謂言之不預也凜之特示

查拿會匪示

爲剴切曉諭事案照同治六年十一月初九日准  
兵部咨同治六年九月初二日內閣抄出奉

上諭左 奏會匪隨處煽結請飭嚴辦等語近年哥老會  
匪結盟聚黨凡官軍駐紮處所潛隨煽誘江楚黔蜀所  
在皆有陝甘尤熾竟有武職人員保至二三品者公然  
入會形同叛逆實屬罪不容誅嗣後軍營武職人員如  
有入會爲匪及所犯情節按照軍令應與斬決者無論  
所保官階大小卽照勇丁一律科罪各營統領查訊嚴  
辦咨稟督撫核奏其游勇隨營勾結爲匪者無論有無

官職獲訊確實卽行正法都司守備以下咨部查銷  
保案叅將游擊以上彙案奏明各路統兵大臣及地方  
督撫大吏務當隨時認真查察以杜亂萌倘或姑息養  
奸釀成巨患定惟該大臣督撫等是問等因欽此閩省  
久已肅清各軍早經凱撤而留防壯勇尙多其業已  
遣撤之勇沿途逗遛亦復不少茲訪獲千總饒嘉賓  
都司張國佐等曾經糾聚多人結盟拜會或號開筵  
或號青龍不過變易會名實與哥老會無異提訊業  
據供認不諱實屬愍不畏法未便稽誅除欽遵

諭旨卽行正法以示懲儆外因念爾等衝鋒接仗戮力有

年從前之勞績可嘉此日之迷途誤入一經入會罪  
應駢誅其在武職等保有官階受

國厚恩當思圖報何亦甘居匪首輕蹈刑章戚雖出於  
自貽心實有所不忍合行剴切曉諭爲此示仰通省  
各營弁勇知悉爾等亟宜猛省速改前非倘有先經  
入會現時畏罪自首者定當寬其既往予以自新均  
得一律免罪此乃本部院恩施格外爲爾等求一綫  
生機當思出會則生入會則死何去何從理明易曉  
爾等慎勿執迷致貽後悔各宜凜遵切切特示  
署延平府詳覆訊斷將邑封職黃騰駿上控喻聞鑄

一 案請示

查置買產業不卽過割完糧本干例禁此案黃騰駿承買喻聞鏞田產迄已二十餘年並不推收過戶實屬違例今勒令將各年錢糧完清分所當然卽田畝一半入官按例已屬從輕何得稱爲受罰耶且前項地畝以一半斷充書院膏火其尙有一半絕不提及改戶入冊之事至喻聞鏞供稱黃騰駿所呈收票均係僞造情節尤屬刁狡亦未根究明白案情雖小而問斷均未明晰又非照例辦理礙難批結仰布政司核明卽飭另行妥擬詳奪毋再率延仍候

督部堂批示繳

福清縣稟卑縣錢糧積習相沿一時驟難挽回請嚴頒告示

據稟已悉候發給告示實貼曉諭仰布政司轉飭遵照此繳

爲曉諭速完錢糧以清

國課事照得地丁乃維正之供糧米充兵糈之用例應年清年款不容絲粒拖欠閩省各屬錢糧其民俗馴良之處輸將踴躍者固不乏人而頑梗之區津貼詭寄完納不前者亦正不少更有刁劣矜監從中把持



以抗頑爲得計啖完糧爲懦弱包攬拖欠相習成風殊不知

國用歲有常經少完一分卽短一分支應抗糧卽爲玩法有犯在所必懲現據福清縣具稟該邑糧戶抗完者甚多請嚴發告示下縣曉諭遵完倘再仍前抗納則由縣詳請嚴懲如有書差疲玩亦從嚴革究庶使窮鄉僻壤咸知

國法森嚴等情查福清縣嘉慶年間有革生林彌高煽惑鄉愚肆意包抗當經前部院將該犯恭請

王命立正典刑犯屬亦均行發遣附和者俱按法擬辦是

逞一時之強抗卒至身陷大辟家破人亡鑒此前車  
應知炯戒乃不共相勸勉及早輸將猶敢狃於積習  
抗不完納實屬愍不畏法本應立行嚴拏重加懲辦  
然本部院心殷化導不忍不教而誅合行出示剴切  
曉諭爲此示仰闔屬士庶軍民人等知悉爾等須知  
糧賦上關

國用抗欠律有明條務將所有未完節年及同治八年  
應完錢糧糧米趕緊掃數投完倘有戶額未經過割  
立即開出的名赴地方官衙門投稅推收過割各將  
本戶糧銀速行輸納以副

奏銷造報倘再稍存觀望希圖抗欠毋論紳衿士庶及  
營兵官役均卽一體嚴拏按律治罪本部院言出法  
隨決不姑寬各宜凜遵毋違特示

興化府稟請嚴催新任莆田縣陳令到任或另委幹  
員接代批

先據該署縣宋令具稟當經批飭該署令不待陳令  
到任遽欲帶印晉省飭司查明如已到省卽以規避  
差務擅離職守詳請叅辦并令飛飭陳令兼程前赴  
莆田調任如再宕延一併詳叅在案據稟前情仰卽  
知照至該守另稟前因興屬生童勒保看管之犯請

出示嚴禁一節已與

學部院商酌據覆去年府院試及今年縣府試士習頗能安帖似不必再行出示倘有滋事生童不難立時懲辦也並卽遵照此繳

諭閩縣尙幹墩林姓示

照得該鄉聚族而居素稱强悍每因小忿好勇鬪狠以焚擄爲常事視人命如草菅惡習相沿深堪痛恨本部院早思整頓特不忍不教而誅耳現據縣稟林姓六房惟信房丁口最多各房向有夙仇常相報復本年四月初二日信房林道準因失松楸疑林水水

命全山書卷三十一  
偷砍欲行送究起釁詎文房林長月卽於是日王台  
林岑岑等焚燒信房林道尙等房屋四間并拔毀林  
方猷等禾苗二十餘畝而信房林道準藉圖報復亦  
於初二日酉刻喝令林吓妹等銃傷文房林達話又  
初四日林長姜刀傷文房林道信旋各殞命該縣會  
營赴鄉查辦諭令細送正兇迄無一名交出彼此擄  
人搶物滋鬧不休似此冥頑不靈實屬行同化外萬  
難姑容現已據稟會商

督部堂酌調省標八營精兵交城守協梁副將統帶  
并調鎮海營閩安協各水師會同該府縣馳請拏辦

查林姓六房皆係一本宗支本不應肇釁爭鬪卽信房人丁衆多賢愚不等大約仍是良民多莠民少誠恐大兵壓境難免玉石俱焚合再剴切曉諭爲此諭仰林姓族房衿士人等知悉爾等或爲一房之長或居四民之首當知約束子弟排難解紛現辦惟嚴拏肇釁不累無辜應卽責成將林長月林道準林岑岑林吓妹林長姜尅日交案訊明按律懲辦其餘附和之人但經悔罪咸予自新概不窮究如敢縱容庇護抗不交犯及任聽避匿再滋事端則是怙惡不悛惟有嚴飭該文武痛加懲創以靖地方本部院言出法

隨各宜凜遵毋貽後悔切切特諭

署連江縣王令經庭稟前在惠安縣清理田賦萬難情形批

據稟各節均屬藉詞支飾殊難憑信卽所稱王佩文羅運端清釐晉江安溪等縣田賦俱未竣事均蒙寬免會辦該令實覺獨抱向隅等語查王佩文所領前項經費業據司詳以該令清出田糧七分有零造具總細各冊頗見妥善曾飭各屬仿照辦理而羅令運端領過經費未清糧額僅止三分有零仍令繳還經費數成貼歸現任接續查辦是該二令均皆實心清

釐其未辦者不過二三分之多是以前未飭會辦該令徒以發訊土匪爲詞唯令原辦紳董任其含混查照舊冊繕送所有糧戶的名多不符合並未親身查對顯預申送則該令之草率了事不肯悉心經理但圖虛冒報銷已可概見前者着令繳還經費銀兩交卸連江縣篆赴惠安會同現任再行認真查辦已屬從寬辦理乃不自知其非猶敢飾詞稟瀆實屬不合仰布政司嚴行申飭並勒令將前項經費銀兩照數繳還剋日馳赴惠安縣會同現任傳令逐一清理務須糧歸的戶額不虛懸俟釐查完竣造具魚鱗八匡清



冊通送核辦尙再藉詞延宕定卽嚴叅不貸此繳

札浦城縣按察司

據

該代理浦城縣知縣劉勳

申送本年十月分詞訟已

未結各案清摺到本部院據此查各屬詞訟已未結

各案節經通飭確查舊管未結案件按管收除在分

列四柱造報在案茲據該縣摺報並不遵式造送僅

開審結註銷各案其未結舊管新收各案全不開列

殊屬泄忽除摺存查外台行札飭札到該縣即便核

飭遵照確查舊管新收未結之案共有若干起趕緊

清理自十一月分起遵式妥造并取承吏並無隱匿

遺漏積案切結送核毋再率混干咎切切此札

札建甯府

照得清理詞訟乃地方官應辦之事前經本部院通飭各府州督屬將自理詞訟各案認真釐查審結按月開造已未結四柱數冊呈送稽核通省各縣均經遵辦惟代理浦城縣劉勳自同治七年八月二十六日到任起僅將七年十月分審結註銷之案列摺申送其舊管未結共有若干案新收幾案未據開報當經札查并飭嗣後遵式妥造去後乃該代理縣置之高擱迄今半年之久杳不開報殊屬泄玩已極除飭

司記過外合行札飭札到該府立即嚴行申飭並令該代理縣將因何延不造送緣由聲覆察奪一面勒限五日內將上年十一月分起已未結詞訟各案按月分晰遵式開造數冊馳送察核倘再玩延定即撤叅不貸又建安甌甯二縣造送詞訟冊并不按月開報輒將兩三月併爲一冊造送亦屬率混該府併行申飭此後務須照章按月依期呈送毋再率忽干咎切切

札按察司

照得云云殊屬泄玩已極除札建甯府嚴行申飭云

云 干咎外合併札行札到該司立即移會藩司將現  
代理浦城縣知縣劉勳記大過一次註冊飭遵并一  
體嚴催遵辦毋延 同前由

札 漳州府張署守

按察司

照得各屬自理詞訟未結積案為數不少前經本部  
院通飭認真清理並將已未結之案按月開造四柱  
清摺呈送稽核在案現經本部院訪聞漳屬民情刁  
健訟案較繁各縣積壓多至千餘起或數百起不等  
各該縣現在開報均多不實即如平和一縣先據摺  
報未結之案僅有數起迨經札府飭查則補開四十

六  
刑  
部  
卷  
三

三

餘起其爲並不據實開報更屬顯然合行札飭札到該府立即遵照將所屬各廳縣歷年積壓詞訟各案澈底清查何處未結之案實共若干起據實分晰馳覆一面勒令該廳縣按收審月日統行開具案由清摺並着令承吏出具實無遺漏切結呈送查核倘再匿延除本員撤叅外並將承吏提省究辦決不寬貸此乃特飭查辦之件該署府務須認真查覆切勿徇延并干未便速速

除札漳州府遵照

云

云

切勿徇延外合併札行札到

該司立即一體飛飭遵辦毋延

同前由

札廈防廳

照得造士以器識爲先訓俗以德禮爲本茲訪聞玉屏書院諸生頗知敬品力學彬彬然有鄒魯之風并於本部院頒發

聖諭廣訓衍一書每月按期宣講勸諭使小民知所觀感殊堪嘉尙特給匾式一道合行札發札到該廳照刊匾額懸掛玉屏書院講堂以示褒獎並傳諭諸生益加奮勵共圖上進本部院有厚望焉特札  
賞遣游勇示

爲剴切曉諭事照得負戟從戎丈夫雖志在報

國服疇力穡君子不輕去其鄉閩省防營湘軍爲多自  
辦理海防以來湘楚之人不遠數千里投奔鄉親圖  
充營勇者躡屨擔簦相望於道迨防務既定營額早  
滿不能復充遂致徘徊中路無所于歸乞貸俱窮進  
退維谷上勞父母之懸望下慨家室之仳離無食無  
衣情殊可憫曾經

前部堂楊 設法貲遣逐程遞送而先者甫去後者  
復來訪聞省城海口一帶留滯尙多其往來上下游  
各郡縣者亦復不少現在時近冬令轉瞬嚴寒似此  
異地游民困窮無告其良懦者不無溝壑之虞其桀

驚者迫於飢寒設或流爲盜匪旣爲

國法所難容更爲鄉黨所不齒及今不歸後將有欲歸而不能者本部堂督楚撫湘計經六載凡爾楚人皆吾赤子安忍坐視不爲手援現已籌備經費剋日貲遣回籍除分檄閩省防營各統帶嚴飭各哨員弁稽查驅遣不准擅自容留致滋事端外爲此出示曉諭爾等須知各營防勇現均有減無增日久淹留徒滋困憊當此指示迷途之日卽爲言旋故里之謀趕緊前赴省城南較場營務處報明籍貫姓名聽候查核一律遣送俾得及早還鄉各圖生業切勿因循自誤



帝宣正...  
貽悔噬臍自示之後倘再任意逗遛窮而爲匪或有  
攘奪不法情事一經查獲定當照章嚴行懲辦決不  
姑寬本部堂愛民如子執法如山勿謂言之不預也  
其各凜遵毋違特示

嚴禁花會告示

爲剴切示禁事照得閩省素稱海濱鄒魯而人心不  
古賭博成風花會一項閩中獨盛故定例特設專條  
爲首充軍夥開及幫收等犯分別流徒被誘入會者  
枷杖較之尋常賭博罪名倍重法至嚴意至深也本  
部堂前撫閩疆曾飭拏禁有案此次銜

命重來以總督兼巡撫事仔肩愈重報稱愈難計維整肅  
吏治與民休養乃訪聞花會之風較前更甚由鄉及  
城到處掛巴誘人猜壓非問卜扶鸞卽求神祈夢男  
女雜遝舉國若狂試問猜壓花會起家者曾有幾人  
每日輸錢數十百文積少成多典鬻俱盡偶贏小彩  
展轉流連得不償失不特受饑寒之苦亦且爲姦盜  
之媒貽害閭閻莫此爲甚推其所以惑衆者壓着一  
錢可贏錢三十文獨不思花名有三十七字之多已  
難揣測而設會棍徒類皆赤貧無賴故必擇無人猜  
壓或壓本輕者之花名始開倘壓本重者力不能賠

或席捲而逃或僅予還本被惑至此亦可猛省至開設花會利己損人既犯刑章亦干陰譴本部堂不忍不教而誅除檄飭地方文武查拏懲辦外合行剴切示禁爲此示仰閩省諸色人等知悉爾等當思花會害人匪淺已犯者及早回頭未犯者謹防失足一面管教眷屬約束子弟朋友相規戚族相勸各勤分內之事勿圖意外之財倘再執迷不悟定卽嚴拏重懲婦女有犯罪坐夫男決不寬貸各宜凜遵切切特示札飭文武各屬認真查辦鬪案

爲飭遵事照得閩省民情強悍械鬪成風下南一帶

爲尤甚故例設專條凡糾衆三四十人致斃四命十命以上卽罪應斬決斬梟法至重也自

左文襄公派營嚴辦後鬪風稍斂詎日久玩生復蹈前轍近來各屬鬪案層見疊出若非大加懲創何以彰法紀而儆兇頑本部堂前在湖南巡撫任內有新田縣謝胡兩姓鬪斃多命該縣知縣李國鎮挪改月日分起詳報當經

奏參革職留緝獲犯謝智泉等十四名奏請一併正法並將李革令查銷留緝在案訪聞閩省各州縣因循諱飾大畧相同本部堂忝任疆圻欲保全民命自嚴

禁械鬪始合亟飭遵爲此札到該某立即遵照轉飭

所屬各

灤縣

遇有鄉民糾鬪務於未鬪之先將鬪之

際立速親臨該鄉理明釁由彈壓解散如已互鬪斃

命即知會營汛防軍協力嚴拏務將糾衆首犯及下

手正兇弋獲究辦不能約束之家長一併提案嚴懲

如該營縣狃於積習查拏不力或敢隱匿不報定即

指名嚴叅毋謂言之不預並飭將奉文日期報查切

切

批當商請禁小錢

鄭恆生林信源等稟

查銷熾制錢罪干大辟愚民貪利不知例禁綦重應

責成地方有司剴切曉諭俾知警惕一面密派幹役  
認真查拏本部堂撫湘時曾經飭屬將律條私鑄等  
項罪名出示嚴禁奸民稍知斂跡據稟各錢鋪創出  
三鉤名目銷燬官板鑄成攙利行用如果盡實大千  
法紀仰福藩司速飭該府縣查明出示嚴禁隨時拏  
辦並將出示日期及張貼地方具文申報一面諭令  
各項鋪戶務將百貨價值一律平減以蘇民困毋任  
延縱

飭閩縣等嚴拏私鑄私販小錢札

札爲特飭嚴拏私鑄及私販小錢以重圓法事照得

閩閩貿易例應遵用官板制錢不准攙和小錢及本部堂蒞閩以來見民間所用小錢幾至輕於鶩眼現在閩省開鑪鼓鑄已久未必不敷行用而小錢仍復充斥非嚴行查拏私鑄私販實與市廛有礙除已飭該縣等出示嚴禁外合行特飭爲此札仰該縣即便遵照實力奉行查奸民私鑄非於偏僻處所卽在著惡之鄉私錢入市類由小船夾帶亦有與販之人果能認真查拏自必斂跡此外如城廂內外之一二百文票條店本無多利於攙用小錢動輒倒閉尤爲肩挑背負小民之害亦應一併查禁該縣等身任地方

應如何設法拏辦之處務當體察輿情隨時而稟本部堂爲整頓錢法起見該縣等切勿畏難苟安致干未便切切

批武平縣唐令

志燮

稟

查林通蓮屍身被鄧姓輾轉移匿其爲鄧姓致死無疑該令並不上緊嚴緝正兇而轉歸咎屍親且獲鄧觀明一名旣係鄧中和之子何以又不嚴追林通蓮屍身下落轉謂無辜保釋辦理殊屬偏執仰卽趕緊設法分別起驗拏辦具報

嚴禁文武收受械鬪陋規札



爲飭遵事照得械鬪花會兩項最爲閩省惡習地方文武自應隨時查拏嚴禁乃有不肖官弁收取花會陋規縱令開賭遇有械鬪案件文武下鄉查辦每向兩造需索夫價兵費敷衍了事並不嚴拏正犯與從前辦案名異實同百姓視爲慣常益致肆無忌憚鬪擄不休本部堂重蒞閩疆詳察吏治民風如江河之日下願與諸僚屬力圖整頓不能再事因循文員應責成道府武弁應責成鎮協隨時隨事留心查察倘遇械鬪案件屬官索賄聽和匿不申報或得受花會陋規不行拏辦者卽行密速稟聞以憑叅辦如該管

鎮協道府曲爲徇隱一經查出定干并叅決不稍從寬貸毋謂言之不預除通飭外合就飭行爲此札到該某卽便凜遵辦理並將奉文日期具報毋遲

湄洲游擊稟前獲盜船破壞不堪批

來文閱悉此等盜船獲到與其飄泊江干日久損壞不若變價充賞較爲核實年前曾據凱字水師營鄧副將暨平海營蔡康業先後稟報拏獲私鹽船盜船均應發交各該營變價充賞仰福建按察司會同鹽法道查明移飭遵辦具報毋延繳文抄發

札福州府廳縣嚴拏騙匪刁民

爲札飭事本部堂蒞閩以來訪聞省垣城廂內外開設錢鋪多非身家殷實虛出票張散行市厘迫出票既多資本不接卽爲捲逃不待滾支預期關閉此皆地方官未將倒鋪之人嚴拏重懲押令開發票存錢文以致相率效尤居民人等疊受其害查例載錢鋪將兌換現銀票存錢文侵蝕閉門逃走者拘拏監禁勒限開發若逾限不完數在一百二十兩以上者分別發附近近邊遠極邊充軍一千兩以上發遣黑龍江安置等語外省錢鋪侵蝕票存錢文比照京城錢鋪例辦理歷有成案又例載藉名取錢踰毀門窗

搶取什物者照搶奪例治罪又刁民聚衆四五十人  
以上尙無闕堂塞署並未毆官者爲首照光棍例斬  
立決闕堂塞署毆官者爲首斬立決梟示從犯俱絞  
監候悉載有專條立法何等森嚴昨據府縣面稟關  
閉錢鋪地方官將開鋪人拿獲到案刁民遂聚衆赴  
署向官強索票存錢文任意滋鬧等語地方官將倒  
鋪人拘拿懲辦勒令開發票存錢文正是體恤受害  
居民起見然須查明該鋪存欠帳目有無銀錢寄頓  
別處或令變賣家產靜候定期按數開發非倉猝之  
問可以眉清目舉若刁民向官索鬧實屬不知好歹

現值年終帳務忙迫難保無前項情事合行札飭札到該某遇有關閉錢鋪案件定須將鋪東嚴拏勒追照例治罪其有刁民聚眾赴署滋鬧卽稟請派營嚴拏照光棍例治罪本部堂言出法隨決不寬貸並卽出示曉諭毋違

飭

正黃旗

協領押追倒鋪票存

照得去臘除夕旗下街倒閉集善錢鋪一案當飭該管協領押令鋪東開發票存斯時松林清俊並未言係漢民金姓開設迨至正月十九日延未開發經副都統提訊松林清俊始串供係漢民金姓開設本

署將軍當諭正黃旗協領台斐音圖鑲紅旗協領托  
普太勒限十日令松林清俊將金姓交出著追不得  
空指一人冀圖諉卸二十七日松林清俊竟敢呈遞  
紅稟捏稱金姓遠颺無從覓獲欲以一稟了事實屬  
荒謬已極如果實有其人松林係屬房東清俊係屬  
引薦何得不知金姓下落顯係朋比爲奸誑騙財物  
松林業已革退馬甲清俊着卽暫行革退前鋒再限  
十日於二月初八日內將集善錢店票存開發清楚  
尙可從寬開復錢糧倘真有金姓其人該前鋒等擒  
獲來轅亦必爲嚴追還款若藉詞虛捏抗延不理限

滿定卽提責該管協領同干未便  
批當商吳春成等稟

省垣錢法敝壞極矣城臺銀價低昂不一自當設法  
整頓以期漸挽頽波惟查近來南臺銀價每兩易換  
大錢不過一千四百文之內城內攙和小錢每兩易  
換錢一千五百數十文若一時禁絕小錢而令錢鋪  
以攙和之價照大錢開發每兩虧耗百數十文誠恐  
紛紛倒閉在錢鋪前以攙和漁利罰其賠本原不爲  
過但閉歇倒票不免貽累居民不能不體察輿情妥  
籌辦理以顧大局仰福藩司會同糧道轉飭該府縣

剋速妥議具詳察辦當商利於銀價低賤與錢鋪勢  
成鑿枘所稟似亦未盡公道並飭核覆毋延  
咨兩江督部堂運閩米石免稅  
爲飛咨事准

貴爵部堂咨覆准咨據閩省善後局司道復稱閩商  
運米免稅已奉准不拘二十萬石之數請將江省免  
稅之米年以二十萬石仍歸舊商福裕豐等照額採  
辦抑或酌減若干其餘由沈紳錫慶舉商採運平糶  
各請各照分幫運濟等情咨商酌核轉飭江海關道  
遵照辦理並希示復等由准此查此案前據蘇松太



龔道照瑗稟米商福裕豐請將已領未運之照准予  
驗放此後米照仍請歸商承辦等情請示前來本爵  
部堂當以去冬運閩米石准其免稅因上游江鄂等  
處來米頗多本省民食尙屬有餘姑爲一時權宜之  
計轉瞬青黃不接米價日漸昂貴本地紳民深以民  
食不敷爲慮外運之米勢難再行免稅紛紛出口致  
妨本省民食應將上年閩米免稅之案一律停止以  
杜爭端而免本省民間食貴之虞批飭遵照辦理在  
案准咨前因相應咨復查照轉飭等因到本部堂准  
此查閩省濱海瘠區所產米穀不敷民食向賴隣省

運濟是以從前歷經

奏准免稅以廣招徠前因滬米改歸建幫紳董舉商承辦卽據城鄉內外各米鋪紛紛陳請已形窒礙如將閩米免稅之案一律停止勢必商販裹足閩米價昂軍糈民食將何所賴未使以商人爭販致誤全局素知

貴爵部堂公忠體

國畛域無分本部堂籍隸江蘇倘有妨本籍民食何敢再三聲請實因閩省全局所關相應飛咨貴爵部堂煩請垂察仍照前議飭遵實叙鄰誼望切

示覆施行

札長樂縣舉行鄉約

爲札飭事照得鄉約創自藍田呂氏本周官之遺意於以訓俗型方勸不善以歸於善也閩省素稱海濱鄒魯近來人心不古習俗日漓花會械鬪之風爲害匪淺健訟抗糧之事所在皆然豈盡民之無良抑由教之未預誠能仿呂氏之法鄉爲立約俾知德業相勗過失相規禮俗相交患難相恤經理得宜未必非風化之一助乃地方有司非惡其不便於己卽慮其或擾於民以致良法美意阻格不行甚非本部堂之

所取也前據長樂監生陳其思稟稱生員陳其璜曾擬鄉約各條當傳陳其璜陳其思等飭取前辦章程去後茲據呈送約章二本暨節略一紙查閱所陳各節尙屬可行合併抄發爲此札仰該縣遵照一面傳集紳士妥籌勸辦一面出示曉諭該縣訓導吳掄元曾任其事委令幫同籌辦須知作事難於謀始而創始要在得人凡約正約副務須遴選年高有德鄉望素孚者爲之或令公舉或由採訪毋徇請託毋畏彊禦蓋任得其人諸事易集擇人不當流弊滋多此則極宜加慎者也至若開局必集費費於何出而抑勒

苛派諸弊應如何防之於先設局必用人權有攸屬而武斷把持諸弊應如何杜之於後以及行之有成如何給獎行之無效如何示懲在今日多費一分心思在他日自少一種弊病尤要在紳分其責官總其成因地制宜參酌損益但期法密而弊除不得因人而廢法該縣務卽體察情形認真勸辦果能著有成效隨時馳稟本部堂尙當推廣行之將以該邑爲衆邑之倡也勉之切切此札

批代理將樂縣黃令

鄭銓詳

查革監陳峻英卽安壽先據該代理令具詳屢次行

兇擾害被控纍纍當經批飭革去監生從嚴究辦現  
詳陳峻英所供處處避就該代理令亦處處爲之掩  
飾前甚嚴緊後忽開脫當代代理將卸之時難保無徇  
情賄縱等事仰福臬司卽飭接任縣汪令確切查明  
據實稟覆察核一面查照迭控各案迅提該革監嚴  
訊確供照例議擬詳辦均毋顛預干咎切切繳

飭延平等府查水師礮船勇丁  
善後局查礮船管帶官月費

爲飭遵委事照得本部堂訪聞延建邵各屬巡河水師  
礮船勇丁多未足數亟應委員親往點驗合行飭委  
爲此牌仰該府卽速遵照親往該府屬巡河礮營將

勇丁逐一驗開具姓名箕斗籍貫造冊具報毋稍  
徇隱切切

除飭委各該府親往逐一驗具報外惟既不准空  
額剋扣所有各該管帶官月領公費是否足資辦公  
合行飭遵爲此牌仰該局司道卽速遵照查明妥議  
詳覆察奪毋延

批保甲局查報私開同益票条店稟

查該錢鋪未經具報地方官私行開設應卽查明票  
存若干限定日期開發支清一面押令關閉所有當  
時不卽舉報之地保應飭縣枷號責懲以儆將來仰

卽遵照辦理繳

飭

水師營拏花會匪船  
鍾副將赴營前鄉收繳礮械

爲飭遵事准

欽命總理船政大臣裴咨開先因赤嶼鄉匪徒開設花會  
猜壓人等皆以小輪船載渡營前鄉陳林兩姓因盤  
渡爭佔道頭起釁幾成械鬪當經派撥親兵哨勇前  
往彈壓解散查核爭端皆肇於花會花會實由於機  
船請飭嚴行禁止等因到本部堂准此查開設花會  
爲害甚烈屢經面飭管帶凱字水師營師船鄧副將  
斌儀調署標下水師營張參將玉峯將傳遞巴字之



輪船嚴拏懲辦乃竟久無一獲以致營前港幾有械鬪之事殊屬有負委任合亟特檄飭拏爲此牌仰該某卽速遵照嚴拏務將船匪并獲懲辦倘再置若罔聞定卽撤叅不貸凜速切速

除嚴飭凱字水師營鄧副將調署標下水師營張叅將遵照云云不貸外合并特檄飭遵爲此牌仰該某卽速遵照剋日帶領哨隊會同地方官馳往營前鄉勒着地保家長收繳礮械並飭嚴加約束不准爭佔滋事倘敢抗違卽行解省懲辦仍將辦理情形馳報毋遲切速

批漳州鎮稟

查練兵管帶一年一換兵將不相習殊非練軍之法如該副將楊青山操防得力准該鎮保留如不得力卽行撤回由該鎮自行操練毋庸另派并不得徇情濫保倘查有任兵逍遙不勤操練情事無論派員管帶暨自行管帶均惟該鎮是問仰卽遵照繳

札長樂縣查鬪案

爲特飭事照得本部堂訪聞該邑東北鄉現有林李兩姓因事爭執互相擒擄擾及各鄉前日鶴上鄉人往沙京鄉地界耕作被壺井鄉人誤認爲沙京之人

刀傷甚重旋知錯誤服禮安頓刻下林李兩姓猶有  
糾鬪情事合行札飭爲此札仰該縣立即查明該林  
李兩姓究因何故爭執起釁如何滋事務得確情剋  
速遵照本部堂前次通飭分別彈壓解散拏究詳辦  
仍將奉札辦理情形先行稟報毋稍玩延切切特札  
批長樂縣覆稟

省中紛紛傳說林李兩姓構釁已深屢欲械鬪現在  
既有擒擄情事傳言并非無因仰按察司轉令訪查  
諭禁如有糾鬪之首卽行拏辦無得顛預干咎  
札兩司考察佐雜官員

爲密札飭查事照得佐雜官員必須勤慎在公方爲稱職茲查有水口縣丞潘輝曾年壯才平辦事未能允當南安大盈巡檢章程惠德化縣典史章堡漳汀巡檢劉益謙均欠穩練壽甯魚溪巡檢陶楨不治輿情連城縣典史凌清華武平縣典史耿懋恩聲名平常漳平縣典史周浩趨向不正合行札飭密查札到該司即便會同臬司轉飭該管府州縣察看能否勝任據實稟陳毋稍迴護切切此札

批拏辦福清海盜劉道

傳雲稟

閱該道暨朱令來稟大埕可門等村乘危拆搶商船

貨物并毆傷舵水二人落水案情已屬重大該員弁等進鄉尙未拏犯該鄉民膽敢糾衆圍寓殺傷員弁勇夫多人並有勇丁三名縣差四名受傷被擄不知下落軍裝行李悉被搶剝似此形同叛逆聞之實堪髮指無論從前犯案纍纍卽現事亦斷難輕恕仰卽統率全營會督地方文武水陸圍捕格殺勿論務將著名首要各匪犯報獲嚴辦使海濱羣鄉知有

國法用儆將來連盤鄉衿耆激于義憤救護官兵深堪嘉尙應先行賞給花紅事竣再請酌獎以別良莠而示勸懲仍將到地日期及拏辦情形馳稟察奪毋延

此繳

飭鍾副將紫雲拏辦江匪

爲特札飭遵事據延建邵道電稟稱連接順昌營縣及劉提督來文以邵武地方聚有江幫千人尙在添糾欲赴幹關雖經諭阻恐不遵息續據延平府電稟順昌縣稟報江西船五十餘號由邵武駛至拏口經劉提督諭阻不遵將船戶一人拏送巡司詎該船戶等竟敢推翻公案並欲拆毀衙署該船內豎有音天佛祖四字旂幟又有八卦小旂內寫天地等字並聞有哥匪從中煽惑借大幹報復爲名以圖起事請轉

稟由省調隊迅速下縣等情到本部堂據此查該處既有匪徒聚衆煽惑滋事亟應添調勁旅馳往會辦以遏亂萌除分行遵照外合行札調札到該將立即統帶恪靖正營各哨弁勇卽日起程星馳前往洋口一帶會同地方官及現調各軍將滋事各船速行拏辦如敢抗拒准格殺勿論所有北岸礮勇卽由該將派弁暫行管帶毋延切切

爲照會事據延建邵道電稟稱云云至以遏亂萌除飭建甯王鎮恪靖正營鍾副將恪靖威旂副中旂劉王兩提督并咨調擢勝營前往會辦外合亟照會該

鎮率領霆慶前營廖鎮所部弁勇立即前往洋口一帶會督地方官及現調各軍將滋事各船速行拏辦如果謀逆抗拒即便痛加剿洗所有福字恪靖等營均歸該鎮節制毋延

札劉提督

端冕

會剿江匪

爲飛飭事前據延建邵道電稟江西幫船意圖糾衆報復當卽電飭轉傳王劉朱三營多派兵勇彈壓如抗違首犯正法又電飭恩道雞公船膽敢分天地兩旂意圖滋事速行轉飭各營拏禁拒捕格殺勿論又電飭恩道轉傳厚集防勇截拏不可過分致形單薄



看何處人衆卽向何處遏截王劉兩旂如嫌不足卽  
合添足一營各在案疊次電飭該提督何以不遵照  
辦理現據電報該匪已將大小幹鄉盧坊焚燒一空  
男婦殺斃不少未聞該提督等一兵堵截且皆由拏  
口往幹劉提督咎無可辭合亟飛飭爲此札仰該提  
督速卽會合建甯王鎮順昌朱副將及該提督並劉  
提督兩軍立卽將匪剿洗淨盡毋任糾衆蔓延致干  
嚴叅重處凜之切切

札飭劉道大幹案卽示諭解散脅從

爲札飭遵照事照得上年順昌縣大幹地方江西人

與下府人互鬪致傷多命一案本部堂因署知縣程  
令未能卽時緝犯訊辦將其摘頂留緝并奏參議處  
原爲辦理鬪案秉公持平起見乃江西人不候緝兇  
究償輒借報復爲名勾結哥匪肆擾大幹十三鄉等  
處焚燒搶殺并敢抗拒官兵實屬形同叛逆現已調  
集八營精勇前往剿捕務擒首要懲辦但大兵到處  
誠恐玉石俱焚其被脅勉從者該道卽出示寫貼曉  
諭令其迅各解散以免誅夷之慘昨據洋口官運局  
委員稟稱此次雞公船幫惑不畏法之徒固多而安  
分者亦復不少竟有任憑其黨細打而不願助鬪者

此種良民深明大義殊堪嘉獎已飭鹽道傳知官運局將安分各船登記局簿常川配運以示鼓勵外合行札飭札到該道務卽遵照出示曉諭并商催曹統領督率各軍從速進剿前次鬪案亦卽由道上緊查辦以昭平允均毋違延切切此札

批劉提督稟報江船糾關

察閱抄呈信函該匪等雖藉詞報復實形同叛逆其約會聚衆已非一日該提督尙不調集各哨彈壓截留致令直赴大幹焚殺滋事實屬咎無可辭現在由省添調各軍諒可陸續到地兵力已厚亟應從速剿

辦以靖地方該提督如不實力會辦首要無獲定于  
嚴叅除飛飭統領曹鎮並行司飛飭在事各文武一  
體遵照外仰卽遵照辦理繳摺存  
批王提督紫田申報起程

此案先經本部堂電飭恩道轉行該提督馳往會剿  
格殺勿論并令添足改旂爲營又電飭茶市專派練  
兵彈壓須厚集防勇截拏船匪不可過分各在案茲  
閱威旂劉提督及該提督來文彼此尙未會合該船  
匪在大幹等鄉焚殺滋事文武各作壁上觀並不立  
時合兵剿捕遲玩已極殊堪詫異該提督到地後與

建甯王鎮劉提督朱副將各軍如何會辦情形仰卽據實馳報現已貽誤事機倘再不合力剿辦致令蔓延爲害定卽嚴叅重處凜速此繳

批順昌縣稟

此案疊據延平道府電稟業經本部堂先後電飭建甯王鎮督帶福字全營恪靖威旂及副中旂劉王兩提督補足成營又飭福甯曹鎮統率霆慶前營恪靖正營馳往剿捕又飭委署延建邵劉道帶達字營兩哨星速赴任並咨調陸路提督擢勝營勇繼進在案頃閱道府致藩司電稱大幹已被蹂躪是該匪等叛

逆已形本部堂早電恩道轉飭如有拒捕格殺勿論  
並檄飭各管帶該匪如敢謀逆卽便痛加剿洗現在  
省軍將到兵力已厚諒茲小醜不難殄除該匪等膽  
敢橫行皆因歷次船幫滋事不加懲創所致此次斷  
難再任因循朱副將王令身任地方責無旁貸程令  
於上屆哥匪滋事拏辦尙稱得力於去冬大幹案辦  
理殊屬疎縱現在江幫聽從哥匪煽惑起事羅金標  
卽係上屆漏網之人程令須幫同朱副將王令會商  
現調各軍認真防剿務除首逆以贖前愆尙再畏縮  
玩縱貽害地方定卽一併叅辦仍將辦理情形據實

三  
帝  
身  
正  
言  
卷  
三  
一  
馳報事關緊急愈速愈妙不必拘拘紅白夾單也仰  
卽遵照繳

建甯王署鎮稟

此等烏合之徒何難撲滅迭次電飭該署鎮會合剿  
捕乃至今九日任令各匪肆行焚殺該署鎮但知株  
守洋口尙未見賊來稟似覺寡不敵衆畏蕙情形見  
諸楮墨不獨有忝專閫之任亦并有愧宿將之名仰  
卽查明速進會合剿辦毋再遷延大千未便凜速此  
繳

王提督紫田稟

兵分見單自應先其所急劉提督朱副將各以兵分藉口不知移緩就急朱副將王令已到大幹彈壓輒卽棄幹回城任匪橫行獲罪甚重昨晚接恩道電稟該提督擬廿八早會合攻剿王鎮正利報稱二十五日由建進發何以尙未到地究竟剿辦如何情形卽飛速稟聞曹鎮志忠鍾副將紫雲並擢勝各營計日可到毋再畏蕙遷延大千未便並卽知會在事文武一體遵照繳

邵武府稟

兵分見單合剿則事可速了株守則任匪橫行畫地



自限殊屬非計所稟應毋庸議仰卽遵照繳  
邵武府稟大幹鬪案

江匪一了大局卽定如各自分守疆界不行會合剿  
辦任其橫行勢將愈熾頃接延平道府來電江匪已  
經剿散陣斃多人並獲犯解辦邵屬安定等語延屬  
兵力已厚邵屬不難兼顧該守當察度緩急就近會  
商辦理仰卽遵照繳

批建甯守景春稟

據稟已悉俟順昌一帶江匪辦竣當乘此兵威將往  
來船隻無論雞公鴨母等項一概搜查器械合具切

結嗣後如再獲有器械卽將船焚燬船戶治罪於曹  
鎮來稟內批行在案仰卽知照繳

批延建邵道劉

倬雲稟

本部堂昨以汀匪辦竣後當乘此兵威將上至光澤  
崇安下至建甯延平凡往來船隻無論何幫何船一  
概搜查器械令具切結嗣後如再獲有器械卽將船  
隻焚燬船戶治罪分札遵行在案江西幫船較多仍  
恐不服稽查須將現在各營於延建邵三郡沿河分  
布以示兵威倘不服搜查卽將該船焚燬人民憑籍  
此後江西下府汀州各幫須切實勸諭各釋前嫌責

成每幫董事保其不再尋仇滋事如再有犯卽將董  
事一并懲辦張倅元鼎已由司委代甌甯縣篆候飭  
善後局札派同知沈蕃張慶鈞馳赴延平聽候該道  
差委餘如所稟辦理仰卽移行遵照繳

批統領曹鎮

志忠稟

據稟已悉搜查器械一事昨於劉道來稟內復經批  
明以江西幫船較多仍恐不服稽查須將現在各營  
於延建邵三郡沿河分布以示兵威倘不服搜查卽  
將該船焚燬人民遞籍此後江西下府汀州各幫須  
切實勸諭各釋前嫌責成每幫董事保其不再尋仇

滋事如再有犯卽將董事一并懲辦並飭派同知沈  
蕃張慶鈞馳赴延平聽候劉道差委在案將來委員  
防營分派妥當無論何幫何船一律搜查器械不獨  
船戶董事各令具結事竣後并令在事各員出具搜  
查實無器械切結呈送立案並於定期搜查之先由  
劉道會同該鎮出示剴切勸諭各船幫盡釋前嫌不  
准備帶器械逐船搜查具結不取絲毫規費違者嚴  
辦不貸仰卽移會劉道一體遵照辦理繳  
錄批延建邵道稟行臬司

爲錄批行知事據署延建邵劉道稟送水聯保甲告

示旗式船照等情到本部堂據此除批據稟已悉惟  
每船收費六百文四百文一節小民較及錙銖難免  
藉口且布旗易壞須隨時製換又須隨時收費流弊  
何可勝言每船已有船牌可驗不如仍在船頭船尾  
或船篷書油粉字較爲省便應卽免予收費於船牌  
添蓋不取船戶分文小戳其告示內刪去收費一條  
亦將不取分文明白曉諭以杜日後需索之端仰卽  
通飭遵照仍將改定告示船照另送察查繳告示船  
照旗式姑存等因印發外合就錄批行知爲此牌仰  
該司官吏卽便會同藩司善後局移行該道府等一

體遵照毋延

批漳州鎮方張二姓械鬪稟

據稟已悉弁兵赴鄉原爲查拏糾鬪首犯該練兵若不沿家騷擾何至男女奔逃致荒田業足見漫無紀律仰福建按察司速移該鎮轉飭各管帶遵照嗣後務須嚴明約束勿再仍前寬縱致干叅咎切切此繳

批雲霄廳秋 嘉禾 稟

據稟鬪案正兇難知須嚴拏起意首犯懲辦並擬清理積案以免兩造牽連等語確是中肯之論該丞駕輕就熟洞悉情形果能言出行隨何患地方不治本

部堂有厚望焉仰福建按察司轉飭遵照繳排單存  
銷

批雲霄廳秋 嘉禾 稟

據稟暨另單均悉殺人抵命斷無不緝兇之理鬪案  
縱無主謀必有創首輾轉糾人者卽屬首要該丞有  
接緝之責務須破除積弊訪拏真確正兇首惡速獲  
懲辦勿以泛論了事至各鄉家長須擇公正之人充  
當并立族正族副責令鈐束造冊報案仰卽遵照辦  
理毋延繳

批象山協費 金緞 稟

該副將因公赴郡本部堂並未接有呈報公出明文  
府縣相距二百餘里何以聞信之時尙不星夜趕回  
已照會該管鎮查明覆辦在案查閱堂塞署同城武  
職不行擒拏例應革職縣稟中軍都司竇汝江並不  
帶兵出爲彈壓業經撤任聽候查辦此等刁民目無  
官長豈可稍涉姑容所有滋事首犯未能當時立獲  
大屬疎縱仰定海鎮卽速遵照前檄辦理一面飭令  
該署將務須查明真確糾衆首犯嚴拏務獲解交府  
縣訊明按擬懲辦倘再日久無獲定卽照例  
奏叅不貸右營守備王德貴彈壓不及亦難辭咎應先



記大過一次以示薄懲而觀後效并卽知照仍候

撫部院  
提督批示繳

飭郝鎮長慶彈壓關案

爲飭遵事據營務處楊道呈報琅琦鄉民人江則雲  
之子伊才放鴨被毆與過與鄉吳來第等圖鬪移請  
曹鎮轉飭凱字後營酌派弁勇前赴彈壓等由到本  
部堂據此查近省咫尺地方亦復逞蠻圖鬪殊堪痛  
恨亟應派令凱字全營會同劉巡檢馳赴兩鄉彈壓  
並將鬪由訊明究結一面查繳應禁軍械取具嗣後  
不敢私藏并旗房約束子弟不敢私鬪切結剋日稟

復察辦合亟飭遵爲此牌仰該管帶卽速遵照辦理  
仍嚴束營勇不准騷擾暨將起程赴鄉日期具報毋  
延

批稅釐局稟

據詳以傳以禮別項勞績請予抵銷實屬自亂其例  
該總局司道未能飭令破除情面認真整頓復爲之  
圓融請示殊見瞻徇并飭繳

籤福建臬司

據該司審解同安縣姦夫陳盼謀殺本夫陳春江身  
死姦婦陳鄭氏並無知情同謀一案人招到院查此

案泉州府縣原招謂姦婦非知情同謀經該前司以不近情理詳細指駁報明委審在案茲查本夫未殺以前姦夫先後投毒三次均爲姦婦親見各節現招概行刪去本夫旣殺以後姦婦與姦夫同居經年一節現招謂姦婦事前逃避母族經年不歸陳盼謀殺陳春江原爲可作長久夫妻起見豈有經年絕不向姦婦通信之理陳鄭氏亦經年不加訪察陳春江被殺後只餘空房一座何人管理陳盼殺人後又向何處棲身供詞種種離奇又本夫之弟婦向姦婦查問本夫踪跡答以不知去向一節現招謂姦婦詳細告

知邀同赴縣自首此等緊要關鍵該職局祇圖爲姦婦脫罪竟可任意刪改現供毫無情理照轉必干部詰合行籤飭籤到該司立即轉飭遵照嚴行覆訊另錄確供按擬解辦毋稍迴護率延切切此籤仍繳札浙江臬司

查遺失公文事經屢見近則奏摺亦屢屢遺失照例挨查均言轄境實無遺失一詳了事臬司總理驛務不認真究辦以致沿驛州縣毫無畏忌卽如皂林驛西水驛種種可疑并不嚴訊人言杭守與驛丞同鄉姻戚故從寬縱未必無因仰再由司提集嚴訊究辦

詳報毋任飾延仍候

撫部院批示繳

批保甲局稟

查城內各鋪原設井斗斛誠爲思患預防之良意斷不容污塞佔滅亟須一一清出以衛地方其斗蹟俱無者自係被人佔入鋪內拆毀滅蹟亦須切實查究仰卽督同兩縣遵照辦理具復繳摺存

批保甲局稟

據稟已悉保甲查夜各委員四月一換甫將地面情形熟悉卽須更易生手殊非認真辦公之道嗣後應

定以一年爲滿如有勞績或留差或請獎看勞績之  
大小酌擬詳辦其怠惰者不到四月卽當撤換毋稍  
瞻徇仰卽移行遵照辦理繳

札福州府

爲特札嚴拏事案據福建保甲局司道稟報拏獲省  
垣成和齋鞋店後賭場房東唐五五發縣供係王公  
子卽屏南縣附生王贊勳等租房開賭詳請飭拏訊  
辦一案當經本部堂於七月十五日徑札屏南縣學  
訓導速將該附生王贊勳衣頂斥革傳送閩縣查收  
審辦並札閩縣遵照一體嚴拏務獲集訊詳辦在案

乃迄今日久未據遵辦具復查王贊勳現已入場鄉  
試該學官並不遵照斥革竟敢朦混送考實屬徇庇  
劣生不堪司鐸合亟特札查辦札到該府卽速查明  
該學官抗延徇庇具文詳叅一面勒令該學將王贊  
勳卽刻送交閩縣訊辦并飭閩縣一體嚴拏毋違速  
速

札福建臬司

爲錄批飭遵事據建安縣霍令甌甯縣劉令會稟匪  
徒乘機鬧米開倉平糶日期到本部堂據此除批查  
該郡刁民以鬧米爲由逼脅罷市閩堂塞署用牌擲

傷本府左眼案情何等重大該令等爲附郭知縣未能立時彈壓捕拏於刁徒滋鬧情形并不詳細稟陳但以已有府稟免贖了之又云義倉向歸府管意在諉過取巧實屬荒謬糊塗候飭司先將該兩令各記大過一次聽候查辦餘於府稟內明晰批示仰卽隨同鎮府查拏爲首人犯務獲懲辦並將平糶招商各事宜妥速辦理具報如再泄玩一并嚴叅凜切等因印發外合就錄批飭遵爲此牌仰該臬司卽速移會藩司註冊飭遵并移善後局查照毋延

批詔安縣吳

庚揚稟



所稟知縣顧忌情形具見誠實不欺上下相率因循以致各屬鬪風日熾殊堪浩嘆該縣此次辦理甚是候飛飭鎮道卽派一營前往會拏務獲真正首要懲辦如果該鄉蠻逞兇持械拒捕准予格殺勿論但不得以擅殺混報格殺並嚴束兵役不准姦淫焚掠如違嚴叅切切此繳

批已革巡檢涂傳彬稟

察吏安民太守之責該守前具密考印文謂涂傳彬才庸識闇經本部堂叅劾後該守何以向涂傳彬極力周旋據稟前情考語前後易轍如果屬實殊覺有

愧方面大員仰福藩司速飭興化府施守據實明白稟覆聽候核辦繳稟摺抄發

批興化府施守

啟宗稟

公牘私函褒貶不符由於不肯任怨出自方面大員殊屬非是仰福藩司嚴行申飭察吏係知府專責嗣後務須秉公考察覈實註考稟送倘敢泛填塞責定干叅處并預戒之此繳

卞制軍政書卷三終

男麟昌恭校

卞制軍政書

卷三



卞制軍政書卷四

札

福建藩司  
延建邵道

爲通飭曉諭事照得養民之源莫如衣食敦本之務首重農桑閩省山多田少常年民食本屬不敷

前明巡撫金公教民種薯名曰地瓜以佐粒食而備歉歲民胥賴之本部堂前撫是邦曾設桑棉總局分飭各州縣教民樹藝紡織諸法福州培桑養蠶已著成效嗣以乞養旋里事遂中輟種棉雖非山鄉所宜而羅源沿海等處枝葉暢茂亦經葆升令稟報有案誠能仿周官辨土之法禾棉桑柘各樹所宜俾野無

曠土邑無游民大利既興衣食自裕至於武彝北苑  
夙著茶名飢不可食寒不可衣末業所存易荒本務  
迺自各國通商之初番舶雲集商民偶沾其利遂至  
爭相慕效漫山徧野愈種愈多蒼崖剗爲赤壤清谿  
汎爲黃流山廠客民良莠紛雜旣旱澇之無備復盜  
賊之堪虞卽使其利尙贏已屬得不償失矧近年以  
來外洋印度等處產茶日多行銷日滯富商大賈歷  
次虧折裹足不前在山茶薈有經年未曾開採者而  
鄉僻愚民猶復剔壤摻巖種植不已等良田於磽确  
置耕織爲緩圖逆料數年後工本徒拋衣食無出勢

將坐困蓋物稀則貴多則賤利之所在害必隨之此  
天地自然之理也本部堂重蒞閩疆又經一載周巡  
郊野倍切厪懷昔張益公拔茶植桑人竊非之迨民  
間以權茶受困而種桑者獨蒙其利可見小民狃於  
目前罔知遠慮全賴良有司實政實心挽回風氣現  
在種茶之區市疲山敗民心頗知改悔乘勢利導董  
勸並施尤屬刻不容緩若夫荒陬僻壤教誡難周因  
地制宜家喻戶曉則又地方紳士之責也案據建陽  
縣祀生朱壽禔等以種茶流弊積重難返呈請刊示  
勸禁等情察核情詞深切著明洞中肯綮一縣如此

各縣不問可知除稟批示外合亟札飭爲此札仰該  
司會同臬司通飭所屬各州縣一體遵照查明各該  
鄉山園田地種茶多寡若干分別出示曉諭除巖茶  
洲茶暨山坡嶺脊業經種茶不能耕桑之處毋庸置  
議外其餘無論土客人等未經墾種之山一律禁止  
不准種茶其已經墾種者勸令隨時改種五穀雜糧  
或植柔桑講求蠶織以興大利而除積害州縣爲親  
民之官農桑乃立政之本奉飭以後迅卽邀集公正  
紳耆傳諭各鄉保約人等多方開導務使遠近周知  
交相勸勉俾收實效不得假手胥吏藉端抑勒擾害

閭閻仍將如何遵辦情形詳晰稟報察奪此係本部  
堂特飭之件該州縣等果能認真舉辦開闢水利農  
田教民蠶事實有功效可紀者應准由司道詳請

奏獎如敢視為具文因循粉飾設或地方小有水旱致

吾民飢寒交迫頓蹙生機白簡具在決不姑寬該道

等并卽移飭各該道府嚴行督率實力稽查毋稍瞻

徇代人受過均毋違延切切特札

札營務處

為錄批飭遵事據管帶恪靖副中營王提督稟遵辦  
聯甲鬪案弗克進省祝壽等情到本部堂據此除批



各營將領分防要隘務以地方關重勿事虛文卽近  
省咫尺如長門一帶均經先期阻止本部堂誕日閉  
門卻客嗣後拜年拜壽等事各營均毋庸進省以重  
操防仰卽遵照務將地方一切事宜認真辦理是爲  
切囑此繳等因印發外合就錄批飭遵爲此牌仰該  
道卽速通飭各營臺將領一體遵照毋延

批延建邵道劉

傳雲稟

查現辦水聯及山廠保甲必須試看一年著有成效  
方見在事員紳實事求是自應分別給獎現但報辦  
理完竣未便遽給功牌應將在事各員紳姓名先行

查明存記具報俟有實效再行給獎以示鼓勵而昭  
核實仰卽遵照辦理繳

批恪靖正中營提督陳

由立稟

本部堂按臨建甯閱伍時訪聞該提督聲名平常面  
詢建甯景守及崇安厲令俱稱迥不及前管帶之劉  
故提督其聲名之劣已可想見復據景守稟覆該提  
督自接辦以後輿情未甚愜洽所帶之勇零星分紮  
各處時有增多減少操則未能整齊巡則常有疎漏  
各語僅予撤差已屬從寬該提督不知自返忽歸怨  
於孫遊擊東軒殊屬謬妄該提督家事無關營務本

不管理何須妄陳至稟孫東軒通匪一節如果屬實  
當時崇安紳民何肯公同上稟餘亦多無據之詞應  
毋庸議惟所稟營署收受賄規及需索牛羊使費究  
竟是否屬實候檄飭建甯王署鎮查明稟復該提督  
現無差遣應卽著令回籍毋許逗遛仰卽遵照繳  
籤福臬司

據該司審解長汀縣客民劉年發仔等聽從在逃病  
故之彭沅潰謀殺彭貫陰生身死等情一案人招到  
院查汀州府原招係挾嫌貪賄謀命犯供鑿鑿情非  
相符迨由司委審改供彭沅潰初無謀害之心因彭

賈陰生聲言到官誣扳並拔刀向其亂戳始行起意  
致死商允劉年發仔等幫同下手等語核與府縣原  
招迥異其被刀亂戳時自必抵禦不遑何暇商量應  
允始行攏扭奪刀情節若謀若故又若主使毆打均  
在疑似之間蓋爲劉年發仔力圖緩決起見以致變  
換供招種種扭捏支離照轉恐干部詰合行籤飭籤  
到該司迅再督飭福州府提犯研究明確另錄切供  
妥擬解辦毋延此籤仍繳

札建甯府

爲飭遵事照得本部堂按臨建甯府訪查地方官政

聲優劣聞得府幕沈星聚品行不端日日在外遊蕩  
詞訟案件頗事招搖不免爲該守聲名之累合行檄  
飭爲此牌仰該府速將劣幕沈星聚剋日押解回籍  
並取具該原籍知縣收文具報又都司職銜任金章  
藉育嬰堂董事爲名出入衙門干預詞訟亦卽斥退  
毋違

批把總許蘭清等懇恩提委稟

查內河各營礮船駕弁業經本部堂明定章程先儘  
已收標台例人員派充通飭遵辦在案此項差事旣  
經定章如有缺出自當考察人才分別派委豈爾等

遞稟之人卽可藉圖倖進耶官無大小植品爲先似此干求屢瀆本部堂夙所深惡仰標下中軍副將傳諭申斥冊發還

### 籤福臬司

此案傷人之犯多係在逃雖已獲四犯惟鍾紹板古一名供認動手其鍾六仔等三犯並未動手傷人搶物有何功勞何以鍾六仔分贓最多鄭銀仔分贓亦多於動手搶奪之犯天下有此情理乎府詳謂鄭銀仔攜帶短刀半路失落羅藍古所帶刀棍畏懼丟棄以明其無械不能傷人司詳則竟稱徒手矣搶得贓

物三擔既已挑到僻處何以僅取一擔開看謂恐被  
過往人撞破則分此一擔獨不慮人撞破乎情節種  
種支離顯係問官及各衙門幕友惑於救生不救死  
之說曲爲開脫若非問官不能認真研究卽係幕友  
任意改供臬司爲執法之官刑名總滙自當除莠安  
良方爲盡職何得聽信婦人之仁改供朦詳殊屬非  
是斷難率行勘轉仰再督飭福州府暨讞局委員提  
犯嚴訊明確另錄切供妥擬解辦毋延此繳詳文冊  
四件摺稟一扣府招一本解批一張並發  
批長樂縣稟辦理鄉約完竣

該縣鄉約辦成深堪嘉慰據稟按季輪流巡查宣講所見亦是州縣爲親民之官必須常常與民相見方無壅蔽隔閔之病闔邑二十四都山海交錯風氣不齊藉非隨時巡察實力講求安能使各鄉約氣誼交孚聯如指臂所謂有治法必有治人也昔魯公巡行郊野稅於桑下雖三尺童子亦必殷殷顧問是以申牟三異至今傳爲美談該令勉之除札飭學官一體遵辦外仰卽遵照繳冊存

批邵武景令 慶稟

該令才具尙明而辦事懈怠前飭兩司察看旣據稟



請卸肩仰福藩司會同臬司卽行委員前往接署詳報毋延繳

札順昌協

爲特檄飭遵事照得綠營分設汛地有巡防緝捕之責該將所屬分管十三汛巡緝最關緊要乃聞各汛官多住縣城之內置防地於不問實屬玩泄合亟特檄飭遵爲此牌仰該將卽卽遵照飭令各該汛弁務駐汛地嚴督兵丁查拿匪類如果緝捕勤能著有勞績准由該將酌量保獎如敢擅離汛地卽行稟請撤叅該將務須認真稽察切勿瞻徇容隱代人受過凜

之慎之仍將奉文遵辦日期具報毋遲

札藩臬兩司

爲飭遵事照得省垣錢法敝壞日甚皆由奸民私鑄錢文錢鋪攙和行使遂致百物昂貴民生艱窘查例載私鑄銅錢數至十千以上或雖不及十千而私鑄不止一次爲首及匠人俱斬監候知情買使者發新疆給官兵爲奴又收買私錢及剪邊攙和行使在十千以上者發各省駐防給官員兵丁爲奴各等語亟應由司出示申明例條通行曉諭並令各項鋪戶平減物價不准高擡自示之後錢鋪倘再收買攙和行

使立提鋪東按例治罪毋稍寬貸合行飭遵爲此札  
仰該某某立即會同臬藩司遵照前指剋日會銜出示申  
明條例通行曉諭嚴禁仍將遵辦緣由報查毋稍遲  
延速速

批延建邵道稟

據稟鄭外村人攔排勒詐放銃傷人迨弁兵到地尙  
敢列械抗拒不詐不休玩法已極此種蠻鄉何以不  
乘擢勝右營駐延時認真查辦保甲至今未有門  
牌足見建安縣令辦事模糊迺口縣丞又疲玩不振  
殊屬可恨仰卽嚴飭該縣並縣丞剋速會同營勇彈

壓查拏務將滋事首要各犯按名悉獲馳報究辦如  
再疲延卽行詳請叅撤毋得寬縱切切此繳

批臬司稟

此次禁止設局護排及看河各名目另派練兵駐巡  
原爲體恤商艱起見茲據詳練兵住屋及夜間燈油  
伙食水大需用小船旣由該商等情願備應姑准照  
行練兵自有月得餉項輪派駐巡分所應爾斷不准  
再向木商需索供應或怠於巡查致有失事如敢故  
違除將該練兵斥革提辦外該管營員併干撤叅不  
貸卽分移三練營暨行府縣一體遵照繳

咨兩江督部堂開禁運米

爲咨請事爲照閩省出產米糧不敷民食常年尙須取給於鄰省上年秋收歉薄入春以來米價漸昂近來每石貴至四千八九百文現在開倉平糶將及兩旬勢難爲繼而由滬運閩米石前經咨請

貴爵部堂開禁放行迄未接准咨復實深焦盼近聞直隸閣爵督部堂李以津沽米貴咨請

貴爵部堂放運米十萬石已蒙照行况閩省年准免稅米二十萬石係

奏明定案去歲尙未購運如數卽經禁止本年顆粒未

運米糧爲地方安危攸繫不得不再行咨請爲此合  
咨

貴爵部堂請煩查照體恤鄰疆希卽轉飭上海道照  
案仍舊給照放行實紉舟楫望速施行

批候補同知直隸州沈

受謙稟

查該員係同知直隸州雙補人員若論儘先班次應  
補過班既有數年何以迭次同知缺出未聞該員稟  
訴豈該員才具獨優於直隸州不優於同知耶缺出  
應量才錄用如主事保送直隸州到省係由京官奏  
旨特用例章應行儘補各省頗有序補候補人員豈該員

必應補龍巖州耶仰福藩司查明例案詳辦案關自行稟求補缺似非政體所宜如果實係妄干卽行詳明懲處此繳稟鈔發

批莆田縣徐令

承禧稟

莆邑民情蠻悍若使刀會銃會盛行則鬪擄之風更不可收拾懲創於初起之時洵屬權衡至當據稟辦理情形甚爲勇往可嘉之至黃妹十旣爲會首又前犯吳燭五二命案仰福建按察司飭縣一併嚴訊確供卽行稟報懲辦其餘各犯並卽訊明分別稟辦仍查明各鄉刀銃會之風能否止息另行馳報察奪均

毋緩延切切此繳

批羅源縣稟營員不將兵丁解質

查營兵犯事被人供指無論犯供確否總當開革解質實則治罪虛則復伍乃朱副將委署游擊甫經到任卽行護庇兵丁殊屬大員委任除檄飭該署游擊遵照卽日將營兵黃陞平等開革解送該縣收訊倘敢再延定卽撤叅外仰福建按察司卽速轉飭遵照一俟營兵解到卽行提集訊究確情議擬詳辦毋延

繳

批汀州府稟



查戴慶吳係剋扣兵餉

奏參革職人員茲復貪利妄爲逞刁健訟並敢戴用翎頂公堂不跪自稱未革此種武斷鄉曲之人應卽行查敘劣跡照例詳請懲辦仰福建按察司會同布政司卽速轉飭遵照辦理仍將本案催集訊斷完結具報毋延此繳  
批釐金罰款

據稟已悉仰閩省稅釐局司道核飭遵照奸商偷漏釐稅固宜嚴緝究罰第罰款充公自當查照定章豈容格外苛勒本部堂訪聞省外各局卡緝獲私販多

有例外重罰收多報少甚至委員司巡通同一氣賄賂縱放侵漁中飽若輩但知徇一己之私罔顧商民之累徵餉之虧言念及此深堪痛恨并卽由局速議罰款畫一章程詳明通飭遵辦並隨時稽查倘有不肖之員受賄縱放立即從嚴詳請撤參毋稍寬貸繳批馬巷廳黎景嵩請撥勇辦理稅契稟

查閩省各屬稅契之弊在胥役者什之七八在業戶者什之二三業戶置買田產多吝惜稅費過業而不過戶遂致戶糧混淆胥役得以舞弊遂其欲則代作隱欺之計拂其意則陷以抗稅之名官長以稅有盈

餘多樂從其請官不過稍分餘潤而小民之脂膏遂盡歸於胥差之中飽本部堂前撫閩時已深悉此中情弊該署俸到任數月於愛養百姓整飭地方之道絕未聞見而汲汲於嚴辦稅契據稱許文慈等把持抗稅有何證據以爲從政之道莫重於此耶抑從此入手可以假公濟私歟仰福藩司轉飭知照所轄民戶隱匿稅契必須查實諭催如違照例究罰不得率請會營撥勇並行泉州府一體飭遵繳

批延平釐局茶片章程

據稟暨摺開各條均悉仰閩省稅釐局司道卽速核

明飭遵具復至各局卡需用司巡應聽該委員自行  
選派不准再由總府局薦任曾已飭局通行有案茲  
據摺陳如查係府局派任司巡弊弄云云可見各府  
局仍沿痼習視前飭爲具文並卽由局查明再行通  
飭遵照不准濫薦擅派干咎在延水師礮船應如所  
請以一號駐防東西兩卡一號移駐西塔下地方常  
川梭巡并由局移營遵辦繳摺存

批惠安縣槐窰鬪案稟

知縣爲親民之官各鄉積慣糾鬪棍徒平時漫無訪  
察臨事仍同海捕殊堪痛恨此次勞師動眾務須拏

獲爲首主謀及下手正兇從嚴懲辦以彰法紀不准  
買兇頂替及拏從犯塞責並科派夫價兵費了事有  
一於此定當登諸白簡仰福建按察司卽速移飭該  
文武遵照辦理毋稍縱延繳

批建陽李令虧空稟

錢糧係

國家正供例應隨徵隨解豈容擅自挪用該員建陽任  
內用款卽主考學院過境供應每次用至三千餘  
兩設使屬實該員如此花銷諂上輒敢形諸稟牘猶  
不自知其非卽此一端已見糊塗昨據司詳請叅經

本部堂面諭該司暫緩監追仰福藩司會同督糧道  
立即嚴飭該員李聯琨將短解正雜各款銀米限令  
一個月內如數措繳倘再不知自愛逾限未完定即  
復叅監追從嚴懲辦決不寬貸繳原稟清摺鈔發

批同知倪濤稟

在省候補人員如果辦事廉能遇有差缺方且求才  
不暇何致沉滯乃各員不知求已轉來干求上司奔  
競鑽營尙復成何吏治該員具稟干請實屬冒昧糊  
塗仰福建布政司即將試用同知倪濤記過停委一  
次以昭懲戒繳

批福清縣朱令 幹隆稟

州縣到任先受點規遂使糧書得以要挾浮徵需索無所不至整頓糧務先除規費具徵該令見義精確糧書事有責成不得無過更換前據甌甯吳署令具稟業經批司照行仰福藩司核明立案飭遵并通飭各屬一律遵行毋任玩違繳  
通飭種棉織布札

爲通飭曉諭事嘗聞古人有言一夫不耕或受之饑一婦不織或受之寒我

向宗純皇帝御製耕織圖說系以

宸翰崇本抑末鉅細兼該

經國大猷貽謀萬世其所以爲吾民計者至深遠也閩省濱海瘠區地多磽确近來種茶太盛頗礙農桑而於種棉織布之法講求者更屬寥寥統計每年食米旣須江滬接濟卽棉布一項販自蘇松者約二十萬束值銀一百二十萬兩其從浙江江西來者尙不在此數民間素乏恆產又少別項生計歲耗金錢數百萬流而不返無怪乎生齒日繁生機日促方且凍餓是虞又奚暇治禮義哉本部堂曩撫是邦深知吾民疾苦曾於耿莊設立桑棉總局導民紡織嗣以乞養去



官未竟其緒前歲重蒞茲土竊取張益公拔茶植桑  
遺意將各屬農田水利通飭查明勸禁在案近又邀  
同紳董籌撥經費於省城創立織布總局以期漸推  
漸廣俾吾民稍濬利源蓋男耕女織事有常經布帛  
之用與菽粟相爲表裏誠能由近而遠由少而多教  
之有方行之有效將來就地種綿紡紗自成杼柚非  
特白傅爲裘其免單寒之苦抑且敬姜猶績隱杜逸  
慙之萌其關係地方之肥瘠風俗之醜瀉實非淺鮮  
查全省下游各屬粗知紡織上游延建等處均資販  
買谿山險峻布價較昂貧戶無力購取每屆嚴冬歲

暮士結鶉衣民擁敗絮朔風積雪羣相號寒本部堂  
深爲憫惻且夫爲民父母因地制宜使民無凍餒憂  
者良有司之職也爲民表率因勢利導使民敦本善  
則交相勸勉以底於成者亦地方紳士之責也案據  
福州府閩縣學生員林齊霄采輯勸織簡明事宜一  
卷呈請通飭延建等府縣籌費設局並由該生隨時  
往晤紳耆詳晰勸導共敦本業等情察閱所呈甚爲  
周密具見留心經濟眷念梓桑誠堪嘉尙此舉推行  
之始延師招徒購辦機扣固須寬籌經費方能措置  
裕如第按勛授紗按尺輪布資本無論多寡人材無

論智愚其利旣屈指可計其學亦轉盼可成非若別  
項股分不無虧折耗散之處留心經世者何所顧慮  
而不毅然爲之此則本部堂區區期望之心所不能  
自己者也合亟札飭爲此札仰該道司通飭一體遵照  
迅卽傳集公正紳耆設法妥籌開局試辦務須按照  
勸織事宜內所陳各條逐細查核擇賢任事毋得任  
聽胥吏把持弊混致滋折耗仍將奉文遵辦日期暨  
在局紳董各銜名先行馳覆該道司並須隨時督飭如  
果一二年內實在辦有成效應准查明詳請分別記  
功給獎以示鼓勵此係本部堂特飭要件各該府廳

縣身任地方任聽斯民號寒而不知救又焉用是司  
牧爲尙其認真勸辦協力推行以興大利而紓積困  
毋得視爲具文空言搪塞大千叅咎凜之望之特札  
批邵武恆守

齡稟

據稟委員王廷芝等藉端勒索賣放私土由府提訊  
司事過付人等供證確鑿如此不肖之員斷難姑容  
亟應分別撤委提集全案人証解省澈究叅辦以儆  
官邪該守不避嫌疑據實稟陳可嘉之至仰閩省稅  
釐局司道會同藩臬兩司遵照辦理並行該府知照  
繳稟鈔發

批甯紹台道請通飭救護遭風船隻稟

惻隱之心人皆有之華洋船隻遭風觸礁危在須臾就近地方文武自應立時設法救護一面通報移會辦理若以地非本牽猶或意存推諉佯爲不知其人天良已喪尙可以爲民牧耶沿海居民乘危搬搶甚至毀船逐客此風尤不可長自非嚴行查禁認真拏辦何以示懲儆而挽頽風據稟所見甚是除通飭定海温州海門三鎮提中鎮海兩營及甯波温州台州三府轉飭所屬沿海各廳縣營汛遵照辦理倘敢視爲故常仍蹈前轍定行撤叅不貸外卽卽由道出示

曉諭分給沿海各口岸懸牌張掛隨時嚴密稽查遇  
有前項情事分別嚴叅重辦並移會溫處道一體飭  
遵仍候

南洋大臣 撫部院 批示繳

批臬司詳酌議讞局各員委缺章程

所議讞局各員審結京控等案二起以上應改爲三  
起以上尋常命盜等案十起應改爲十五起詞訟稟  
案二十起應改爲三十起方准詳明歸入新章插委  
以昭核實至正副提調自行承審案件應照前數一  
律計算其督審案件應每屆半年共結若干專文開

報察奪若僅定二十五起之數恐不免通融消納應  
毋庸議餘如所詳辦理仰卽轉飭知照但此爲鼓勵  
起見論賞而不論罰其有經年累月不能審結一兩  
案者應如何嚴行懲處並卽由司議覆飭遵繳

批臬司詳讞局各員審結各案起數

據送清冊存查以之考核功過尙未見確卽如李子  
茂遇案不發一言何能審結四起卽爲明証仰臬司  
會同藩司另行考核具詳繳冊存

據詳已悉如錢大昌僅結案兩起日命日盜日雜案  
名自己不止二起矣新任張臬司曾任福州府暨臬

司篆務熟悉讞局情形仰張臬司會同藩司查明積案若干定限飭催審辦完結俟限滿審結多寡另行考核具詳繳摺存

批署南平縣恆秀詳曹亨生被搶拒斃

地方官籌辦冬防最關緊要何以屢有失事並未破獲該署縣但計缺分之盈虧而於保甲捕務絕不講求殊屬有忝厥職仰福臬司飭速會營勒比兵役懸賞購線上緊嚴緝並移鄰封營縣暨責令該處鄉聯一體查緝此案兇賊務獲馳報究辦案關賊匪持械夥搶拒殺事主毋再泄玩縱延致干撤叅留緝此繳



圖存

批署南靖縣金玉堂稟

丁胥四出查徵稅契必難免騷擾需索百姓固有刁健者官亦未能盡屬循良此案由司委員確查該令恐其查實致干重咎爲先發制人之舉尤屬刁詐仰福藩司俟章令稟覆到日核明詳辦繳

批藩司詳南靖縣例貢簡贊平控浮收稅契

此案昨據南靖縣金令具稟當經明晰批司在案該令徵收稅契照舊章加增城鄉不一甚至無業小戶派徵苛索種種累民實堪痛恨旣據委員章令查復

與簡贊平等原控情節大畧相同亟應提省訊明懲辦仰卽會同臬司飭提家丁朱二等並摘傳過付原告人証解省審辦倘指控之家丁有一名不到卽將金令先行詳叅毋延繳

批稅釐局詳土布徵釐

查閩省外來布疋銷數甚鉅福州土布甫經試辦本銀不過千餘所出之布甚少於稅釐尙無關礙何得謂土布盛行明係江浙布商藉端希圖減釐各路布販影射偷漏局員司巡不能認真稽查輒以徵數日少歸咎省城織布該司道又不爲詳察任聽瀆稟以

命  
鳩工之盛舉而稍惑於龍斷之浮言其與開局試辦  
之意殊未盡合惟土布免釐易滋弊混亦係實情自  
應畧定抽數俾各局照章查驗以杜影射而免藉口  
現在講求尙未精緻布粗價賤售價無多議照江浙  
布釐六折抽收於該局織布本利曾否劃計應否於  
布頭另織記號俾資辨認仰卽會商織布局紳士悉  
心酌定詳候核奪倘日後土布果然盛行進出口均  
應照章收釐自必無分軒輕該委員等均毋庸總總  
過慮並飭知照繳

批福州府詳報私鑄小錢人犯張可正供詞

閩省圜法之壞由于銷燬制錢私鑄小錢者多耳遇案懲辦尙恐驟難挽回此案經尙幹保甲局委員會同楊遊擊訪獲二犯并私錢制錢及私鑄器具當場並獲事係確鑿乃發讞局數月之久該二犯僅認受雇幫工并不認首犯匠人亦無銷燬情事實屬種種避就現供絕無確證照例亦應監候待質仰福臬司卽速核明嚴飭分別拏解審辦逸犯李阿三等如不到案張可正張辣二犯斷不能開釋也繳

照會温州鎮總兵周

振邦

爲飭遵事照得武營積弊甚多當此整軍經武之時

各會

亟應嚴查禁革以肅營政本部堂訪聞温州各營陋規竟有糧底名目補守兵一名給前兵糧底洋二十四元本營上司叅遊以下均須送茶價四五元不等約計一名守兵花費至六七十元之多守兵升補戰兵自得糧底二十四元其與前兵及上司等項類多如此瑞安亦然是以營務日見廢弛此項陋規若不嚴行革除何以肅軍令而重營務台行飭遵爲此牌會該某各立即遵照嚴飭該營將前項陋規迅速禁革並將此外有無別項需索情弊查明具報至拔補額兵應如何認真整頓亦即由鎮妥議章程稟候核示

飭遵毋得稍涉違延致干叅咎凜之

批織布局員紳稟

織布種棉本部堂前撫閩時早經勸辦此次重蒞閩疆既將利民之苦衷開誠曉諭復將與織之鉅款設法捐籌幸賴各員紳協力助勸一年以來稍著成效吁其難矣土布加釐勢難推廣民徵官免亦非大公據稟籌議各節尙係實在情形究應如何辦理方臻妥善將來織務盛行堪否援照廣西綢疋成案

奏免出境稅釐仰福建布政司會同稅釐局司道核議詳覆察奪至布頭擬用印記兼用官局發單似屬可

行并卽核飭遵辦毋違繳稟鈔發

批長汀縣何紹堂稟

賴志善如果自知僞照何敢繳驗且稟繳監照請加結申送究因何事來詳未據叙明乃波及婦翁請革廩貢生陳懷清衣頂殊屬無謂仰福藩司會同臬司核助遵照仍錄批報明

學院繳

批汀州鎮稟留桂勇中旗朱守上洋稟

所請原屬可行惟該守帶勇駐汀於濯田鄉會匪滋事并未拏獲首要又有營勇曹鴻養飲酒滋事被毆

自盡在防殊不得力此後倘能振作尚可寬容如再似此毫無紀律應卽行裁撤另換營勇前往接防毋謂言之不預也仰卽轉飭遵照繳

批副將胡德超請免繳賠修銀兩稟

本部堂十四年履任卽知延平礮船損破船擱岸側船勇不過兩三人在岸搭篷居住管帶官則覓屋安居是以將梁副將撤回委令黃副將開甲前往接帶認眞整頓來稟云黃副將管帶未久卽稟損壞請修足見早已損壞又稱黃副將推諉趨避旣是管帶未久何所用其諉避該將遁詞支飾顯然易見飭賠經



年并不趕緊措繳茲忽具稟請免實屬膽大糊塗著  
限一個月照數賠償倘再遲逾定卽據實叅處不貸  
仰福建善後局司道轉移遵照繳稟鈔發

通飭浙省勸辦育嬰札

爲通飭遵辦事據西安縣知縣伍桂生稟稱卑邑民  
風本極樸實惟溺女一事則殘忍兇毒出乎情理之  
外卑職到任之後申明例禁諄切曉諭並刊發傷心  
歌萬本發交保甲各董徧加傳諭冀以挽回一二無  
如此等惡習不惟法令有時而窮卽地方公正紳耆  
亦有不能家喻戶曉之苦在本人初亦不知所生是

男是女而一經臨盆頓起殺機猝不及防呱呱者乃  
慘不忍言矣究其所以殘忍至此實由於生計維艱  
苟有可生之路何必定置死地卽如郡城設有嬰堂  
附郭一帶此風稍戢此其明驗因定議四鄉各勸設  
嬰堂一處每年每處各先由縣捐錢一百千文三載  
以來辦成者僅止西北兩鄉北鄉紳董程思僕等捐  
集鉅款於杜澤地方創建育嬰堂設爲收養寄養兩  
法收養則於堂內雇覓乳婆寄養則聽人領爲媳女  
貼給乳資又必須有切實可靠之人具保方准領去  
以免長大掠賣之虞計自開辦之日起未及三年已

有三百數十口之多卑職捐款按照上下忙給領備用此北鄉創設嬰堂大畧情形也西鄉地方尤覺貧苦將舊有小九華山寺各僧併歸上院酌留租息爲衣食之資其下院正屋改建毓秀書院餘屋作爲西鄉嬰堂諭由紳士詹熙等承辦查寺產充公項下除山租變價生息每年得錢二百數十千文與城內鹿鳴書院四六分撥外其穀租三百餘石及卑職年捐錢一百千文專作嬰堂經費猶恐不敷復據該紳等公同勸辦隨緣樂助不使缺乏其辦理章程亦仿照北鄉收養寄養之法兩月以來收有二十餘口此西

鄉創設嬰堂大畧情形也東南兩鄉雖經詣諭紳董勸辦尙未有頭緒現在卑職調署錢塘縣事交卸在卽擬照案移交新任徐令勸辦當可次第成就惟此項捐款現僅每年二百千文若四鄉辦成應須四百千之多深恐後難爲繼轉致爲德不卒查卑署舊設銀匠兵燹以後未有新充而錢糧經前撫憲於減浮案內

奏明折色現由卑縣交省城官銀號傾解無須就地傾鎔該匠飯食等項不無浮支酌量撙節每年約可省得數百千文卽以此項爲捐助嬰堂之費有贏無絀

節無名之費爲有益之用于本缺無關出入可久遠  
照行理合稟乞批示立案間有未及舉辦之處可否  
通飭各屬查明設法勸辦以挽惡習等情到本部堂  
據此查生女溺斃應照故殺子孫律杖六十徒一年  
族鄰保甲知情不行救阻連坐治罪煌煌

國法何等森嚴豈容稍有違犯况親生骨肉甫離胎殼  
一旦置之死地誠如該縣所云出乎情理之外惟府  
縣例設嬰堂多在城鎮僻壤窮鄉勢難徧及各該令  
果能籌款捐廉分鄉勸辦真切講求洵足化殺機而  
全生命江西六文會章程以各村救各村之溺簡而

易從曾經王檢討邦璽

奏請通行有案閩省溺女較多現經本部堂剴切曉諭  
有犯必懲各屬設局收養棄孩并行助養抱送良法  
著有成效浙省紳民好義善舉必周尤賴地方官隨  
時隨地實力推行庶幾保赤誠求無遠弗届除稟批  
准立案外合亟通飭爲此牌仰該府卽速遵照轉飭  
所屬各縣認真督同公正紳士一體仿照設法勸辦  
盡心化導力挽頽風倘能量力捐輸添設分局自當  
給予獎叙以示鼓勵仍將遵辦情形具報查核毋違  
批甯德縣稟東冲釐卡哨丁攜索由

據稟林燦清係已革關哨復充釐局哨丁膽敢故違  
禁令與林益鑑等勒索干水肆行毆擄實屬愆不畏  
法亟應從嚴懲辦以儆效尤惟案歸該縣訊辦勢必  
有所藉口該處釐局現已改委成令心中前往接辦  
應先將東冲釐局委員丁倅策勲摘去頂戴勒令將  
哨丁按名交出送由福甯府嚴守提集訊究稟辦唐  
帶帶等控案被告亦係該局哨丁應由該府一并提  
訊歸案辦理丁倅倘再徇護不交定卽叅究毋謂言  
之不預也仰福建按察司會同稅釐局司道卽速分  
飭遵照并飭羅源縣知照繳

批海門鎮稟游擊被拒受傷縣令稟報不實

台州盜匪充斥地方官仍復姑息養奸化大爲小曲  
爲開脫此等婦人之仁貽悞地方殊堪痛恨太平縣  
胡令因何改刪情形仰浙江按察司卽飭府確查據  
實覆辦一面飭縣會營嚴拏逸匪毛大化三及匪黨  
毛鴻豐等務獲究報如再犯不弋獲卽由該司會同  
藩司詳請本部堂

撫部院嚴叅將胡令撤任留緝以示儆戒仍候

撫部院批示繳摺存

批汀漳龍道劉傳雲稟



吳蠶八繭古有明文房星之精散而爲蠶合而爲馬  
昔人禁原蠶蓋恐其害馬而南方固無慮焉送驗白  
色花紗二疋質美工細的是佳品未知每疋價值幾  
何將來添配機具另織縐疋當必同臻精美但能染  
織五色方易銷售川粵野蠶易養食葉不必皆桑柎  
椽並可參用如川縐南陽縐之類質粗而價亦低上  
游未嘗無桑特採飼無方一時未能獲利耳張益公  
拔茶植桑之法早經通飭勸辦粵人種桑育蠶成法  
前據龍巖州稟送刊本亦經分別批行矣該道實力  
辦理果著成效小民唯利是視漸推漸廣自必捷於

影響行見碧榕丹荔之鄉靡不組織仁義黼黻

昇平本部堂有厚望焉仰卽知照繳

通商局詳英美領事照會教民被擾

教民仍是中國百姓此次派營拏匪與傳教無干斷不能恃入教便可爲匪該教民藉詞挾制殊堪痛恨爲匪之教民應歸中國地方官一律根究按例懲辦况教民有擄人關禁之屋教屋又存長矛三十餘桿確是爲匪憑據亦大背教人爲善之意案關中國百姓擄人勒贖與領事毫無干涉卽稟駐京大臣照會總理各國事務衙門本部堂執法從事亦斷不能遷

就也仰再由局照知一面移行遵照仍錄報

爵將軍暨候批示繳

批浙江臬司詳盜犯周應塘糾劫李廷榮一案

盜賊縱橫劫案疊出若煦嫗爲仁意存姑息何以靖  
萑苻而安閭閻此案盜夥六人僅獲三犯以死者爲  
首餘多臨時不行事後分贓或不分贓顯係開脫仰  
候

撫部院確核具

題繳

批將樂縣報雨稟

據稟該縣遭水東鄉山崩田畝多被沙石所壓北路  
濱河之區大畧相仿豈北路亦山崩石壓耶語不明  
晰且各鄉水淹晚禾尙須補種又有傷損田畝何以  
言尙不成災一片模糊殊屬費解仰福建善後局司  
道飭速詳晰稟覆察奪毋延繳

批遂安縣侯

瑋森

眠牛堰開荒稟

農田水利爲地方根本重務牧令爲民父母自當隨  
時履勘認真督率勸辦以備旱澇而易田疇據稟修  
復眠牛堰興竣情形具見關心民瘼深堪嘉悅第念  
浙省前遭兵燹惟嚴州蹂躪最甚迄今蔓草荒烟元

氣尙未盡復全賴地方官貴粟重農興利除弊勞來  
不倦董勸兼施庶幾清剛治風復見豐亨氣象勉之  
望之仰浙藩司速飭嚴州府通飭所屬各縣一體遵  
照辦理毋違繳

解散德化亂民陳拱羽黨示

爲剴切曉諭事照得德化赤水等鄉前因武童陳拱  
等與鹽館挾有宿嫌藉端聚衆毀卡殺人將縣官圍  
困考棚意圖挾制迭據該管文武稟請派兵剿辦經  
本部堂以陳拱並不來省控訴輒敢糾衆滋事固屬  
罪無可逃而樸戶翁有光需索擾民該州縣局員不

能體恤民隱先事預防亦有應得之咎據實

奏請將永春州劉朝縉署德化縣周廷獻候補鹽大使  
孫星華一併革職查辦并飭拏翁有光到案監禁比  
交翁棟嚴行審辦一面飛檄各營兵勇陸續前進分  
別剿撫去後旋據該縣馳報各鄉民以大兵將至於  
八月初九日退散並經官弁民團截拏格殺等情又  
經本部堂深憫鄉愚無知分檄各兵勇免予窮追由  
縣出示曉諭專拏首犯脅從罔治是本部堂辦理此  
案始終爲愛民起見各該鄉紳耆人等理應深知感  
激約束子弟各安各業立將首犯查明捆送以贖前

命正書 卷四  
愆乃一月以來訪聞該犯陳拱等自知罪大藉詞報復并以永免鹽課貨釐等語聳動愚民附近各鄉因與陳拱陳衆多係同宗深恐事後連累不無袒護觀望首鼠兩端豈知該鄉民前係自罹法網於人無尤何從報復父子兄弟之間功罪尙不相及何況同宗何虞連累鹽課貨釐乃

朝廷維正之供普天率土同此輸將何能獨免此理甚明賢愚共曉卽有外來匪棍交相煽惑闖境安危所繫豈無一二老成醇謹之輩稍知大義勸令各鄉切勿聽從乃聞陳拱等復糾衆樹旗欲圖負嵎抗官形

同叛逆現已傳檄各路兵勇三面並進候示剿辦而  
本部堂始終愛民之意仍不忍概予駢誅合亟剴切  
示諭爲此示仰各該鄉紳耆家長暨四民人等一體  
知悉爾等食毛踐土各有身家豈可任聽匪人自取  
奇禍示到立即解散仍准概免查拏如有將陳拱搨  
送者賞銀五百元有將其弟陳衆及外來匪黨搨送  
者飭縣從優給賞陳拱之族長宗人有遵示辦理者  
一律給賞決不株連經此次示諭之後倘仍執迷抗  
拒則是冥頑不靈甘心爲匪本部堂唯有嚴飭各營  
四面兜捕大兵壓境玉石俱焚不能再爲爾等曲宥



也其各凜遵毋貽後悔切切特示

永春州劉

朝縉

稟德化匪徒拆毀鹽館等情批

樸戶惟利是圖操切從事致肇釁端該州及孫大使均難辭咎况該州前此稟報尙謂周令張皇此稟又十分緊急州城距德化僅三十里何以頭緒茫然昏憤至此除已電致並飛咨

孫軍門速派大隊星夜馳往應援並於縣稟批飭將孫大使撤差查辦嚴拏翁有光等訊明懲辦外仰卽督縣妥速曉諭解散匪黨一面確查嚴拏爲首匪棍務獲懲辦治民與治賊不同兵勇到地亦應先撫後

拏如敢持械抗拒照律格殺勿論以肅法紀而靖地方仍將查辦情形隨時馳報察奪切切此繳

德化邵令

書升

稟鹽館釐局被毀請兵批

昨已電致并飛咨

孫軍門速派大隊應援頃又飛飭駐紮興化之擢勝右營蕭提督宗雲統帶全營由風流嶺逕赴德化會辦以期迅速矣該令甫經到任德事毋庸迴護儘可剴切曉諭將鹽務積弊稟明辦理樸戶翁有光嚴拏究懲困官於考棚而不敢加害是尙有畏法之心挾其起釁之由消其不平之氣未有不幡然思改者乃

該令一再具稟請兵絕無勸諭解散之策直與劉牧  
同成本備耳孫大使星華已撤差查辦稜戶翁有光  
館哨翁棟已批飭拏辦大兵不日可到應解散匪黨  
脅從罔治仍嚴拏糾眾滋事首要各正犯務獲按法  
懲辦以靖地方仰永春州卽速督飭遵辦具報毋延  
此緞

永春州稟德匪請勇會辦批

劉牧初六日所發兩稟初七八日各發一稟同日收  
悉昨接孫軍門來電德匪初九日業已解退但不知  
退往何處胡營官帶勇三哨諒已抵德辦理如何情

形邵令到任之次日卽行起事措手不及情尙可原  
事後亦不得飾詞冒功蕭提督宗雲所帶擢勝右營  
飭由仙遊風流嶺徑達德化馭漳之擢勝後營已飭  
伏波輪船載送回泉繼進泉州至永春一路由

孫軍門就近調度德化路通大田已調建甯羅鎮大  
春親督福字左營及延平順昌練兵由尤溪大田進  
發上游恪靖等營均聽羅鎮調遣諒德化鄉愚烏合  
之衆當必聞風瓦解也該匪並未戕官自非謀反其  
爲鹽哨激變無疑各稟均稱陳拱卽陳開成爲首惟  
周令廷獻稟稱館夥以陳開成與其東有仇創言如

此有陳江泰結保陳開成並不爲匪等語究係何人爲首糾鬧必須確切查明嚴拏懲辦解散餘黨以彰國法而定人心樸戶翁有光籍隸晉江館哨翁棟必其族人應由晉江縣一體嚴拏務獲解辦仰代理州張牧卽行查照辦理并移飭遵照繳

興化府稟仙遊何令請將原勇留駐等情批

蕭提督所部營勇原飭由仙遊風流嶺馳赴德化縱有匪來正是迎頭截擊且前據該府等稟報派撥練兵往仙何以仍須留勇駐守該府縣恇怯無能昧於事機猶幸德化之事已定若皆似該府縣如此倉皇

要得多少兵勇方能壯膽耶所請應毋庸議仰卽轉飭遵照仍令查探防範毋稍疎懈切切此繳  
德化邵令稟大兵雲集請發餉批

據稟陳拱尙在各鄉煽惑匪徒仍有百數十名之多誠恐愈集愈衆等語該令於匪徒退後并不嚴拏首犯解散黨羽坐守縣城一籌莫展豈非任聽愈集愈衆耶庸闇無能何堪作宰仰永春州張代牧督同該令并知照委員舒倅會同妥速辦理至該縣米價昂貴軍食關重前經本部堂批飭泉州府借撥釐款購米運濟在案茲據稟前情應再由州撥動釐款採買

米石迅速運濟均遵批辦理毋延繳

永春州張

元鼎

稟匪黨復行嘯聚批

查陳拱自前月初九日退出後黨羽無多迄今一月之久該縣竟無法擒捕致該匪復行嘯聚自問當得何咎據稟該匪將貼示差役二人殺斃顯係有心抗拒其聚眾祭旗究在何地何日現今擢勝三營俱至該縣

孫軍門又飭練兵全營赴州兵力不爲不厚仰卽督縣商同各營官卽速進兵捕拏如敢抗拒卽照律格殺勿論毋得姑息養癰切切仍將辦理情形馳報毋

延尤溪縣已飛飭防範矣繳

德化邵令稟覆陳拱與鹽館爲仇批

據稟已悉陳拱現復聚衆圖逞擢勝三營已全至該縣又有泉州練兵全營赴永春州駐紮

孫軍門不日親臨調度另飭賴副將安邦帶練兵由尤溪進防大田文副將占魁帶凱字右營赴尤溪防剿建甯劉署鎮端冕帶福字營至尤溪督辦羅總兵洪標帶建威右營練兵至仙遊鶉鴿嶺扼紮布置已極嚴密該印委亟應振刷精神隨同設法分別解散擊辦倘敢拒捕照律格殺勿論前次滋事該令尙可



云措手不及迫退散一月之久無法捕拏致復嘯聚  
倘再不知愧奮卽速捕獲致匪蔓延定行嚴叅治罪  
仰卽知照繳排單存銷

永春州張牧稟陳拱復聚請兵批

來稟與

孫軍門咨報相同陳拱退散一月之久擢勝營勇早  
經到縣邵令並不會同跟追捕拏養癰貽患殊屬可  
恨現擢勝三營全在德化又有練兵全營赴州駐紮  
本部堂已剴切給示徑飭德化縣張貼并電請

孫軍門親往調度已接電復俟南字一營到泉填紮

卽可啓行另飭延平協賴副將安邦帶練兵出尤溪  
進防大田副將文占魁帶凱字一營馳赴尤溪防剿  
並飭建甯劉署鎮端冕帶福字營勇親至尤溪督辦  
似此重兵兜捕諒陳拱亦釜底游魂耳邵令庸懦無  
能該代理牧毋庸遽行回州應會商在事文武上緊  
設法分別解散拏辦如果抗拒格殺勿論仍將辦理  
情形隨時馳稟或專差至泉電報更速仰卽遵照繳  
批永春州稟

本月十四五日兩稟均悉所議分路進兵及籌辦一  
切均甚周妥應卽照行其崎嶇兩路不能進兵者亦

須在隘口嚴行遏截防其逃竄總以速散餘黨元惡  
就擒是所望切戴雲山法林寺竟爲該匪巢穴將來  
應行入官仰卽遵照辦理繳圖存

尤溪縣許德新稟賴營留尤守城批

用兵須擇緩急若不聽調度紛紛請留兵分見單必  
致貽誤本部堂飭賴副將練兵進防大田卽電飭建  
甯劉署鎮帶福字營勇又派文副將占魁帶凱字右  
營馳赴尤溪本是兼籌并顧該署縣先稟兵宜守口  
不可株守縣城茲復稟請守城辦理諸多錯亂無事  
如此有事奈何福字營勇已於十四十六日過延文

副將全營又兼程前往兵力已厚賴營須速往大田扼要防剿倘再延緩致匪竄大田賴副將與該署縣恐不能當此重咎也

孫軍門已於十八日督隊親往承德調度尤溪大田一路責成劉署鎮督飭認真防剿不得任匪旁竄仍將查探及防剿情形隨時馳報除分行外仰卽遵照繳

延平府唐守

寶鑑

籌辦防務批

據稟延平爲尤溪後路城守空虛雖係實情惟守城不如守隘現在各路營勇均已調赴前敵尙恐不敷

分布安得更有如許重兵分駐城防耶該守自應迅  
辦民團聯絡城鄉紳董互相保衛并移鍾王兩營派  
哨巡路以壯聲威恪靖中營戴鎮所派之勇想當在  
城防守當與該哨官認真巡察尤溪胡令已飭暫緩  
到任唐署令緩卸一節行司酌核辦理仰卽知照繳  
劉鎮端冕稟由尤溪出紮日期批

據稟赤水峽爲四縣往來要道距德化後宅等鄉甚  
近該署鎮帶隊親赴該處相機防剿所見極是與本  
部堂昨日照會飭由尤溪大田一路前進約會  
孫軍門駐德各營兩面兜剿此意不謀而合足見老

於軍事勇往直前深堪嘉尙該匪負嵎圖抗本部堂  
先已剴切曉諭而仍冥頑不靈非大加懲創不可昨  
交廖總兵得勝帶致一書以大田爲要緊廖營到日  
卽望相機調度飭令遇賊卽剿切不可被尤溪留住  
守城練兵不如楚勇應令楚勇赴前敵如尙不足准  
照前飭募補成營賴副將練營留守尤溪可也仰卽  
遵照仍將剿辦情形馳報切切此繳

批永春州德化縣稟

據稟暨告示閱悉現在陳拱聚黨無多勢已窮蹙惟  
深處山谷必須覓購熟悉路徑之鄉人作綫引導嚴

密剿捕以期得手四面堵截以杜竄逸此次已用全力不獲陳拱事終不了亦難以

奏報如格斃之陳水許達不能藉以搪塞也仰卽會商認真辦理一日須發一稟以慰馳系繳告示存

批大田縣柯先春稟

據稟暨另單閱悉兵以分而見單守城不如守隘且練兵不如楚勇自應以楚勇當前敵並應稟候劉署鎮酌量調度乃該縣擅請練兵出紮將楚勇兩哨駐城留以自衛麻木不仁實堪痛恨亟應飭令廖總兵統帶全營出紮各隘口堵截竄匪仍聽候劉署鎮調

派助剿并由該縣妥購鄉導其賴副將練兵應調回  
守城俟廖總兵到隘後賴副將再行回城各將遵辦  
情形具報除分行劉署鎮廖總兵賴副將遵照外仰  
卽知照暨候

陸提督批示繳

批建甯鎮會商進兵稟

據稟匪旣無多地亦不廣所未到者戴雲山十三鄉  
耳兵與賊何日得見深切馳系仰卽會商

孫軍門分路進剿迅奏膚功倘陳拱兄弟不獲查由  
何路竄逸卽將何路何營官弁一并叅革不貸廖總



丁未年正月三日  
兵一軍調赴前敵賴副將練兵抽回守城已於大田  
縣來稟明晰批行該署鎮所見相合仍將剿辦情形  
馳報切切此繳

建甯鎮稟進攻陳候與情形批  
迭接

孫軍門與泉永道先後咨稟情形大畧相同該署鎮  
現稟係十一日發遞何以遲至二十日始到殊堪痛  
恨候行司澈查嚴懲文副將與余副將等已深入後  
宅鄉訊知陳拱尙在山上自當一鼓作氣搗穴擒渠  
乃復聽該耆族緩期三日殊屬鬆勁與泉永道十六

日由德化來稟三日限滿仍未交犯豈非墮其狡計  
耶助逆日久之匪鄉亟應剿辦毋庸姑息陳拱陳衆  
厥罪維均必須一并擒獲方能了事山僻數鄉大兵  
四面合圍竟未查出陳拱兄弟踪跡不勝焦悶之至  
仰卽查照會商迅速進兵搜剿務獲渠魁勿被竄逸  
爲要繳

照會建甯鎮并咨孫提督

爲照飭事二十三日酉刻接

孫軍門函開以陳拱兄弟現竄南埕朱地石牛一帶  
賊黨尙有百餘人飭派吳營官等前赴該鄉訪拏等

情查疊次文武探稟或僅結死黨十餘人或三十餘人探查已屬不符其附從各鄉除後宅陳坂黃上林等處懲辦外如果徧地匪民自應次第剿辦何庸姑息至各鄉多係山嶺人地生疎應廣延正經紳耆妥覓鄉導將山徑紛歧之處一一繪圖以爲扼要堵擊之計如營中不識土人可責成地方官購覓與以重賞或允保官階不患無人應募况鄉民果皆暗庇陳拱則勒限緝送徒成虛語適中其緩兵之計各營將皆身經百戰者何竟甘受欺給茫無把握假令一月不緝送便守一月一年不緝送便守一年耶既知久

匿南埕等鄉已確有匪踪可躡何不進兵搜捕現除練兵外已有六營以三千之勁旅不能擒百餘之士賊尙復守株待兔曠日持久使陳拱等乘間脫逃

嚴旨詰問其將何辭以對合亟照飭爲此照會該署鎮應卽約會

孫軍門於適中之地會商四面兜剿之策剋日進兵以期早獲渠魁上紓

宸厯毋再遲延致干咎戾切切

批永春德化會稟陳逆現匿東路雇募鄉丁協擊由來稟謂陳拱陳衆僅死黨數人處處網羅何能飛越

但遷延日久該署牧等能保不疎脫否又謂鄉人咸知助匪者難逃法網惡陳拱而知懷畏然則容其藏匿謂非助逆而何既惡陳拱何以不肯捆送又不肯引拏耶本部堂前囑

孫軍門延正經紳耆將山中紛歧路徑繪圖貼說進兵方有分曉并妥購眼線引軍兜捕而

孫軍門謂難得其人就地購覓綫民繪寫圖說是地方官應辦之事乃未聞該州縣早覓妥辦以致兵駐月餘毫無功效文武皆存婦人之仁不肯將匪犯及助逆之人懲辦守株以待何日是了此稟仍一派空

言藉以搪塞閱之令人憤恨陳拱兄弟既未出境務再盡力圖之勿被漏逸爲要仰卽遵照并錄批報明吳道查照仍候爵將軍批示繳

咨孫提督

爲咨詢事本月初四日准

貴提督咨近日分投飭捕首逆及布置防守大概情形並地圖一紙到本部堂准此查來咨所派各路緝捕之人距初一發文日期遠者已十餘日近者亦七八日究竟捕得如何何以毫無消息派去弁勇不過

二三十人並未約期兜捕陳拱旣匿南埕等鄉約計一鄉居民總有百人合其死黨卽有百餘人去勇少而匪黨多何以抵敵卽見面尙恐拒逃似未必能操勝算且來咨但說陳拱並未提及陳衆卽使陳拱就獲安知不兄終弟及留此遺孽仍爲地方之患本部堂前致

貴提督並劉署鎮會商辦法曾否商及來咨未提大兵四集曠日持久倘被陳拱兄弟脫逃設奉

嚴旨責問深慮無辭以對耳至所送地圖四山未註明路徑是否至今尙未訪明抑

尊處另有圖說相應咨詢爲此合咨

貴提督請煩查照迅速見覆施行

批劉鎮探踪圍捕稟

據稟已悉兵至而賊不見顯係探查不實否則賊方過此去亦未遑緊追嚴捕何致杳然無踪

孫軍門咨報情形亦猶是耳曠日持久良增煩悶仰再確探星馳剿捕速獲報辦各處冬防緊要據請飭賴副將等回防應准照行惟威旂哨勇係該署鎮用熟之人帶同剿捕較爲得力崇安茶市已過不甚緊要威勇恪勇亦令各回各防該署鎮兵恐單薄殊爲



懸系并卽知照繳

札永春州張牧

爲嚴飭事本年十一月初七日據福建善後局司道轉呈據該署永春州知州張元鼎電稟探匪勾結尤溪逢赦革武進士陳文輝懇飭縣查拏邵令已飛致捕陳拱等現用匪黨作綫等情前來查陳文輝係尤溪縣已革武進士因火器殺人案內擬軍監候待質逢

赦並未准免現仍寄禁候官縣監該匪陳拱等何能勾結可見探報竟屬虛妄各弁勇多爲所給以致捕風捉

影陳拱兄弟不但不能就獲并且不得一遇言之殊  
堪憤懣應將該署州嚴行申斥合亟札飭札到該署  
州立卽遵照會商在事各文武確查嚴捕以期陳拱  
兄弟速獲報辦不得輕聽謠傳之詞處處撲空致令  
陳拱兄弟日久稽誅勞師糜餉如違嚴叅切切

批文副將 占魁 移駐華溪稟

據稟已悉生員周維馨旣報匪踪可令作爲鄉導倘  
能擒獲陳拱兄弟准予保獎仰卽會合劉署鎮查明  
迅速追捕獲報毋再遲延切切此繳

諭德化紳民捆送陳逆告示

再行曉諭事照得匪徒陳拱與弟陳衆因與鹽館挾  
嫌構變聚衆毀卡殺人州縣請兵剿辦本部堂以此  
案覺端由稜戶翁有光等索擾而起當將辦理不善  
之印委各官一併叅革飭拏翁有光翁棟務獲在案  
一面出示曉諭專捕首犯罔治脅從乃陳拱不知悔  
罪竟敢糾衆樹旂自稱開國大元帥張貼偽示實屬  
叛跡昭著現時翁有光翁棟均經拏獲發州監禁按  
法懲治陳拱何得日久稽誅且陳拱兄弟一日不獲  
兵勇一日不能退卽吾民一日不能安窮鄉編戶旣  
困於鹽又累於賊本部堂竊深憫之合再出示曉諭

闔邑紳民知悉如有將陳拱陳衆捆送到官者定當從重給賞圖保獎者必爲

奏請官職并將各鄉按戶鹽額卽行減免倘敢容隱窩留或縱令逃竄亦定將各家長人等分飭查明照例拏辦決不姑寬効順則吉從逆則凶其各領悟毋貽後悔切切特示

批劉鎮石牛洞一帶拏匪未獲稟

據稟至白洋山石牛洞水口等處搜捕仍係撲空探報之不實綫民之不得力可知該匪旣竄東北一帶仰再會督追剿并派隊繞出賊前兩面夾擊以期得

手勿再遷延致干叅咎切切此繳

札德化縣赴鄉查稟鄉民飢困等情

札德化縣照得匪首陳拱陳衆兄弟據報未出縣境而至今蹤跡杳然該匪首蹤跡諒能欺官軍而不能欺士民該縣所覓綫民何以全不得力

孫軍門函稱闔邑百數十鄉派出子弟助緝不下一二千人似此聯鄉助緝該匪從何匿跡何以盡託空言迄今不知實在下落該邑驟臨大兵數千兵食宜顧民食尤宜顧迭據稟請採購經費無不立時照准據

孫軍門函稱窮鄉民食大損婦孺飢困難堪何以該縣置若罔聞竟無隻字稟報籌辦本部堂兩次頒發告示是否各鄉張貼該縣迄未具覆以上各節及現時軍情如何民情如何該令并不隨時具稟幾若縣中無縣令者荒謬糊塗實所僅見合行嚴斥札到該縣限文到日逐一稟覆并卽親赴各鄉剴切勸諭鄉民如將陳拱兄弟指拏捆送旣得獎賞又得保舉兵勇卽可凱撤一面優加撫集地方安堵民食自敷該縣務當振刷精神上緊分別辦理如違特叅切切此札

批世職徐繼勳稟

查冒襲止問是否嫡支其上代帶團帶練陣亡久經  
奏奉部議核准在案何得以該世職不知確據遂稱  
其子孫冒襲至行查責成原籍係屬照例辦理該世  
職曉曉瀆稟并不能指實冒襲憑據顯係意圖索詐  
殊屬不安本分此案前據梁副將稟派世職詹式佳  
將兩造解赴各原籍集訊業經批准何以尙未起程  
查梁副將現已病故仰兼署標下中軍副將卽速遵  
照前批催令押解起程仍將起程日期具文報查並  
移各縣知照毋任狡延此繳稟鈔發

批候補典史姚林稟

求差最爲惡習鑽營奔競成何政體惟用人總須秉  
公果人才堪以任使自當酌委試看如果人品卑下  
自不能以公家要務委用非人該司道等務須破除  
情面差委悉出公心則需次人員必當勉趨正路不  
致作無恥之干求矣仰兼署福藩司臬司移會稅釐  
局司道一體遵照並飭該員知照繳稟鈔發

批德化縣稟

查十八省稅契未聞一縣徵額有四萬餘兩者况德  
化窮僻之地耶昉至何年仰福建布政司迅卽查明



稟覆邵令到任以來此事辦理最善卽轉飭將貼稅  
名目永遠禁革勒石立案並移行該管道州知照繳

卞制軍政書卷四終

男

續

昌恭校